

Ekwo

Ditoronomi

Ekemu k'alufu l'úbvú Horẹbu

1 ¹Ọwaa bụ iphe, Mósísu pfuru nụ ndu Ízurelu g'ẹphe ha l'echiegu ụzo ẹnyanwu-awawa Jíọdanu, bụ iya bụ nsụda Araba, nọ gha iphu l'ụzo Sufu. Ọ nọ lẹ mgbaka Paranu l'azụ lanụ; waa Tofelu; waa Lebanu; waa Hazerotu; yee Dizahabu l'azụ iya ọphuu. ²E-shi l'úbvú Horẹbu eje Kadeshi-Baneya bẹ ee-jegbuje ije ujiku iri lẹ nanu teme l'e rwua ya mę e tsoru ụzo úbvú Siye. ³Ọ be l'apha, kwe pẹ mgbarapha ụkporo labo; lẹ mbọku, ọnwaa k'iri lẹ nanu furu gededede; Mósísu raaru iya ndu Ízurelu g'ẹphe ha arara; mbụ iphe, Chipfu turu iya l'ekemu lẹ k'opfu ẹhu pẹ. ⁴Ono bụ g'ọ lwụ-kpechaeruphọ Sihonu, bụ eze ndu Amọru; bụ onye shi buru lẹ Heshibonu. Teme o jekwaphọ Edereyi je alwu-kpee Ogu, bụ eze ndu Beshanu; bụ onye shi buru lẹ Ashitoretu. ⁵Ọ buru l'ụzo ẹnyanwu-awawa Jíọdanu l'eka ono l'alị ndu Mówabu bẹ Mósísu nọ wata pẹ atokashiru ekemu ono; sụ:

⁶“Chipfu, bụ Chileke anyi nọ l'úbvú Horẹbu pfuru nụ anyi sụ: ‘Unu nonukakwaru ọdu l'úbvú-a. ⁷Unu phokashia ụlo-ekwa unu tugbua jeshia alị úbvú úbvú ndu Amọru; waa alị ndu nọ-kube pẹ nụ lẹ nsụda Araba; mę l'alị úbvú úbvú; mę l'alị ọkpa-úbvú, nọ l'ụzo ẹnyanwu-arịba; waa ndu bu l'ụzo echiegu ndohali; waa ndu bu l'ụzo aguga eze-enyimu; mbụ kwaseru ụzo alị ndu Kėnanu; yee úbvú úbvú Lébanonu; mbụ kwaseru rwuchaa ẹnyimu ono, bụ ẹnyimu Yufurėtisu. ⁸Lekwaa; mu woakwaru alị ono dobe l'iphu unu. Unu wubakwa je alwuta alị ọbu nworu; mbụ alị ono, Chipfu riru angụ lẹ ya a-nụ nna unu oche pẹ ono, bụ Ẹbirihamu; waa Áyizaku; waa Jíékopu; yee oshilokpa pẹ g'ẹphe ha.’”

Mósísu ahọta ndu-ikpe

(Awụ 18:13-27)

⁹“Ọ buru teke ono bẹ mu suru unu: ‘Mu ta adukwa ike evukota ivu-erwa unu nwẹkinyi mu. ¹⁰Sụ-a; nta-a bẹ Chipfu, bụ Chileke unu mewaru;

unu ka l'otu k'ophu bu le nta-a be unu hawa ge kpokpode, no l'igwe.

¹¹ Mu nodu epfukwapho ge Chipfu, bu Chileke ke nna unu phe mekwaro g'unu kabaa l'otu eme le g'unu ha nta-a ugbo ukporo l'unu; teme l'ookebe-kwapho unu l'oma, bu iphe, o kweru unu ukwe iya. ¹² Denu ge mbedua nweka mu a-du ike vukota ivu-erwa unu; me iphe, atsụ unu l'ehu; edo-shikotaru unu opfu? ¹³ Su-a; unu shigbaa l'okpa-ipfu unu l'okpa-ipfu unu hotakota ndu maru iphe; mbu ndu bu ndu iphe edoje enya; bya aburu ndu a maru epha phe; ge mu mee phe g'ephe buru ndu-ishi unu.'

¹⁴ "Unu yeeru mu onu su l'iphe, mu pfuru bu iphe, o gbaru g'unu mee. ¹⁵ Oo ya bu; mu bya ahotagbaa ndu bu ndu nweru enya l'okpa-ipfu unu iche iche buru ndu maru iphe; bukwarupho ndu a maru epha phe; mee phe g'ephe buru ndu-ishi unu. O duru ndu ophu mu meru; epe buru ishi unu umadzu labo l'ukporo umadzu iri iri; o duru ndu ophu bu ishi umadzu ukporo ise. O dukporuro ndu ophu bu ishi umadzu ukporo ebo l'iri; duru ndu ophu bu ishi umadzu iri; tuko g'ephe ha mee ndu-ishi l'ipfu l'ipfu.

¹⁶ "Mu tbaru ndu-ikpe unu ekemu teke ono; su phe: 'Unu ngabejekwaru unwune unu, opfu adaru nchi; g'ephe dooru unu iphe, adaru phe nu. Epe -dochaa ya; unu edoshiaru phe opfu obu l'uzo pfuru oto; mo bu ndu izurelu le ndu izurelu be odaru; mo bu onye izurelu yele onye lwaru alwalwa. ¹⁷ Unu te elejekwa nemadzu enya l'iphu ekpe ikpe. Unu ngabejekwaru umadzu labo, opfu adaru nchi; g'ephe doo iphe, adaru phe nu; m'ephe bu ndu ha nwanshi; m'ephe bu ndu ha shii. Unu ta atsujekwa nemadzu ebvu; kele onye-ikpe du l'eka bukwa Chileke. Teke o bu opfu, kariru unu eka; unu egude iya byapfuta mbedua ge mu numa.' ¹⁸ Mbụ le teke ono be mu tukoerupho iphe, gbaru unu lememe kakotaru unu g'unu mee."

Anwu ngge l'alị Kénanu

(Ógú 13:1-33)

¹⁹ "Noo ya; ge Chipfu, bu Chileke anyi suru g'anyi wufu l'ubvu Horebu; be anyi wufuru kwaseru uzo, e shi eje alị ubvu ubvu ndu Amoru; jekota ije lechiegu ono, paru eka bya adu ebvu ono, unu humakotaru ono; jasụ anyi rwua Kadashi-Baneya. ²⁰ Tobudu iya bu; mu su unu: 'Nta be unu rwuakwaru alị ubvu ubvu ndu Amoru, bu iya bu alị, Chipfu, bu Chileke anyi abya anyi anunu. ²¹ Unu lenu; le Chipfu, bu Chileke unu nuakwaru unu alị obu. Unu tugbukwa je anata alị obu, bu iya bu iphe, Chipfu, bu Chileke ke nna anyi oche phe pfuru. Ge ndu ba agukwa unu; ophu ehu anmakwa unu anmanma!'

²² "Obenu l'unu byapfutaru mu bya asu lo kakwa ree g'anyi hota ndu nemadzu zia g'ephe je anwuaru anyi ngge l'alị ono; g'ephe bya akaru anyi uzo, anyi ee-shi bahu iya; teme waa mkpukpu, anyi e-shi bahu.

²³“Iphe ono, unu pfuru ono dū mu ree shii; ọo ya bụ; mu bya ahọta umadzu iri l'ẹbo; ọkpa-ipfu, nọnu onye lanu. ²⁴Ndu ono tugbua kwaseru ụzo alì úbvú úbvú ono; lufuta lẹ nsuda Eshukolu; nwukota alì ọbu ngge. ²⁵Ephe hachaa akpuru oshi, nọ l'alì ono wọta gude lwapfuta anyi; bya asu anyi: 'Alì ọbu, Chipfu, bụ Chileke anyi abya anyi anunu ọbu dukwa ree.'”

Ndu Ízurelu ekwefuru Chipfu ike

²⁶“Obenu l'unu nūmachaaru iya; bya ekwefu ike ejeje; jika eme iphe, Chipfu, bụ Chileke anyi sūru g'unu mee. ²⁷Unu nọdu l'ulo-ekwa unu agushi aphu sū: 'Chipfu bẹ anyi dukwa ashi; ọ kwa iphe ono meru iphe, o dufutaru anyi l'alì ndu Ijiputu; woru anyi ye ndu Amoru l'eka g'ephe megbushia anyi.' ²⁸Unu sū: '?Bụ ole bẹ anyi e-shi abahu nta; g'unwunna anyi-a mewaru; meji tsukahụ anyi-a? kele ephe sūru lẹ ndu bu l'alì ono ka anyi l'otu; bya akagbaa anyi ogologo; teme mkpukpu pẹ pagbaa ẹka; yee phengara phengara igbulọ mkpukpu ono, aakpujegbaa l'oorwua akpaminigwe. Ozo, ka njo bụ l'anyi humacharu unwu ndu Anaku l'alì ẹka ono.'”

²⁹“Mu sū unu: 'Gẹ meji te tsukahushi unu! Mbụ-a; gẹ ndzụ pẹ ba agushi unu! ³⁰Lẹ Chipfu, bụ Chileke unu, bụ onye vutaru unu ụzo bẹ alwu-chiteru-a unu ọgu; egube ono, ọ lwu-chiteru iya unu l'alì ndu Ijiputu ono; bụ ọphu unu gude ẹnya unu huma-a. ³¹Teme wakwapho g'ọ lwu-chiteru iya unu l'echiegu; ẹka unu humaru gẹ Chipfu, bụ Chileke unu hetaru unu gẹ nna ehetajẹ nwatibe iya-a; hekpopho unu gbiriri jasụ unu rwua ẹka-a.' ³²Unu lephukota opfu mu ono; mbụ bya ajika achiru upfu kwe l'eka Chipfu, bụ Chileke unu nọ, ³³bụ onye vutaru unu ụzo l'ije unu ọbu. Teme ọ buru yebedua bẹ anọduje eleru unu ẹnya ẹka unu a-kpobe ulo-ekwa ono. Onye abujeru; o -be l'enyashi l'ọ nwuberu unu ọku; teke o beru l'eswe l'o doberu unu urwukpu; shi nno egoshi unu ụzo unu a-nọdu eshi; teme ọ buru yebedua anọduje eleru unu ẹnya ẹka unu a-kpobe ulo-ekwa unu.”

Chipfu anu ndu Ízurelu aphu (Ọgú 14:20-45)

³⁴“Chipfu nūma iphe, unu pfuru; ẹhu ghuahaa ya egu; o buta angu ria sū: ³⁵‘O tọ dukwa mẹ onye lanu l'ogbo ndu ejo-okpoma-a, byaru ahuma eguru alì ono ẹnya; mbụ alì ono, mu riru angu sū lẹ mu a-nu nna unu oche pẹ ono; ³⁶gbahaa Kalebu nwa Jiefune. Yebedua a-huma iya; mbụ lẹ yebedua bẹ mu a-nu ẹka ọ zokporu okpa l'alì ono; teme mu anukwa iya pho unwu iya. Iphe, kparu iya nū buru l'o gude obu iya g'ọ ha tsoo Chipfu.' ³⁷O bukwarupho opfu ẹhu unu meru g'o gude; ẹhu ghuahaa Chipfu egu l'eka mu nọ. O pfua sū: 'Gubedua ta abahukwa iya pho. ³⁸L'oo onye eyejeru mu ẹka bụ Jioshuwa nwa Nunu bẹ a-bahu iya nū.' Sū: 'Gbakwaa

ya unme g'obu shihu iya ike; noo kele ọo yebedua e-du ndu Ízurelu g'ẹphe je alwuta alì ono nworu. ³⁹A -bya l'unwegirima ke nshìi, bụ ndu ọphu unu sùru l'aa-kpụ le ndzụ ono; mbụ unwegirima unu ndu ọphu teke amaduru iphe, dụ ree; me iphe, dụ eji le teke ono; ndu k'ono bụ ndu a-bahụ l'alì ono. Ọ bụru ẹphebedua be mu a-nụ alì ọbu; ẹphe enworu iya g'ọ bụru okiphe phe. ⁴⁰A -bya l'unubedua; unu laphukwa azụ; unu wụkwaru shia ụzo echiegu lashia l'ụzo Eze-enyimu Uswe-uswe.'

Aalwụ-gbu ndu Ízurelu (Ọgú 14:39-45)

⁴¹"Tọbudu iya bụ; unu yeeru mu ọnu su: 'Anyi mesweakwaru Chipfu. Anyi e-jewarọ alwua ọgu ọbu; mekọta iphemiphe, Chipfu, bụ Chileke anyi sùru g'anyi mee.' Ọo ya bụ; unu tuko g'unu ha kwakọbe k'ẹje ọgu. Unu dobesu l'abahụ l'alì úbvú úbvú ono dụ nphẹ.

⁴²"Tọbudu iya bụ; Chipfu sù mu: 'Kakwaru phe g'ẹphe te ejekwa abahụ; ọphu ẹphe ejekwa alwụ ọgu; noo kele mu ta nọ-kubekwa unu. Unu -jee be ndu ọhogu unu a-lwukwa unu.' ⁴³Mu pfiaru iya unu; ọphu unu angaduru nchì; unu jìka eme iphe, Chipfu sùru g'unu mee; gude eku onwunu wufu jeshia l'alì úbvú úbvú. ⁴⁴Ndu Amọru, bu l'alì úbvú úbvú ono wufuta tsopfuru unu ọgu. Ephe vupya be unu g'enwu; gbushia unu. Ephe chipfuru unu egbushi unu eshi le Siye jasụ le Homa. ⁴⁵Unu lwaphuta azụ bya egude olu ẹkwa raku Chipfu; ọphu o yeduru ọnu yeru unu; ọ gbagbua ya le nkuchi. ⁴⁶Ọ bụru iya bụ l'unu adọru le Kadeshi nọo ujiku, dụ igwerigwe."

Aghaphe botorii l'echiegu

2 ¹"Anyi dakọbe wụ-phu azụ l'echiegu; wuru shia ụzo Eze-enyimu Uswe-uswe, bụ iya bụ ge Chipfu sùru mu g'e mee ya. Anyi wụ-phekpọo nọo ọdu l'alì úbvú úbvú Siye l'eka ono.

²"A nonyaa Chipfu sù mu: ³'Unu wụ-pheshitaakwaru l'alì úbvú úbvú-a. Iphe, unu e-me nta-a be bụ g'unu shia ụzo isheli. ⁴Waa iphe, ii-pfuru ndu Ízurelu baa: Nta-a be unu abyakwa awughata ẹka unwunna unu, bụ oshilokpa Iso bu; mbụ ndu bu l'alì Siye. Ephe a-nodukwa atsụ unu ebvu; ọle-a; unu kwabekwaru onwunu enya! ⁵Unu ta akpakokwaru phe k'ọgu; noo kele ọ tọ dudu alì phe me ẹka lanụ, mu a-nụ unu; m'o beta ọ bụru ntokpa lanụ. Mu nnakwaru Iso alì úbvú úbvú Siye g'ọ bụru nkiya. ⁶Unu gudekwa okpoga zuta phe nri, unu e-ri; unu egudekwapho okpoga zuta phe mini, unu a-ngu.'

⁷"Chipfu, bụ Chileke unu kebekwaru unu l'oma l'iphe, bụ ozi, unu gude ẹka unu jee. Ọ bụru yebedua letakotaru unu enya l'ije, unu jekotaru l'echiegu-a, parụ ẹka apa-a. Lime ukporo apha labo-a be Chipfu, bụ Chileke nọ-kubekotakwaru unu; ọphu ọ dudu iphe, ụko iya dujeru unu me nanu.

8“Tòbudu iya bụ; anyi bya aghata ẹka ụnwunna anyi ono, bụ oshilọkpa Iso bu l'alị Siye. Anyi bya aji-chi ụzo nsụda Araba, bụ ụzo, shi mkpụkpu Elatu; bya eshikwapho mkpụkpu Eziyọnu-Geba. Anyi kwaseru ụzo echiegu Mówabu tųgbua. 9Noo ya; Chipfu sụ mu: 'Unu ta chọkwa ndu Mówabu opfu; ophu unu akpakokwaru phe k'ogu; kele o tọ dukwa alị phe me ẹka lanu, mu a-nu unu; eshinu mu wowaru alị Aru nụ oshilọkpa Lotu g'ọ bụru nkephe.' ”

10Ndu shi buru l'ẹka ono bụ ndu Emu. Ephe bụ ndu okpehu dū; teme epe dū igwerigwe. Ephe hachaepho kpaphere kpaphere ge ndu Anaku. 11O kwapho egube ono, aasuje le ndu Anaku bụ oshilọkpa Rafa; bukwapo g'aasuje l'ephebedua bụ. Ndu Mówabu ekuje phe ndu Emu. 12O bụru ndu Hōru shi buru l'alị Siye; ole oshilọkpa Iso chifuru phe gbushia phe l'ẹka ono bya ebuchia ẹka epe shi buru; egube ono, ndu Ízurelu meru l'alị ono, Chipfu nuru phe g'ọ bụru nkephe ono.

13“Tòbudu iya bụ; Chipfu sụ: 'Unu wu-lihu je adaghaa nggele Zeredu ono.' Anyi wu-lihu je adaghaa nggele Zeredu obu. 14A -gbẹ le teke anyi gbeshiru le Kadeshi-Baneya gbiriri jasụ teke anyi jeru je adaghaa nggele Zeredu obu be bụ ukporo apha l'apha iri l'esato. O rwutashia teke ono; ogbo, shi sūru eje ogu le Ízurelu laebewa mpfulome, bụ iya bụ iphe, Chipfu riburu angu le ya e-me. 15Kele Chipfu daberu phe ẹka; gbushikota jasụ epe chihu l'odu unwu Ízurelu.

16“Tòbudu iya bụ; o be teke ndu sūru eje ogu l'echilabo ndu Ízurelu nwuhubebechaerupho; 17Chipfu sụ mu: 18'Ntanu-a be unu a-ghabu alị ndu Mówabu, bụ iya bụ Aru. 19Ole teke unu rwuru l'alị ndu Amonu; unu ta chọkwa phe opfu; ophu unu akpakokwaru phe k'ogu; noo kele o tọ dudu alị, bụ ke ndu Amonu, mu byaru anu unu. Alị obu be mu nwaru oshilọkpa Lotu g'ọ bụru nkephe.

20“ 'Ndu shi buru l'alị ono bukwapo ndu aasuje l'ephe bụ oshilọkpa Rafa. Mbụ l'oo ndu Rafa shi buru iya teke ndiche. Ndu Amonu bụ ndu Zamuzumimu be epe ekuje phe. 21Epe bụ ndu okpehu shi dū shii; teme epe shi dū lotu; bukwarupho ndu shi hagbaa kpaphere-kpaphere ge ndu Anaku. Obenu le Chipfu mebyishiru phe l'iphu ndu Amonu. Ndu Amonu chifu phe buru l'ẹka epe shi buru. 22O bukwapo nno bụ ge Chipfu meru iya oshilọkpa Iso, shi buru l'alị Siye. O mebyishiru phe ndu Hōru, shi buru l'ẹka ono. Oshilọkpa Iso chifu phe buru l'ẹka epe shi buru gbiriri jasụ ntanu-a. 23Ndu Ava, shi bugbaaru l'unwu mkpụkpu, noru jasụ le mkpụkpu Gaza be ndu Kafuto, shikwapho l'alị Kafuto wufuta byaru bya emebyishia; chifu phe; buchia ẹka epe shi buru.

Ízurelu alwu-kpe Sihonu,

bụ eze ndu Amoru

(Ógú 21:21-30)

24“ 'Unu gbeshi je aghabua nsụda Anonu. Unu lenu; mu woakwaru Sihonu onye Amoru, bụ eze Heshibonu; yee alị iya ye unu l'ẹka. Unu je

awata phe achifu. Unu je akpakoru iya k'ogu. ²⁵Mu agbe ntau-a wata eme ge ndzu unu wata agu onyemonye, no le mkpula akpaminigwe-a l'opfu; mbu g'ephe tuko g'ephe ha wata aphu kpaakpaakpaa l'opfu ehu unu. Ephe a-numa iphe, unu eme; meji etsukahu phe; ephe awata ete kparikpari l'eka ndzu unu agu phe.' ”

²⁶“Mu gbe l'echiegu Kedemotu zia ndu-ozu g'ephe je ezia Sihonu, bu eze Heshibonu ozi nchi-odoo; su iya: ²⁷Jiko g'anyi ghatanu l'ali unu. O ephe l'oma eze gbororo be anyi e-tsoru. Anyi ta ahakwa gbororo ono; swia uzo ozo. ²⁸Nri, anyi a-nodu eri; waa mini, anyi a-nodu angu be anyi a-zuje unu l'okpoga. Iphe, anyi arwo unu kpoloko bu g'anyi zo okpa anyi l'ali unu ghata. ²⁹Mbu egube ono, oshilokpa Iso, bu l'ali Siye shi ereje iya anyi-a; ndu Mowabu, bu l'ali Aru shi erejekwa iya pho anyi nno. Unu reje iya anyi nno gbiriri jasu anyi aghaa enyimu Jiodanu bahu l'ali, Chipfu, bu Chileke anyi anu anyi.’

³⁰“Obenu le Sihonu, bu eze Heshibonu jikaru g'anyi ta aghatashi. Noo kele Chipfu, bu Chileke unu meru go buru onye ejo-okpoma waa go kpo-chia obu; g'ee-shi go woru iya ye unu l'eka; bunu iya bu iphe, o mewaru-a.

³¹“Chipfu sukwaru mu: ‘Lenu; mu wataakwaru eworu Sihonu; yee ali iya ye unu l'eka. Unu watakwa iya alwuta; k'opfu ali iya e-mechaa buru okiphe unu.’ ³²Tobudu iya bu; Sihonu yee ndu nkiya g'ephe ha wufuta byapfuta anyi ugu le Jiahazu. ³³Chipfu, bu Chileke anyi woru iya ye anyi l'eka; anyi lwu-kpee ya; waa unwu iya; yee ndu nkiya iya g'ephe ha. ³⁴Anyi nata mkpukpu le mkpukpu iya go ha teke ono; bya emebyishikota iya l'opfu; unwoke; me unwanyi; me unwegirima. Ophu o dudu me onye lanu, anyi haru go phodu. ³⁵Iphe-edobe; me iphe ozo, anyi kwataru l'okwata le mkpukpu ono, anyi lwu-kperu ono be anyi gwetaru; o buru k'anyi. ³⁶A -gbe le mkpukpu Arowa, no l'oke nsuda Anonu; me le mkpukpu ono, no lime nsuda Anonu ono je akpaa l'ali Giladu ta adudu me mkpukpu lanu, okpehu nkephe nyiberu k'anyi; kele Chipfu, bu Chileke anyi tukoru iya go ha nukota anyi. ³⁷Obenu l'ali ndu Amonu; me ali, no laguga nggele Jiaboku; me le mkpukpu, nogbaa l'ubvu ubvu be unu gbanogor, bu iphe, Chipfu, bu Chileke anyi suru g'anyi mee.”

**Ízurelu alwu-kpe Ogu,
bu eze ndu Beshanu
(Ógú 21:31-35)**

3 ¹“Tobudu iya bu; anyi gbe teke ono gha iphu l'uzo Beshanu. Ogu, bu eze ndu Beshanu; yee ndu ali iya wufuta; byapfuta anyi ugu le mkpukpu Ederayi. ²Chipfu su mu: ‘Unu ta atsukwa iya ebvu; kele mu woakwaru iya; yee ndu ali iya; waa ali iya l'opfu ye unu l'eka. Unu mekwaa phe iphe, unu meru Sihonu, bu eze ndu Amoru, bu le Heshibonu.’

³“Noo ya; Chipfu, bu Chileke anyi woru Ogu, bu eze ndu Beshanu; yee ndu ali iya l'ophu ye anyi l'eka. Anyi gbushiaha phe; lwua phe gbiri-ri jasū ophu o dudu onye phodukwaduru nu. ⁴Anyi nata mkpukpu iya g'o ha teke ono; ophu o dudu me mkpukpu lanu, l'ime ukporo mkpukpu eto, o nweru, anyi nataphodoru; mbu ali Agobu l'ophu, bu iya bu ali-eze Ogu, no l'ali Beshanu. ⁵Mkpukpu ono g'o ha b'e gude igbulu kpu-phekota mgburugburu; teme a kpukotakwapho igbulu obu; o hakota ephekerephe ephekerephe; bya eyekota mgbo-igwe l'onu-abata iya; tuchikota iya atuchi. Teme o dukwarupho mkpukpu le mkpukpu ozo, du igwerigwe, a kpuduru igbulu, anyi lwutachaaru ye iya. ⁶Anyi tuko mkpukpu ono g'ephe ha mebyishikota; egube anyi meru ke Sihonu, bu eze ndu Heshi-bonu; mbu tuko unwoke; me unwany; me unwegirima mkpukpu ono mebyishikota. ⁷Iphe-edobe phe; me iphe, ephe nweru enweru be anyi kwataru l'okwata; g'o buru k'anyi.

⁸“O buru teke ono be anyi nataru ndu eze ndu Amoru ono ephe-nebo ali, no l'uzo enyanwu-awawa enyimu Jiordanu; a -gbu le nsuda Anonu jasū l'ubvu Hamonu. ⁹Ubuvu Hamonu be ndu Sayidonu ekuje Siriyonu; ndu Amoru nodu ekuje iya Seniru. ¹⁰Anyi natakotaru mkpukpu le mkpukpu, nokota le baswaa uswe iya ono l'ophu; waa ali Giladu l'ophu; mekwapho ali Beshanu g'o ha; jasū le mkpukpu Saleka; yee Edereyi, tukokwapho yiru l'ali Beshanu; aka Ogu bu ishi.

¹¹“Oo Ogu, bu eze ndu Beshanu be shi phodu nu l'oshilokpa Rafa. Mbu l'iphe, ozeje aze bu l'igwe be e meru iya. Ogologo iphe-aze obu du nkwo-eka tete. Uswekete iya du nkwo-eka eno; mbu nkwo-eka mmanu. Iphe-aze ya obu dukwa le mkpukpu Raba, du l'ali ndu Amonu byasu ntanu-a.”

Aaweshi ali ono

(Ogu 32:1-42)

¹²“Anyi lwutachaepho ali ono; mu woru uzo isheli mkpukpu Arowa, bu ophu du l'aguga nsuda Anonu; waa nkeru-ebu ali ubvu ubvu Giladu me mkpukpu, dukota iya nu; nu oshilokpa Rubenu; waa oshilokpa Gadu. ¹³Mu bya ekee okpa-ipfu Manase ebo bya eworu ali Giladu ibiya ophu ghuduru nu pho; waa ali Beshanu l'ophu; aka shikota buru ali-eze Ogu; woru nu oke lanu l'uzo labo ndu Manase ono.”

Ali Agobu l'ophu, no l'ali Beshanu be aza ali oshilokpa Rafa. ¹⁴O buru Jiayi, bu oshilokpa Manase wotakotaru ali Agobu ono l'ophu; jasuchaa l'oke ephe le ndu Geshu; waa ndu Maka. E woru epa iya gu ali ono; k'ophu bu l'a -gbu teke ono byasu ntanu-a be a wataru eku uswe aka ono Havotu-Jiayi.

¹⁵“Mu woru ali Giladu nu Makiya. ¹⁶A bya abya l'unwu Rubenu; yee unwu Gadu; o buru aka mu nuru phe bu a -gbu l'ali Giladu tugbu jee

jasu le nsuda nggele Anonu. O buru echilabo nsuda ono be oke iya kparu. Teme mu nukwa phe pho ali ophu shi l'eka ono noo jasu le nggele Jia-boku, bu iya bu eka ali ndu Anonu kparu. ¹⁷Mu nukwa phe pho nsuda Jiordanu, gbẹ l'eze-enyimu Gálili noo jasu l'eze-enyimu nsuda Araba, bu iya bu Eze-enyimu Unú, no l'uzo enyanwu-awawa úbvú úbvú Pisiga. O buru l'enyimu Jiordanu be oke iya kparu.

¹⁸“Mu tɔaru iya unu l'ekemu teke ono su: ‘Chipfu, bu Chileke unu nɔkwaru unu ali-a g'ọ buru k'unu. G'unwoke unu ndu ike du l'ogu kwakwaa onwophe k'ogu; vuru unwune unu ndu Ízurelu ɔzo daa enyimu Jiordanu. ¹⁹Ole g'unyomu unu; yee unwegirima unu; mekpoo iphe-edobe unu nɔdukwa le mkpukpu ono, mu nuru unu ono. Le mu makwaru-a l'unu nwenkaru iphe-edobe. ²⁰Unu tsokwaru phe je ogu gbiriri jasu teke Chipfu e-mefua g'unwune unu ono nopyabe g'o meru g'unubedua nopyabe-a; mbu m'ephe nata ali nkephe, bu ali ono, Chipfu abya phe anunu l'azu enyimu Jiordanu azu iya ophuu. O -nwuchaepho nno; ndu nonu alaphushwaro azu l'oke ali ophu mu nuru phe ono.’

²¹“Mu bya akaru Jioshuwa teke ono su iya: ‘Nta be i gudewaa enya ngu ebo ebo huma iphe, Chipfu, bu Chileke unu meru ndu eze labo-a. O kwapho egube ono bu ge Chipfu e-me ali-eze ophu nokota l'azu-enyimu azu iya ophu unu eje pho. ²²Unu ta tsukwa phe ebvu; kele o kwa Chipfu, bu Chileke unu l'onwiya a-lwu-chiru unu ogu obu.’”

Aadabuta Mosisu g'ọ tọ ghatashị enyimu Jiordanu

²³“O buru teke ono be mu rwo ru Chipfu su: ²⁴‘Gube Nnajiuphu, bu Chipfu; nta-a be i watawaru egoshi mube onye-ozu ngu g'i habe shii; yee okpukpu-ike ngu. ?Bu agwa, du idu-aga, no l'eliphe-a; ozoo l'imigwe suru eme iphe, paru eka iimegbabe-a? ²⁵Hanaa mu jiko ge mu daghaa enyimu-a je ahuma eguru ali ono, no l'azu enyimu Jiordanu azu iya ophuu ono; mbu eguru ali úbvú úbvú ono; waa úbvú úbvú Lébanonu ono!’

²⁶“Obenu l'oo opfu ehu unu be Chipfu gude tukoshi mu oke ehu-eghu iya; ophu o kwedu ngaberu mu nchi. Chipfu gbenu su mu: ‘Be pfluakwa iya ozo! Ta rwoekwa mu iphe ono, iirwo mu ono! ²⁷Nyihukwa úbvú Pisi-ga; lee enya l'uzo enyanwu-ariba; lee l'uzo isheli; lee l'uzo ndohali; waa l'uzo enyanwu-awawa. Nodu l'eka ono lee enya l'ali ono; kele i tii dakwa enyimu Jiordanu-a alufu azu iya ophuu. ²⁸Oo g'i zia Jioshuwa iphe, oome; l'i mee g'obu shihu iya ike; g'o to te etete; kele oo yebedua bu onye e-du ndu-a g'ephe lufu azu iya ophuu je enworu ali ono, ii-huma ono.’

²⁹“O buru iya bu; anyi doshia le nsuda ono, no-kube mkpukpu Betu-Peyo.”

Mosisu epfu ge ndu Ízurelu meje iphe, a turu l'ekemu

4 ¹“Unube unwu Ízurelu; unu ngabekwa nchi ge mu zia unu iphe, Chipfu toru okpa iya su g'e tsoje; yee iphe, o suru g'e meje. Unu mekwaa

ekemu-a g'unu anọdu ndzụ; je alwụta alị ono nworu; mbụ alị ono, Chipfu, bụ Chileke nna unu p̄hẹ abya unu anụnu ono. ²Unu te eyekwakwa iphe, l'opfu-a, mu epfuru unu-a; ọp̄hu unu ahabọtakwa iya iphe; k'ọp̄hu unu anọdu eme ekemu Chipfu, bụ Chileke unu, bụ ekemu ono, mu aturu unu ono. ³Unu gudewaa ẹn̄ya unu hụma iphe, Chipfu meru l'opfu ẹhu agwa Balu-Peyo. Chipfu, bụ Chileke unu meru iphe, bụ ndu shi l'ime unu tsoru agwa, bụ Balu-Peyo; ẹp̄he b̄kotar̄u mkpurupyata. ⁴Obenu lẹ g'unu ha, bụ ndu noshiru ike l'ime Chipfu, bụ Chileke unu bẹ nọ ndzụ rwua ntanu-a.

⁵“Unu lekwa; mu ziakwaru unu iphe, Chipfu t̄oru ọkpa iya sụ g'e tsoje; bya ezia unu iphe, ọ s̄uru g'e meje, bụ iphe, Chipfu, bụ Chileke mu s̄uru ḡe mu zia unu; k'ọp̄hu unu a-wata iya ememe m̄e unu laep̄ho l'alị ono, unu eje alwụta ono. ⁶Unu dobekwa ekemu ono; meje iya ememe; kele ọo ya bụ mmamiphe unu; bya aburu iya bụ l'iphe edoje unu ẹn̄ya l'ip̄hu ndiphe, bụ ndu e-mechaa n̄ma iphemiphe ono, Chipfu t̄oru ọkpa iya ono; pfuaaha s̄u: ‘Ọkpobe-opfu bụ l'ọha-a, par̄u ẹka-a b̄kwa ọha, maru iphe; bya aburu ọha, iphe edoje ẹn̄ya!’

⁷“Mbụ-a; ?d̄enu ọhozo, ha shii, agwa p̄hẹ nọ-kube ntse ọkpobe anọ-kube ḡe Chipfu, bụ Chileke anyi anọ-kubeje anyi m̄e anyi raku iya-a? ⁸T̄o; ?d̄enu ọhozo, habaa shii, nweru ekemu, pfuru ọto ḡe ndu ọwa-a, mu atushiru unu ntanu-a? ⁹Ọo ẹpho g'unu kwaberu onwunu ẹn̄ya; unu anwuberu ndzụ unu ọkpobe ẹn̄ya; a -n̄nya unu z̄oha iphe, unu gude ẹn̄ya unu h̄uma; mbụ g'ọ t̄o lufu unu alufu l'ọkpoma jeye g'unu a-nọ-beru ndzụ. Ọ ch̄ia g'unu zia ya unwu unu; unu ezia ya unwu nwanwa unu p̄hẹ. ¹⁰Unu nyatakwa mb̄oku ono, unu pfuru l'at̄atip̄hu Chipfu, bụ Chileke unu l'úbvú Hor̄ebu ono; mbụ mb̄oku ono, ọ s̄uru mu: ‘Kuk̄obe ndu Ízurel̄u g'ẹp̄he dzuk̄obe l'at̄atip̄hu mu; g'ẹp̄he n̄ma olu mu; k'ọp̄hu ẹp̄he a-nwuta g'ẹp̄he e-shije akwab̄e mu ùbvù; jas̄u g'ẹp̄he a-nọ-beru l'alị ono; t̄eme ẹp̄he ezikwa ya pho unwu p̄hẹ.’

¹¹“Ọ b̄uru iya b̄u; unu kp̄irit̄aru ntse bya apfuru lẹ mgboru ọkpa úbvú ono; ọku, enwu phoophoophoo l'eli úbvú ono n̄du ebulihuje erwu echilabọ imigwe. Ẹkameka gbak̄ota ọchii; urwukpu n̄du akp̄u k̄e t̄ututuu; ẹkameka gbah̄ukota k̄e ts̄ukiribaa. ¹²Chipfu gb̄e l'ọku ono epfu anu unu. Unu n̄du anu olu-opfu; obenu l'unu ta ah̄umaduru onye epfu iya n̄u. Ọ b̄up̄ho olu-opfu kpoloko b̄e unu n̄umaru. ¹³O mee g'unu maru ọgbandzu iya, ọ s̄uru g'unu dobe, b̄u iya b̄u ekemu iri ono. O wokwaru iya pho deeru unu l̄e mkpuma labo, d̄u bach̄ibachi. ¹⁴Chipfu bya akaru mu teke ono s̄u mu ḡe mu zia unu iphe, ọ t̄oru ọkpa iya s̄u g'e tsoje; ȳe iphe, ọ s̄uru g'e meje; k'ọp̄hu unu a-n̄du eme iya l'alị ono, unu adagha eje enweru ono.”

Eebuchi abarụ agwa ẹja

¹⁵“Ọo ya b̄u l̄e-a; eshinu ọ d̄udu ụgbugba iphe, unu h̄umaru mb̄oku ono, Chipfu gb̄e l'ọku pfuru yeru unu l'úbvú Hor̄ebu ono; unu

kwabekwaru onwunu enya okpobe akwabe; ¹⁶a nonya; unu pyia ntekpe; gude merwua onwunu; pyia ya; o yee iphe, oo-ye; ophu l'o yeru nwoke; ozoo nwanyi. ¹⁷Ozoo l'o yeru udu anu ophu oo-ye l'eliphe-a; ozoo l'o yeru enu, ephe le pherephere; ¹⁸ozoo l'o yeru iphe, akpu wuruwuru l'ali; ozoo ema, bu le mini. ¹⁹Mbu-a; unu kwabekwa enya; a -nonya; unu jeshia apali enya imeli bya ahuma enyanwu; ozoo onwa; ozoo kpokpode; mbukpoo iphemiphe, nokota l'akpaminigwe; o guahaa unu egu k'abarū eja; unu wata phe ejeru ozi; mbu iphemiphe ono, Chipfu, bu Chileke unu meru; keshigbaaru ndiphe, nokota le mkpula akpaminigwe-a l'ophu. ²⁰Obenu l'unubedua be Chipfu lofutaru l'o-ta-pfupfufu oku, ekeje mkpurukpu-igwe; mbu l'o dufutaru unu l'ali Ijiputu g'unu buru iya ndu o ketaru l'oke; g'unu bunu iya-a ntau-a. ²¹Temankwapho; mbedua be Chipfu tuko-shiakwaru ehueghu iya l'opfu ehueghu unu; bya eribua ya langū le mu ta adaghatadu enyimu Jiordanu; ophu mu abahudu l'eguru ali ono, Chipfu, bu Chileke unu nuru unu g'o buru okiphe unu ono; ²²le mu nwuhufutaje l'ali eka-a; l'o to dudu iphe, e-me ge mu daghata enyimu Jiordanu. L'oo unubedua a-daghata iya je enworu eguru ali ono. ²³Unu kwabekwa enya g'unu ta azoha oghandzu Chipfu, bu Chileke unu meru; unu liya gbaa. G'o to dukwa iphe ono, Chipfu, bu Chileke unu suru g'unu ta abashiru eja ono, unu a-kpu; ozoo pyia ntekpe, yeru iya nu. ²⁴Noo kele Chipfu, bu Chileke unu bukwa oku, ekepyashije iphe, o humaru; bya aburu Chileke, te ekwedu g'e koo ya okpa l'ishi.

²⁵“O -buru l'unu buchaaru l'ali ono; noo odu; k'ophu unu nwushichawaru unwegirima; bya enwechawaru unwu nwanwa; bya agbe teke ono mebyishiaha onwunu; mbu je emeta ntekpe g'unu emehabe iya; o du; shi nno mee ejo-iphe l'iphu Chipfu, bu Chileke unu bya akpatsu iya ehueghu; ²⁶mbu le mu ekukwa igwe l'ali oku; g'ephe bya agbaa unu ekebe ntau-a l'unu ta adukwa g'unu a-no-beru; unu alakota l'iyi l'ali ono, unu abya ada enyimu Jiordanu eje enworu ono. Unu te ebukwaru iya noo odu; l'e mewaa unu; unu echihu. ²⁷Ozo bu le Chipfu a-chikashi unu g'unu dzuru ohamoha; l'o buru nwa ndu habe nwahabe l'a-wafu l'ohamoha ono, Chipfu a-chiru unu laa ono. ²⁸Eka ono be unu a-baru agwa, nemadzu gude eka mee eja; mbu iphe, bu mkpuma; yee mkpurukpu oshi be o bu. Iphe, ta aphudu uzo; ophu onodu iphe le nchi; ophu oorijedu nri; teme ophu onodu ishishi iphe. ²⁹Ole unu -nodu l'eka ono choo Chipfu, bu Chileke unu be unu a-chotakwa iya-a; m'o buru l'unu gude obu unu g'o ha; me ndzu unu g'o ha gude choo ya. ³⁰Teke unu jeahaaru iphe-ehuka ono; mbu teke iphemiphe-a nwukotaru kpua unu be o -be l'ikpazu iya be unu a-dakobe woru iphu ghaaru Chipfu, bu Chileke unu; bya emeahaa opfu iya. ³¹Eshinu Chipfu, bu Chileke unu bu Chileke, aphuje obu-imemini; be o to jikakwa unu; ophu oomebyishikwa unu; ophu oozohakwa oghandzu ono, yele nna unu oche phe gbaru ono, bu ophu o riru angu yeru phe.”

Abubu, Chipfu bu Chileke

32 “Mbù-a; unu gbeeshikwa nta-a kpaá ishi iphe, meru lẹ teke k'azú; tẹme a nwuá unu; mbù e -shi teke Chileke meru nemadzú lẹ mgboko. Unu kpaeshikwa ishi jeye l'ẹka imigwe beru; alì beru; g'unu maeshikwaru mẹ iphe, paberu ẹka ẹgube-a mejewaru; ọzoo l'a nūmajewaru ẹtu iya. 33 Ọ dūru ndu ọzo, nūmajewaru ẹka Chileke gbẹ l'ọku epfu opfu; g'unu nūmaru-a; mechaa nọdu ndzú? 34 Tọo ọ? dūru agwa, tujjeru ama anafutaru onwiya ọha, nọ l'ẹka ndu ọhozo? Mbù-a gude ọhutama; waa iphe-ọhumalenya; waa iphe, dū biribiri; waa ọgu; gude ike mẹ agburehu iya; yẹe oke n-ye-mebvu; ẹgube ono, Chipfu, bu Chileke unu meru unu l'alì ndu Ijiputu; unu gude ẹnya unu hūma ono? 35 E goshiru unu iphe ono; k'ọphu unu a-maru l'ọo Chipfu bu Chileke; l'ọ tọ duedu Chileke ọzo, dū nū. 36 Ọ gbẹ l'imigwe mee g'unu nūma olu iya; shi nno lọo unu ẹka lẹ nchì. O goshi unu ọ-ta-pfupfupfu ọku iya l'eliphe; unu nūma olu-opfu, ọ gbẹ l'ime ọku ono epfu. 37 Ọo kele o yeru nna unu oche phẹ obu; họtá oshilọkpa phe; meru g'ọ gu-de yẹbedua l'onwiya gude ọkpukpu-ike iya dufuta unu l'alì Ijiputu; 38 bya achifuru unu ọhozo, kagbaa unu shii; ka unu ọkphehu; bya edubata unu l'alì phẹ ono; woru iya nū unu g'ọ buri okiphe unu, buni iya bu g'ọ dū ntanu-a. 39 Ọo ya bu l'iphe, unu a-maru ntanu-a; l'ọ dukwapho unu l'ọkpoma bu l'ọo Chipfu bu Chileke l'imigwe ọphu nọ ephekerephe; bya aburu iya l'eli alì ọphu nọ iya lẹ mkpula; l'ọ tọ duedu Chileke ọzo. 40 Ọo ya bu lẹ-a; unu tsojekwa iphe, ọ toru ọkpa iya sù g'e tsoje; unu emejkwapho ekemu ya ono, bu ekemu, mu aturu unu ntanu-a. Ọo ya bu g'iphe aduru unu lẹ ree; duru unwu unu m'unu nọchaa laa; waa k'ọphu ndzú unu a-dū ogologo l'alì ono, Chipfu, bu Chileke unu abya unu anunu g'ọ buri k'unu jasú l'ojejeje ono.”

Mkpukpu, onye gburu nemadzú

a-nọduje ezeru ndzú

(*Ọgú 35:9-34; Dit 19:1-13; Jios 20:1-9*)

41 Ọo ya bu; Mosisu kpafu mkpukpu ẹto dobe iche l'uzo ẹnyanwu-awawa ẹnymu Jiọdanu; 42 ẹka onye gburu nemadzú ibiya; ẹbe o lekebeduru ẹnya; a-gbajeru laa; m'ọ budu l'onye ono dujehawaru onye obu ashi. G'onye dū nno gbaru laa lẹ mkpukpu lanu l'ime mkpukpu ẹto ono je anodu; zeeru ndzú iya. 43 Epha mkpukpu ono bu: Beza, nọ l'echiegu, dabyiru baswaa. Ono bu ẹka oshilọkpa Rúbenu a-gbajeru laa. Mkpukpu ọzo buri Ramatu, nọ l'alì Giladu; bu ẹka oshilọkpa Gadu a-gbajeru laa. Ọzo buri Golanu; nọ l'alì Beshanu, bu iya bu ẹka oshilọkpa Manáse a-gbajeru laa.

Mosisu eme g'ekemu doo ẹnya

44 Ọwaa bu ekemu, Mosisu turu doberu ndu Ízurelu. 45 Ọwaa buri iphe, Chipfu turu l'ekemu; bya aburu iphe, ọ toru ọkpa iya sù g'e tsoje;

waa iphe, ọ sūru g'e meje; mbụ iphe Mósísu pfushikọtaru nū ụnwu Ízuru ẹlẹ g'ẹphe shichaa l'alí Ijiputu wụfuta; ⁴⁶mbụ teke ẹphe nọ ẹ nsụda, nọ ẹ mgboru mkpukpu Betu-Peyo, l'uzo ẹnyanwu-awawa ẹnyimu Jíódanu; l'alí Sihonu, eze ndu Amoru, bụ onye shi buru ẹ mkpukpu Heshibonu, bụ onye ono, Mósísu yẹle ndu Ízuru l'wụ-gburu g'ẹphe shi l'alí Ijiputu wụfuta ono. ⁴⁷Ẹphe nworu alí Sihonu ono; yẹe alí Ogu, bụ eze ndu Beshanu. Ndu eze labo ono bụ ndu eze ndu Amoru, shi buru l'uzo ẹnyanwu-awawa ẹnyimu Jíódanu. ⁴⁸Alí ono gbẹ ẹ mkpukpu Arowa, nọ l'aguga nsuda nggele Anonu; rwua úbvú Siriyonu, bụ iya bụ úbvú Hamonu. ⁴⁹Nsuda Araba l'ophu l'uzo ẹnyanwu-awawa Jíódanu; gbiriri jasụ l'eze-ẹnyimu nsuda Araba; mbụ gbazeta l'úbvú Pisiga tuko yikotaru iya.

Ekemu iri

(Awu 20:1-17)

5 ¹Tobudu iya bụ; Mósísu bya ekukọbe ndu Ízuru ẹlẹ g'ẹphe ha bya asụ phe-a: “Unubẹ ndu Ízuru; unu nūmakwa iphe, Chipfu toru okpa iya sụ g'e tsoje; yẹe iphe, ọ sūru g'e meje, mu epfu eye unu ẹ nchị ntanu-a. Unu nwua ya onwu-ekwo; unu edobe iya edobe; eme iya ememe. ²Chipfu, bụ Chileke anyi bẹ mekwaru; anyi l'iya gbaa ndzụ l'úbvú Horebu. ³Ọ tọ bukwa nna anyi oche phe bẹ ẹphe ẹ Chipfu gbaru ndzụ obu; ọ kwa anyịbedua; mbụ g'anyi hakota, bụ ndu nọ ndzụ l'eka-a ntanu-a. ⁴Chipfu gbekwa l'ime oku pfuru opfu nū unu l'iphu l'iphu l'eli úbvú. ⁵Teke ono bẹ mu pfuru ẹ mgbaka unu ẹ Chipfu; epfuru unu iphe, Chipfu pfuru; noo kele ndzụ oku ono agu unu; ophu unu enyihuduru úbvú ono. Iphe, o pfuru bụ:

⁶“Ọ kwa mbẹdua bụ Chipfu, bụ Chileke unu, bụ onye dufutaru unu l'alí Ijiputu; mbụ l'alí ẹka ono, unu shi buru ohu ono.

⁷“Ta adukwa iphe ozo, ii-bajeru aja; gbahaa mbẹdua.

⁸“G'ọ tọ dukwa ntekpe, ii-metaje dobe; mbụ iphe, dukpoo g'iphe, du l'imigwe l'ephekerephe; ozo iphe, nọ l'eli alí ẹ mkpula igwe; ozo iphe, bu ẹ mini-ime alí. ⁹Ta abajekwaru phe aja; ophu i jekwaru phe ozi; kele mbẹdua, bụ Chipfu; bya aburu Chileke ngu bukwa Chileke, l'ekoje okophoo. Mu ahujekwa ndu kporu mu ashị ahuhù k'ejo-iphe, ẹphe meru mu; huchaa me unwu phe; hürwuchaa ya ogbo k'eto me k'eno. ¹⁰Mu nọdu aphujekwanu obu-imemini l'ehu unu-kuru-unu ndu yeru mu obu bya edobe ekemu mu.

¹¹“Te ekujekwa ẹpha Chipfu, bụ Chileke ngu ke mmanu; kele onye eku ẹpha Chipfu ke mmanu bẹ ọ tọo hakwa g'ọ tọ nma iya ikpe.

¹²“Dobekwa eswe-atuta-unme nsọ, bụ iya bụ iphe, Chipfu, bụ Chileke ngu sūru g'i meje. ¹³Ọo ujiku ishii bẹ ii-seje akanya; jekota ozi ngu g'ọ ha. ¹⁴Obenu l'abalí k'esaa bụ eswe-atuta-unme ke Chipfu, bụ Chileke ngu. G'ọ tọ dukwa ozi, ii-je mboku ono. Te ejekwa ozi; ophu nwa ngu nwoke

ejekwa; ophu nwa ngu nwanyi ejekwa; ophu onye nwoke, i gbaru ohu ejekwa; ophu onye nwanyi, i gbaru ohu ejekwa; ophu oke-eswi ngu ejekwa; ophu nkafu-igara ngu ejekwa; ophu o dukwa iphe-edobe ngu ophu e-je nu; ophu onye byaru abyabya, no l'ibe ngu ejekwa; g'onye nwoke, i gbaru ohu; yee onye nwanyi, i gbaru ohu tutakwa unme g'ituta. ¹⁵ Temē; nyatakwa l'i shi buru ohu l'alī Ijiputu; l'oo Chipfu, bu Chileke ngu gude ike; me agburehu iya dufuta ngu l'eka ono. Noo g'o gude Chipfu, bu Chileke ngu nodu aturu ngu iya l'ekemu su g'i tutajekwa unme l'eswe-atuta-unme.

¹⁶ “ Kwabejekwa nna ngu yee ne ngu ubvu, bu iya bu iphe ono, Chipfu, bu Chileke ngu suru g'i meje ono-a; k'ophu ii-noriberu ndu; me k'ophu iphe a-duru ngu le ree l'alī ono, Chipfu, bu Chileke ngu abya ngu anunu ono.

¹⁷ “ Te egbujekwa ochi.

¹⁸ “ Ophu i rijekwa ogori.

¹⁹ “ Ophu i zijekwa iphuru.

²⁰ “ Ophu i gbajekwa nwibe ngu ekebe ntuphu-ire.

²¹ “ Ophu nyee nwibe ngu agujekwa ngu. Ophu ulo nwibe ngu; ozoo ali iya; ozoo ndu o gbaru ohu; ozoo oke-eswi iya; ozoo nkafu-igara iya; ozoo iphe, bukpo iphe, nwibe ngu nweru enweru adujekwa ngu g'a su l'oo ngu nwe iya.’

²² “ Ono bu opfu, Chipfu gbē l'ime oku raa arara ye unu le nchi l'eli ubvu l'eka unu dzuru edzudu. Mbū l'ubvu ono, urwukpu yee ochii sopyaberu ono. O to dudu iphe ozo, o yekoberu iya. O woru iya dee l'eli mkpuma labo, du bachibachi nu mu ono.”

Ndu agu ndu Izuru

l'ubvu Sayinayi

(Awu 20:18-21)

²³ “ Tobudu iya bu; o be g'unu numaru olu ono, gbē l'ime ochii epfu anu unu ono; kele oku ono bu l'eli ubvu ono be ootsu; iphe, bukpo ndu-ishi l'okpa-ipfu l'okpa-ipfu unu; yee ndu bu ogerenya unu wu-pfuta mu. ²⁴ Unu bya asu mu: 'Nta be Chipfu, bu Chileke anyi goshiwaru anyi akpabiri iya; waa g'o habe shii. Temē anyi numakwapho olu-opfu iya, o gbē l'ime oku ono epfu. Ntanu-a be anyi humawaru le Chileke pfuru opfu yeru nemadzu; o noduele-a ndu. ²⁵ Ole nta-a; ?bu g'anyi nwushihu too? Kele ejo oku-a l'e-kegbushikwa anyi; mbu l'anyi -numabaa olu Chipfu, bu Chileke anyi ozobaa be anyi a-nwuhukwa. ²⁶ Noo kele o to dudu nemadzu mmanu numajewaru aka Chileke, dzu ndu; gbē l'oku epfu opfu; g'anyi numaru iya-a; mechaa dzuru ndu-a.' ²⁷ Unu su mu ge mu jekubechia Chipfu, bu Chileke anyi ntse; je anumakota iphemiphe, oopfu. E -mechaa; mu abyawaro bya akooru unu iphe, Chipfu, bu Chileke anyi pfuru. L'unu angabe-a nchi; mee iphe, o pfuru.

28 “Tòbudu iya bụ; Chipfu bya anụma iphe, unu epfu teke ono, unu epfu eyeru mu ono; bya asụ mu: ‘Mu nụmakotaru iphe, ndu ono pfuru ngu. Iphemiphe, ephe pfuru dukwa ree. 29 Ome l’oò kẹ g’obu pẹ dụwaro g’ò dọ-a je asuru; mbụ g’ephe tsuje mu ebvu; dobe iphemiphe, mu tọru l’ekemu; mẹ iphe adukwaru pẹ lẹ ree; yẹ ụnwu pẹ jasụ l’ojeje! 30 Tugba; je asụ pẹ g’ephe laphuchawarọ azụ l’ulo-ekwa pẹ. 31 Ole gẹ gubedua nọ-kubekwa mu l’eka-a; k’ophu mu a-kọru ngu iphemiphe, mu tọru l’ekemu; yẹ iphe, mu tọru okpa iya sụ g’e tsoje; yẹ iphe, mu sọru g’e meje; bụ iphe, ii-zi pẹ g’ephe meje l’alị ono, mu abya pẹ anụ g’ephe nworu ono.’

32 “Oo ya bụ; unu kwabekwa ẹnya; meje iphe, Chipfu, bụ Chileke unu sọru g’unu meje. Unu ta ahakwa iya; meahaa iphe ozo. 33 Unu tukojekwa ụzo ono shije; mbụ ụzo ono, Chipfu, bụ Chileke unu sọru g’unu shije ono; k’ophu unu a-nọdu ndzụ; waa k’ophu iphe aduru unu lẹ ree; wafua k’ophu unu a-karọ nka l’alị ono, unu e-nworu ono.”

Iphe, a tọ-doru ekemu obu

6 1 “Owaa bugbaa iphe, Chipfu tọru l’ekemu; waa iphe, o tọru okpa iya sụ g’e tsoje; waa iphe, o sọru g’e meje, bụ ophu Chipfu, bụ Chileke unu sọru gẹ mu zia unu g’unu meje l’alị ono, unu adagha ẹnymu Jiódanu eje enworu ono; 2 mbụ k’ophu unubedua; mẹ ụnwu unu; mẹ ụnwu nwanwa unu a-nọ atụ Chipfu, bụ Chileke unu ebvu; emeje iphe, o tọru okpa iya sụ g’e tsoje; waa iphe, o tọru l’ekemu, bụ iphe, mu epfuru unu g’unu meje jasụ g’unu a-nọ-beru; k’ophu unu a-ka nka. 3 Unubẹ ndu Ízurelu; unu ngabẹ nchị. Unu letakwa ẹnya mee iphemiphe ono; k’ophu iphe a-duru unu lẹ ree; tẹme unu ajaa àjàjà ka l’otu l’alị ono, bụ alị, mini ẹra-eswi yẹ manụ-ẹnwu asọ gẹ mini ono, bụ iya bụ iphe, Chipfu, bụ Chileke nna unu pẹ kweru unu ukwe iya.

4 “Unubẹ ndu Ízurelu; unu nụmakwa iya: Chipfu, bụ Chileke anyi bụ-kwa Chileke lanụ bẹ o bụ. 5 Oo ya bụ g’unu gude obu unu g’o ha; yẹ ndzụ unu g’o ha; waa ike unu g’o ha ye Chipfu, bụ Chileke unu obu. 6 G’ekemu-a, mu aturu unu ntanụ-a bukwaru unu eburu l’okpoma. 7 Unu zijekwa iya unwegirima unu okpobe ezizi. Unu egude iya abọ l’uja mẹ unu nọdu anọ l’oma ụlo unu; mẹ teke unu eje ije lẹ gbororo; mẹ teke unu zẹ azẹ; mēkpoo teke unu pfuru apfuru. 8 Unu gbajeru iya l’eka g’o bụru iphe-ohubama; unu epfubeje iya l’onu-iphu; k’ophu unu a-nyatajẹ iya. 9 Unu dee ya edede l’okpa mgbo ụlo unu; wafua l’oguzo ibe unu.

10 “K’ophu bụ lẹ-a; teke Chipfu, bụ Chileke unu dubataerupho unu l’alị ono, o riru angụ lẹ ya a-nụ nna unu oche pẹ, bụ Ébirihamu; waa Áyizaku; waa Jiékoju ono; mbụ eze mkpukpu lẹ mkpukpu ono, dugbaa ree, abudu unu kpuru iya l’onwunu ono; 11 nukwapho unu ụlo, bugbaa iphe, dọ ree jiru iya; iphe, abudu unu kwaru iya ye l’ulo obu; nụ unu omi-mini ono, abudu unu tọru iya ono; nụ unu opfu-vayinu; yẹ oshi olivu, abudu

unu yegbaarun iya ono; teke ono, unu a-nõdu eri nri eriji epho ono; ¹² unu kwabekwa enya; g'unu ta azõha Chipfu, bu iya dufutaru unu l'alì Ijiputu ono, bu eka ono, unu shi buru ohu ono. ¹³ Unu tsuje Chipfu, bu Chileke unu ebvu. Unu jejeru iya ozi. Unu egudeje epha iya eri angu. ¹⁴ Unu te etsokwaru agwa ozogba; mbu agwa ndu ono, bupheru unu mgburugburu ono. ¹⁵ Odumeka be ehu-eghu Chipfu, bu Chileke unu a-dapfutakwa unu; mebyia unu; mee unu; unu achihu l'eliphe-a; kele Chipfu, bu Chileke unu bukwa Chileke, l'eko okophoo.

¹⁶ "Unu ta ahukwa Chipfu, bu Chileke unu ama; egube ono, unu huru iya ya le Masa. ¹⁷ Unu tubekwa nvo; huma l'unu emeje iphemiphe, Chipfu, bu Chileke unu suru g'unu meje; me iphe, o toru l'ekemu; yee iphe, o toru okpa iya su g'e tsoje. ¹⁸ G'iphe, unu e-meje bukwaru iphe, pfuru namunha bya aburu iphe, du ree lenya Chipfu; k'ophu iphe a-duru unu le ree; waa k'ophu unu a-du ike bahu je enworu eguru ali ono, bu ophu Chipfu rifuru nna unu oche phe angu iya; ¹⁹ su le ya a-chifukotaru unu ndu ohogu unu phe g'ephe lufu unu l'iphu, bu iya bu ge Chipfu pfuru iya.

²⁰ "Teke o beru l'iphu; unwu unu -jia unu su: '?Bu gunu be o bu; mbu iphe, Chipfu, bu Chileke anyi toru l'ekemu-a; yee iphe, o toru okpa iya su g'e tsoje-a; waa iphe, o suru g'e meje-a?'" ²¹ Iphe, unu e-pfuru unwu unu ono bu l'unu shi buru ohu Fero l'alì Ijiputu; Chipfu gude okpemu, du iya leka dufuta unu. ²² Temu unu gude enya unu huma iphe-ohumalenya; waa oke iphe, daru kpaakpaa, Chipfu meru kpua ali Ijiputu; yee Fero; waa ndu ali iya l'ophu. ²³ Lo dufutaru unu leka ono; bya anu unu ali ono, o kweru nna unu oche phe ukwe iya; bya eriru angu yeru phe iya ono; ²⁴ bya asu unu g'unu tsokotaje iphe-a, o toru okpa iya su g'e tsoje-a; temu unu atsujekwaphe Chipfu, bu Chileke unu ebvu; g'iphe aduru unu le ree; wafua g'unu akaa nka; bunu iya bu g'o du ntanu-a. ²⁵ Lo -buru l'unu kwaberu enya; dobekota iphe, bukpo ekemu-a l'ataphu Chipfu, bu Chileke unu, bu iya bu iphe, o suru g'unu meje-a; be unu bukwaa ndu pfubere-koto l'iphu iya."

Ndibe Chipfu

(Awu 34:11-16)

7 ¹ "Teke Chipfu, bu Chileke unu durwutaerupho unu ali ono, unu eje enworu ono; bya achishierupho unu ikpoto oha ono; mbu ndu Hetu; waa ndu Gigashi; waa ndu Amoru; waa ndu Kenanu; waa ndu Perezu; waa ndu Hevu; wakwaphe ndu Jiebusu; ohamoha esaa, kachaa unu shii; bya akachaa unu okpemu ono; ² mbu-a; teke Chipfu, bu Chileke unu -woeru phe pho ye unu leka; unu gbushikotakwa phe; unu tukokwaphe mebyishibebe. G'unu l'ephe ta agbakwa ndzu; ophu unu aphukwaru phe obu-imemini. ³ G'unu l'ephe te kegbakwaru nwanji. Unu te ekukwaru unwada unu kee unwu phe; ophu unu alutajekwa unwada phe. ⁴ Noo kele

ɛphe e-mekwa unwu unu ono; ɛphe ahaa ya etsotso; je awata ejeru agwa ɔzogba ozi. Noo teke unu e-me; ɛhu eghuahaa Chileke eghu; l'oomee unu; unu achihu nchihu lanu. ⁵Waa iphe, unu e-me phe bu ɔwa-a: Unu tuko ɔru-ngweja phe mebyishikotachaa; unu etsukpoşichaa mkpuma, ɛphe doberu nso; unu atuko itso Ashera phe gbutsushia; woru ntekpe phe l'ophu kpokota oku. ⁶Noo kele unu bu oha, duru Chipfu, bu Chileke unu nso. Mbù le Chipfu, bu Chileke unu hotawaru unu g'unu buru oha, o doberu iche g'o buru nkiya. O doberu unu; unu no-ngoo iphe, bu ndu nokota l'eliphe l'ophu.

⁷"Iphe, kparu iphe, unu du Chipfu l'obu; o hota unu ta abukwa l'unu ka ndu ozo igwerigwe; g'o gbè buru unu be kachaa nwanshijì le ndiphe l'ophu-a. ⁸Ochia l'oo le Chipfu yeru unu obu; waa kele iphe ono, o rifu-ru angu iya l'iphe nna oche unu phe le ya e-meru unu ono be o mefutaje; meru g'o gude Chipfu gude okpehu, du iya l'eka dufuta unu; bya agbafuta unu l'eka ono, unu shi buru ohu ono; mbù l'eka Fero, bu eze ndu Ijiputu. ⁹Oo ya bu le-a; makwaru le Chipfu, bu Chileke ngu bukwa Chileke; mbù Chileke, apfushije ike l'iphe, o kweru ukwe iya; buru Chileke, edobeje oğbandzu, yee ndu yeru iya obu gbaru; teme o nodu egoshije phe lo yeru phe obu; mbù ndu ono, yeru iya obu bya emeje iphe, o suru phe g'e meje. Iphe ono be oomeje unu-kuru-unu oğbo. ¹⁰O nodu apfuje ndu kporu iya ashì ugwo l'iphe phe; mbù l'oomeje; ɛphe aburu mkpurupyata. Mbù-a; ndu kporu iya ashì be o to kpokwa upfu emelata. ¹¹Oo ya bu le-a; unu kwabekwa enya mejekwa iphe, Chipfu turu l'ekemu; unu etsoje iphe, o toru okpa iya su g'e tsoje; waa iphe, o suru g'e meje; ge mu aturu iya unu ntanu-a."

Obunggo, ee-bu onye emeje iphe,

a suru g'o mee

(Uke 26:1-13; Dit 28:1-14)

¹²"Su-a; o -buru l'unu ngaberu nchi l'ekemu-a; unu dobe iya; eme iya ememe; be Chipfu, bu Chileke unu e-dobekwa oğbandzu iya ono; yee n-yemobu iya ono, bu ophu o riburu nna oche unu phe angu l'oo-me. ¹³Oo-ye unu obu; kebe unu l'oma; l'o mee unu; unu adu igwerigwe. L'o gokwarupho onu-oma nu unwu unu; waa iphe, unu meberu l'ali; mbù ereshi unu; me mee unu; me manu unu; mee geswi unu; yee aturu unu; waa eghu unu nodu azu azuzu l'ali ono, o riburu nna unu oche phe angu le ya a-nu unu ono. ¹⁴G'oo-shi kebe unu l'oma a-kachaa ke ndu ozo shii. O to dudu nwoke, te eyedu ime; ozoo nwanyi, ta atsudu ime, byaru adu l'echilabo unu; ophu o dudu l'iphe-edobe unu. ¹⁵Ozo bu le Chipfu a-tuko iphe-ememe wofu l'ehu unu; ophu o dudu ejo o-me-l'ehu ndu Ijiputu ono, unu maru ono me nanu, o byaru ekwe g'o mee unu. Oo ndu unu du ashì be oo-gude iya dafu. ¹⁶Unu tukokwa ndu ono, Chipfu, bu Chileke unu

abya unu eye l'eka ono gbushia. Unu ta aphujekwaru phe obu-imemini; ophu unu ejejekwaru agwa phe ozi; kele ono a-bukwaru onya be a gbaɓe-ru unu.

¹⁷“Unu a-gɓekwaro su: ‘Ohamoha-a kagbakwa anyi okpehu. ?Denu g'anyi e-shi lwa phe?’ ¹⁸Obenu le-a; unu ta atsukwa phe ebvu. Unu nyatakwa iphe, Chipfu, bu Chileke unu meru Fero; yee ndu Ijiputu l'ophu. ¹⁹Unu gude enya unu ebo ebo huma oke oputama; waa iphe-ohumalenya; waa iphe, dugbaa biribiri, Chipfu, bu Chileke unu gude ike; me agburehu iya dufuta unu. Noo ge Chipfu, bu Chileke unu e-me iphe, bukpuo ndu ono, unu atsɔ ebvu ono bu ono. ²⁰Ozo bu le Chipfu, bu Chileke unu l'e-ye evu g'o je adatsu phe; gbagbushiaha phe gbiriri jasɔ teke oo-gbagbushibe-be mecha ndu ophu nahuru unu je edomia onwophe. ²¹G'ephe be yekwa unu ebvu; kele Chipfu, bu Chileke unu nokwa l'echilabo unu; mbu Chileke ono, paru eka bya aburu onye aatsɔ ebvu ono. ²²Chipfu, bu Chileke unu a-to nwehu chishiaru unu ohamoha ono, no-chiru unu uzo ono. Unu ta adukwa ike erwushikota phe mgbo lanu; odumeka be ejo anu-egbudu a-pakwa eka l'echilabo unu. ²³Obenu le Chipfu, bu Chileke unu e-wokwanuru phe ye unu l'eka. Oo-meje g'utsu daa l'echilabo phe jasɔ unu atuko phe gbushichaa. ²⁴Oo-tuko ndu eze phe g'ephe ha yekota unu l'eka; unu emee g'epha phe chihu le mkpula akpaminigwe-a. O to dudu onye adu ike apfuru g'unu l'iya mee jasɔ teke unu e-mebyishibe phe g'ephe ha. ²⁵Nteke agwa phe be unu a-kpo oku. Ge mkpola-ochaa; ozoo mkpola-ododo, a wuru le nteke ono ta agujekwa unu agugu ophu. Ophu unu ewotajekwa iya nworu enworu; odumeka be oo-bukwaru onya nmata unu; kele o bukwa eme ahuma l'ehu Chipfu, bu Chileke unu. ²⁶Ophu unu ewobatajekwa ejo ahuma ono l'ulo unu; a nonyakwa unu buru ndu a turu onu g'ephe bu-a. Ochia iphe, unu e-me bu g'unu kpokotaje iya ashɔ; unu asokota iya oyi; noo kele o bu iphe, a turu onu.”

Ta azohakwa Chipfu

8 ¹“Unu kwabekwa enya tsoru ekemu-a, mu aturu unu ntanu-a; k'ophu unu a-nodu ndzu jaa ajaja ka l'otu; jekwapho enworu ali ono, Chipfu kweru nna unu oche phe ukwe iya; bya eriru angu yeru phe iya ono. ²Unu nyatakwa ge Chipfu, bu Chileke unu gude dua unu ukporo apha labo l'echiegu; gude nno go-zeta unu; hukwaapho unu ama; ge ya maru iphe, du unu l'obu; mbu ge ya maru; ?me unu e-meje-a ekemu iya; to unu te emedu? ³O go-zetaru unu mee g'egu gua unu; bya anu-a unu mana, bu nri unu amahadaa; ophu nna unu oche phe amadu iya; k'ophu unu a-maru l'o to budu nri kpurumu be amadu e-gudeje nodu ndzu. Iphe, amadu e-gude nodu ndzu bu iphe, bukpuo opfu, shi Chipfu l'onu. ⁴Lime ukporo apha labo ono be uwe unu akahuduru; ophu okpa abyaduru unu erwa. ⁵Oo ya bu g'o dokwaa unu enya ree; l'oo g'amadu ahije nwa iya

ahùhù-a bụ ọ́ Chipfu, bụ Chileke unu ahùje unu. ⁶Noo g'ọ́ gude unu jee edobe ekemu Chipfu, bụ Chileke unu; tsoje ụ́zo iya; tsùje iya ebvu; 7kẹ́le Chipfu, bụ Chileke unu edu unu ala l'alì, dụ ree; alì, mini, shi l'ime alì anwù shòkoshoko; tẹ́me nggele nọ́du asọ́ iya gborogboro. ⁸Mbụ alì, witi; mẹ́ balì; mẹ́ vayìnu; mẹ́ oshi figu; mẹ́ oshi itorokuma jiru ejiji; mbụ alì, oshi olivu; mẹ́ manụ́-ẹnwu jiru ejiji. ⁹Ọ́ bụ alì, ụ́ko nri ta abyadụ́ aduru unu; ọ́phu ọ́ dudu mẹ́ iphe lanụ́, ụ́ko iya, bya aduru unu l'alì ono. Mkpu-ma, nọ́ iya nù bụ́kota mkpùrukpu-ígwè; tẹ́me úbvú úbvú, nọ́gbaa ya nù bẹ́ unu a-nọ́du ebvutajẹ́ onyirubvu. ¹⁰Teke unu richaarú nri; ẹ́pho ji unu; unu tujekwa Chipfu, bụ Chileke unu ẹ́pha k'ẹ́guru alì ono, ọ́ nùru unu ono.

¹¹“Unu kwabẹ́kwa ẹ́nya g'unu ta azọ́ha Chipfu, bụ Chileke unu; mbụ́ g'unu ta aha emeje ekemu iya; yẹ́e iphe, ọ́ sùru g'e meje; yẹ́e iphe, ọ́ toru ọ́kpa iya sù g'e tsoje, bụ́ iya bụ́ ekemu ono, mu aturu unu ntanụ́ ono. ¹²Unu kwabẹ́kwa ẹ́nya g'ọ́ tọ́ bụ́; unu -rijeẹ́pho nri rijihaa ẹ́pho; bya awata akpùshi ụ́lo, dụ́gbaa ree buru l'ime iya; ¹³eswi unu yẹ́e aturu unu; mẹ́ egbu unu -wataẹ́pho azùshi; mkpọ́la-ọ́chaa unu; mẹ́ mkpọ́la-ododo; mẹ́waro iphemiphe, unu nweru enweru bya adụ́ephe shii; ¹⁴unu eworu ọ́kpoma kpọ́-vube; zọ́haa Chipfu, bụ Chileke unu, bụ́ iya dufutaru unu l'alì Ijiputu ono; mbụ́ l'ẹ́ka ono, unu shi bụ́ru ohu ono. ¹⁵Mbụ́ onye ono, duru unu ghakọ́ta echiẹ́gu ono, parụ́ ẹ́ka bya eye ebvu ono; ẹ́ka ejo-agwọ́ dụ́gbaa; akpì dụ́ iya; tẹ́me ọ́ kpọ́hu nkù; ọ́phu mini adudu iya; ọ́ bụ́ru lẹ́ mkpuma, kpọ́ru jegengu bẹ́ o shi ekufutajẹ́ru unu mini. ¹⁶Mbụ́ onye bụ́ iya nùru unu mana l'echiẹ́gu, bụ́ nri, nna unu oche phẹ́ amadụ́. Ọ́ bụ́ru iphe, kparụ́ iya nù bụ́ l'ooome g'ọ́ gọ́-zeta unu; hụ́a unu ama; meeru unu ree l'ikpazụ́ iya. ¹⁷Unu ta asụ́nupho l'ime obu unu: ‘Ọ́ kwa ike unu; waa ike ẹ́ka unu bẹ́ unu gude kpatakọ́ta ẹ́ku-a.’ ¹⁸Obenu lẹ́-a; unu nyatajẹ́kwa Chipfu, bụ Chileke unu; kẹ́le ọ́o yẹ́bedua nùru unu ike, unu gude akpa ẹ́ku ọ́bu; k'ọ́phu oo-me g'ọ́gbandzu ono keru, bụ́ ọ́phu o riru nna unu oche phẹ́ anụ́ iya ono; egube ọ́ dụ́ ntanụ́-a. ¹⁹Ọ́ -bụ́kwanuru l'unu zọ́haru Chipfu, bụ Chileke unu ililekpọ́o; bya awata etso agwa; jeahaarụ́ phẹ́ ozi; baaharụ́ phẹ́ ẹ́ja bẹ́ mu agbakwarụ́ unu ama ntanụ́-a sù: L'ọ́ tọ́ dükwa iphe, e-me g'unu ta laẹ́be l'iyi. ²⁰Ọ́ kwa g'ọ́hamoha ono, Chipfu nọ́ l'iphu unu mebyishia ono lakọ́taru l'iyi bụ́ g'unu a-lakọ́ta l'iyi; m'ọ́ -bụ́ru l'unu te emeduru olu Chipfu, bụ Chileke unu.”

Ekwefu ike ndu Ízurelú

9 ¹“Unubẹ́ ndu Ízurelú; unu gebekwaphọ́. Ọ́ kwa ntanụ́-a bẹ́ unu abya adaghata ẹ́nyimu Jiódanu; g'unu je enworu ọ́hamoha, kakọ́ta unu shii; bya akakọ́ta unu ọ́kphehu; mkpùkpu lẹ́ mkpùkpu, kagbaa unu shii; tẹ́me e gudegbaa igbulọ́, sù-pfuru l'imigwe kpù-phée ya mgburugburu. ²Mbụ́ ndu parụ́ ẹ́ka bya ahagbaa kẹ́ phengara phengara; mbụ́ ndu Anaku,

bụ ndu unu maru amaru; ịme unu ọdu anụmajewaa etu, aanmajẹ sụ: 'Bụ onye sụru akpafu unwu Anaku l'iphu?' ³Ole o bụ; g'o dokwaa unu ẹnya ntanu-a l'ọo Chipfu, bụ Chileke unu bụ onye e-vutaru unu ụzo g'ọku, enwu enwunwu. Oo-mebyishi pẹ; bya akapyabẹ pẹ l'iphu unu; k'ọphu unu a-chifu pẹ ẹgwegwa; mee; ẹphe aburu mkpurupyata; bụ iphe, Chipfu kweru unu ukwe iya.

⁴"Teke Chipfu, bụ Chileke unu chifuchaeru pẹ pho l'iphu unu; unu ta awatakwa ari l'ime ọkpoma unu sụ: 'O kwa l'ọo l'unu pfulerekoto meru g'o gude Chipfu dubata unu g'unu bya enworu ali-a.' Waawakwa; iphe, Chipfu gude achifu pẹ l'iphu unu bukwa l'ohamoha ono menukaru ejo-ipe. ⁵O to bukwa ke l'unu pfulerekoto; ọzoo l'obu unu guru iphoro meru g'o gude unu ọdu eje enworu ali pẹ. O buchia l'oha ono wenukaru iwashi meru g'o gude Chipfu, bụ Chileke unu ọdu achifu pẹ l'iphu unu; wafu k'ọphu oo-me iphe ono, o riru nna unu oche pẹ angu iya ono; mbu Ebirihamu; waa Ayizaku; me Jieko. ⁶Oo ya bụ; g'o dokwaa unu ẹnya l'ọ to budo l'ọo l'unu pfulerekoto meru g'o gude Chipfu, bụ Chileke unu nu unu ẹguru ali-a g'unu nworu; kele unubedua bukwa ndu ejo-okpoma."

Nweswi, a kpuru akpukpu

⁷"Unu nyatakwa iphe-a; mbu-a; unu ba azohakwa g'unu gude kpatsua Chipfu, bụ Chileke unu oke ehu-eghu l'echiegu. A -gbẹ le mboku ono, unu gbeshiru l'ali Ijiputu ono; jasụ unu byarwuta eka-a be unu shiepho kwefutaru Chipfu ike. ⁸L'ubvu Horebu be unu kpatsukwarupho Chipfu oke ehu-eghu iya. Ehu ghutabe Chipfu eghu; k'ọphu o gogo mebyishi unu. ⁹Teke mu nyihuru ubvu je anata mkpuma, du bachibachi ono; mbu mkpuma ogbandzu, unu le Chipfu gbaru ono; be mu noru l'eli ubvu ono ukporo abali labo; eswe l'enyashi; ophu mu eriduru nri; ophu mu anguduru mini. ¹⁰Chipfu nu mu mkpuma labo, du bachibachi; mbu mkpuma, bụ Chileke lonwiya gude eka iya dee ya iphe. O buru le mkpuma labo ono be e dekotaru ekemu ono; mbu ekemu ono, Chipfu no l'oku, enwu enwunwu l'eli ubvu tbaru unu g'unu dzukoberu ono. ¹¹Ukporo abali labo; eswe l'enyashi ono buchaepho; Chipfu nu mu mkpuma labo ono; mbu mkpuma ogbandzu ono.

¹²"Tobudu iya bụ; Chipfu sụ mu: 'Gbeshikpodapho; shikwa l'eka-a nyizeta egwegwa; noo kele ndibe ngu-a, i dufutaru l'ali Ijiputu-a merwakwaru onwophe. O to dukwa g'ephe no-bekwaduru; ephe gbakutawa azu l'uzo ono, mu turu pẹ ekemu g'ephe shije ono; bya akputawaru onwophe iphe a kpuru akpukpu.'

¹³"Chipfu bya asukwa mu pho: 'Mu humawaru le ndu-a bunukaru ndu ejo-okpoma eviya! ¹⁴Hakwaa mu ge mu mebyishia pẹ; hufu epha pẹ l'eliphe. Mu -mechaa; mu emee ngu gi buru oha, ka pẹ okpehu; ịme li ka pẹ lotu.'

¹⁵“Tɔ̀budu iya bụ; mu dachi shi l'eli úbvú ono, ọku enwu phoophoo-phoo ono nyizetashia; parụ mkpuma ọgbandzu labo pho, dụ bachibachi pho l'eka. ¹⁶Mu bya elee ẹnya; bya hụma eviya l'unu meswewaru Chipfu, bụ Chileke unu; mbụ l'unu kpụtawaru iphe, a kpuru akpukpu, dụ gẹ nwe-swi doberu onwunu. L'unu gbakutawaru ụzo, Chipfu turu unu ekemu g'unu shia ono azụ; ebe eteke adu g'a nọ-beru. ¹⁷Mu woru mkpuma labo pho, mu pa l'eka pho tukposhia latatiphu unu. ¹⁸Mu byakwa ada kpurumu l'iphu Chipfu ozo; nọo ukporo abali labo; eswe l'enyashi; ọphu mu eriduru nri; ọphu mu angutaduru mini. Ọ bụru iphe, kparụ iya nụ bụ iphe-eji, unu meru l'iphu Chipfu; shi nno kpatsua ya ẹhu-eghu. ¹⁹Ndzu oke ẹhu-eghu Chipfu shiwaawuta mu; noo kele ẹhu ghutabewaru iya egu k'ọphu o shiwaawuta unu emebyishi. Obenu lẹ Chipfu mechaaru ngaberu mu nchị teke ono kwapho. ²⁰Erọnu shikwapho kpatu Chipfu ẹhu-eghu; k'ọphu o shikwapho abya iya emebyishi. Mu pfukwarupho nụ Chipfu l'iswi ẹhu iya. ²¹Mu bya eworu iphe ono, unu gude mee iphe-eji, bụ iya bụ nwe-swi ono, unu kpuru ono woru kpo ọku; bya eworu iya tsukposhia; bya egwee ya; ọ dụ rwukuru rwukuru g'urwuku. Mu woru urwuku iya ono wuru ye lẹ ngele ono, shi l'úbvú asoshi ono.

²²“Unu kpatsukwarupho Chipfu ẹhu-eghu lẹ Tabera; mę lẹ Masa; mękwapho lẹ Kiburotu-Hatava. ²³O be teke Chipfu gbę lẹ Kadeshi-Baneya zia unu; sụ g'unu tugbuwa je alwuta alị ono, ya nuru unu ono; unu kwefu ike jika eme iphe, Chipfu, bụ Chileke unu suru g'unu mee. Unu jika akporu obu ye l'eka ọ nọ; jika eme opfu iya. ²⁴Eshikpo teke mu beberu maru unu bę unu gudepho ekwefuru Chipfu ike byasụ nta-a.

²⁵“Iphe, mu gude daa kpurumu nọdu l'iphu Chipfu ukporo abali labo; eswe l'enyashi pho; bukwa l'ọ lẹ Chipfu suru lẹ ya e-mebyishi unu. ²⁶Mu pfuru nụ Chipfu sụ: ‘Gube Nnajiuphu, bụ Chipfu; jiko te emebyishishinu ndu bụ nkengu; bya aburu okiphe ngu, i gbafutaru l'ike-okpu ngu; bya egude okpehu ngu dufuta l'alị Ijiputu. ²⁷Jiko nyatanu ndu-ozu ngu; mbụ Ebirhamu; waa Ayizaku; waa Jiékopu! Te eleshinu g'ejo-okpoma ndu-a; waa ejo-iphe phe; mę g'iphe-eji phe habe shii! ²⁸Odumeka bę ndu ono, i dufutaru anyi l'alị phe ono a-sukwa l'ọ kwa lẹ Chipfu ta adudu ike eduruw phe alị ono, o kweru phe ukwe iya ono; teme ndu ono dụ iya ashị; meru iphe, o dutaru phe bya egbushia l'echiegu. ²⁹Obenu l'ephę ta adudu ngu ashị; ephę gbęchia buru ndu nkengu; buru okiphe ngu, i gude eze ike ngu; mę agburehu ngu dufuta.’”

Bachibachi mkpuma k'ębo

(Awu 34:1-10)

10 ¹“Ọ bụru teke ono bę Chipfu suru mu: ‘Je awata mkpuma labo, dụ bachibachi gę kę mbụ pho gude nyipfuta mu l'eli úbvú. Teme l'i gudekwapho oshi kuta okpoko. ²Mu e-wota iphe, e shi dee lẹ mkpuma

kẹ mbụ phọ, ì tũkporu phọ dee ya. Lị chĩa iya ẹphenebo yee l'ime okpokoko ono.'

³“Noo ya; mu gude oshi akesha rụta okpokoko ono; bya awata mkpuma labọ, dū gẹ kẹ mbụ phọ. Mu gude mkpuma labọ ono l'ẹka nyihu eli úbvú ono. ⁴Chipfu bya eworu iphe, o shi dee lẹ mbụ phọ; woru depu azụ lẹ mkpuma ono, bụ iya bụ ekemu iri ono, ọ gbẹ l'ime ọku l'eli úbvú mee g'unu madzuru lẹ mbọku ono, unu dzukọberu ono; bya eworu iya nū mu. ⁵Mu bya eshi l'eli úbvú ono nyizeta; woru mkpuma ono ye l'ime okpokoko ono, mu rutaru ono, bụ iya bụ gẹ Chipfu tūru mu ekemu gẹ mu mee ya. Mkpuma ono nọkwa l'ime okpokoko ono nta-a.”

⁶Ndu Ízurelu shi lẹ wẹlu ndu Jiakanu jerwua Moserotu. Ọ bụru l'ẹka ono bẹ Erọnu nwuhuru; e lia ya. Eleyaza, bụ nwa iya nwoke bụru onye uke nọchia ẹnya iya. ⁷Ẹphe gbẹ l'ẹka ono jeshia Gudugoda. Ẹphe shi Gudugoda; ọ bụru pẹ eje Jiọtubata. Alị k'ono bụ ẹka nggele dūgbaa. ⁸Ọ bụru teke ono bẹ Chipfu họtaru ọkpa-ipfu Lívayi dobe iche; g'ẹphe pajẹ okpokoko ọgbandzu yẹbe Chipfu; waa g'ẹphe pfujeru l'iphu yẹbe Chipfu ejeru iya ozi; waa g'ẹphe gudeje ẹpha iya ọọ ọnu-oma. Ẹphe emekwa iya byasụ ntanụ-a. ⁹Ọ bụru iphe ono kparụ iphe, oshilọkpa Lívayi te nwedu okiphe l'ẹka unwunna pẹ ndu ọphuu nọ. Ọ bụru Chipfu bụ okiphe pẹ, bụ iya bụ iphe, Chipfu, bụ Chileke ngu kweru iya ukwe iya.

¹⁰“Noo ya; mu byakwa anọo l'eli úbvú ono ụkporo abalị labọ; eswe l'enyashi; gẹ mu nọru kẹ mbụ phọ. Chipfu ngabekwaru mu phọ nchị g'ọ ngaberu mu ọgiya ọphuu. Ọphu o mebyishiẹduru unu. ¹¹Chipfu sụ mu: ‘Tugbua je edua ndu Ízurelu g'ẹphe je enworu alị ono, mu riburu angụ lẹ mu a-nụ nna pẹ oche ono.’ ”

Tsujẹ Chipfu ebvu

¹²“Ọo ya bụ lẹ-a; unubẹ ndu Ízurelu; ?bụbaa gūnu bẹ Chipfu, bụ Chileke unu ele ẹnya g'unu mee, abụdu g'unu tsujẹ Chipfu, bụ Chileke unu ebvu; unu etsokọta ụzo iya g'ọ ha; unu eyee ya obu; gude obu unu g'ọ ha; yẹ ndzụ unu l'ophu ejeru Chipfu ono, bụ Chileke unu ozi. ¹³Ọzo bụ g'unu meje iphemiphe, Chipfu sūru g'e meje; waa iphe, ọ tọru ọkpa iya sụ g'e tsoje; mbụ ekemu-a, mu aturu unu ntanụ-a; g'ọ dūru unu lẹ ree. ¹⁴Unu lewarọ ẹnya; eligwe; yẹ imigwe, nọghataru eligwe bụkwa Chipfu, bụ Chileke unu nwe iya. Eliphe bụkwarupho nkiya; mękpoo iphemiphe, nọ iya nū. ¹⁵Ọ bụepho lẹ Chipfu bẹ nna unu oche pẹ dūepho l'obu; k'ọphu o yeru pẹ obu; bya ahọta oshilọkpa pẹ; ọphu ọ họtaduru ọhoro, nọgbaa nū; g'ọ dūnaa ntanụ-a. ¹⁶Ọo ya bụ lẹ-a; unu bunaa onwunu úbvù; bufu akpapyi ọphu nọ unu l'ime obu; ba apfubehe olu kanganaa; ¹⁷kele Chipfu, bụ Chileke unu bụkwa Chileke, ka agwa, nọkota nū; bya aburu Nnajiuphu, kakọta iphe, bụkpoo ndu bụ nnajiuphu. Ọ bụ Chileke, parụ ẹka bya adu akpabiri; dū ebvu l'ẹnya; ọphu ọ dudu onye ooleje ẹnya l'iphu; tẹme ọphu o ridu

uphalazu. ¹⁸Ọo yẹbedua ahajeru ndu enwedu nna; yee unwanyi, ji phe anqedu enge. Ndu lwaru alwalwa be ooyeje obu; azu phe le nri; yee iphe, anma l'upfu. ¹⁹Ọo ya bu le-a; unu yejekwa ndu lwaru alwalwa obu; noo kele unubedua shikwapho buru ndu lwaru alwalwa l'alij ndu Ijiputu. ²⁰Unu tsuje Chipfu, bu Chileke unu ebvu; o buru iya be unu a-nodu ejeru ozi kpo-loko; buru iya be unu a-kukuru; buru epha iya be unu e-gudeje eri angu. ²¹Ọo yẹbedua be unu a-noduje aja ajaja; o buru iya bu Chileke unu, bu onye meru unu eze iphe-a, du ebvu l'anya-a, bu ophu unu gude enya unu huma-a. ²²Nna unu oche phe be teke epehe laru alij ndu Ijiputu bu umadzu ukporo eto l'iri be epe du; obenu le nta-a be Chipfu, bu Chileke unu meru; unu du ge kpokode, no l'igwe; o buru g'unu habe igwe."

Eye Chipfu obu; anuru iya opfu

11 ¹"Ọo ya bu le-a; yee Chipfu, bu Chileke ngu obu; meje iphe, o karu ngu g'i meje; l'i meje iphe, o toru okpa iya su g'e tsoje; me iphe, o suru g'i meje; meje ekemu iya tekenteke. ²Ophu unu a-maru ntanu-a bu owa-a. Ndu mu epfuru iphe-a ta abukwa unwu unu; ndu ata amadu; ophu epehe ahumajeduru ahuhuhuhu ono, Chipfu, bu Chileke unu huru unu ono; ozoo akpabiri iya; ozo ike me okpehu iya; ³waa iphe-ohubama iya ono; waa iphe ono, o meru l'alij ndu Ijiputu l'ophu ono; mbu iphe, o meru Fero, bu eze ndu Ijiputu; yee alij iya l'ophu; ⁴waa iphe ono, o meru ndu ojogu ndu Ijiputu; me inya phe; me ugbo-inya phe; waa g'o gude mee ge Eze-enyimu Uswe-uswe bya utso byapyabe phe teke ono, epehe achij unu oso ono; teme waa ge Chipfu mecharu gude mee; epehe bukotaruru mkpurupya-ta byasu ntanu-a; ⁵mekpoo iphemiphe ono, o meru unu l'echiegu gbiriri jasij unu byarwuta eka-a ono; ⁶waa iphe ono, o meru Detanu; yee Abiramu; unwu Eliyabu, bu nwa Rubenu; teke ono, alij saru onu l'echilabo ndu Izurelu lwekota; epehe le ndibe phe g'ephe ha; me ulo-ekwa phe; mekpoo iphe, dzu ndzu ophu bu nkephe. ⁷Ọo unubedua gude enya unu humakota eze iphe ono, Chipfu mekotaru ono.

⁸"Ọo ya bu; unu tuko ekemu, mu aturu unu ntanu-a dobekota. Ọo ya bu g'ike adukwanu unu; g'unu je alwuta alij ono, unu abya ada enyimu Jiordanu eje enworu ono. ⁹Teme g'unu enwekwarupho ndzu ogologo l'alij ono, Chipfu riburu nna unu phe angu le ya a-nu phe; ye le awa phe ono; mbu alij ono, mini era-eswi; yee manu-enwu aso gborogboro ono; ¹⁰kele alij ono, unu eje anata ono ta adukwa g'alij Ijiputu, bu eka unu shi lufuta, bu eka unu shi akoje iphe l'alij l'onwunu; unu ejee l'okpa unu je agbaa ya mini g'aagbaje l'eka a koru ekwo-ophe-a. ¹¹Obenu l'alij ono, unu eje enworu ono bu alij, du ubvu ubvu; bya enweru nsuda nsuda; o buru igwe edzeje mini agba iya l'onwu shokoshoko. ¹²Ọo alij, Chipfu, bu Chileke unu nwuberu enya. Mbu l'anya Chipfu, bu Chileke unu adujeepho l'alij ono mkpurumkpuru; mbu e -shi le mgbube ishi apha jasij l'abvubu iya.

¹³“K’ophu bu lẹ; ọ -bùru l’unu kwetarù mee ekemu, mu atùru unu nta-nù-a, bu iya bu g’unu yee Chipfu, bu Chileke unu obu; unu egude obu unu g’ò ha; mẹ ndzù unu l’ophu jeeru iya ozi ¹⁴bẹ Chipfu e-me g’igwe dzejeru mini l’orwuberu iya wùshiru unu l’alì unu; o -dzeeru unu mini ishi-apha; l’o dzekwaphò mini ùla-apha; k’ophu onyenonù a-kpata iphe, o meberu l’alì; mbù g’i gbuta ereshi ngu; kù mẹe ngu; mee manù ngu. ¹⁵Oo-me g’eswa dù l’ègu ngu; g’eswi ngu tajẹ; k’ophu ìi-nòdu eri nri eriji èpho. ¹⁶Unu kwabẹkwaru onwunu ẹnya; g’e te depfu unu g’unu dakòbe wata ejeru agwa ozi baaharù phẹ ẹja. ¹⁷Unu -mee ya nno bẹ Chipfu a-tukoshi-kwa unu oke èhu-eghu iya; l’o woru imigwe guchia g’igwe te edzehe mini. Ophu o nweèdu iphe, a kòberu l’alì, emehuba emehu. O tò dùdu g’a nòberu; unu abùru mkpurupyata l’èguru alì ono, Chipfu abya unu anùnu ono.

¹⁸“Oo ya bu lẹ-a; unu woru opfu-a, mu epfuru unu nta-nù-a kwachia lime obu unu; yefua lẹ ndzù unu. Unu gbaru iya l’èka g’ò bùru iphe-òhubama; l’o kejekwarùpho unu l’egedegee iphu g’ò bùru unu iphe-òhubama. ¹⁹Unu zije iya ùnwegirima unu. I -nòdu l’ibe ngu l’i bọ iya l’ùja; teke iije l’ùzo l’iibo iya. I -zẹe azẹe l’iipfu iya; teke i gbalihuru l’i pfukwa iya phò. ²⁰Li dekwaa ya phò l’oshi mgbo ùlo ngu; waa l’oshi mgbo ọguzo ngu. ²¹Oo ya bu k’ophu gu l’ùnwegirima ngu a-ka nka l’alì ono, Chipfu riburu angù lẹ ya a-nù nna ngu oche phẹ ono; g’èphe buru jasù teke mgboko a-nòberu.

²²“Kẹle-a; ọ -bùru l’unu tukurù ekemu-a, mu atùru unu g’unu do-be-a tsokòta; mbù g’unu ye Chipfu, bu Chileke unu obu-a; tsoo ùzo iya; chìru ùpfu kwẹe ya; ²³bẹ Chipfu a-chìfukwaru unu ohamoha, nọ unu l’iphu ono. Unu a-chìfu oha, kagbaa unu shii; bya aka unu okpehu; buru l’alì phẹ. ²⁴Èka unu wotawaru okpa unu zòbe a-bùru k’unu; mbù a -gbẹ l’echiegu rwua úbúvú úbúvú Lébanonù; yẹe a -gbẹ l’enyimu Yufurétisu rwua eze-ényimu ùzo ẹnyanwu-arìba. ²⁵O tò dùdu onye byaru adù ike akpafù unu l’iphu; kẹle Chipfu, bu Chileke unu e-me g’a tsuje unu ebvu l’alì ono l’ophu. Mbù l’iphe, bukpoò èka unu zòru okpa bẹ ndzù-agugu e-rwutajẹ phẹ, bu iya bu iphe, o kweru unu ukwe iya.

²⁶“Unu lenu! Nta-nù-a bẹ mu edoberu unu onu-oma; yẹe mburonu. ²⁷Oo-bùru onu-oma dùru unu; mẹ ọ -bùru l’unu ngaberu nchì mee ekemu Chipfu, bu Chileke unu, bu iya bu ekemu, mu atùru unu nta-nù-a. ²⁸Oo-bùru mburonu dùru unu; mẹ ọ -bùru l’unu jìkaru eme ekemu Chipfu, bu Chileke unu-a; unu bya agbakùta azù l’ùzo-a, mu atùru unu ekemu iya nta-nù-a; sù g’unu shije-a; je etsoaha agwa ozo, bu ophu unu amahaada. ²⁹Sù-a; teke Chipfu, bu Chileke ngu dubaeru ngu phò l’alì ono, unu eje enworu ono; teke ono bẹ unu e-pfufuta k’onu-oma phò l’úbúvú Gerizimu; waa k’atù onu phò l’úbúvú Ebalu. ³⁰Úbúvú ono èphenebo nọephe mẹ a da-futa ẹnnyimu Jìòdanu. O nọ l’èka ùzo gbororo ono ibe iya ophu ẹnnyanwu

aribaje; le mgboru ibe iya ophu oshi More pfugbaaru; mbu l'ali ndu Ké-nanu, bu le nsuda Araba; le mgboru mkpukpu Gilugalu. ³¹Nta-a be unu abyawaa ada enyimu Jiódanu je g'unu nworu ali ono, Chipfu, bu Chileke unu abya unu anunu ono. Unu -natae ya pho nworu; ³²unu kwabekwa enya mekotaje iphe, Chipfu toru okpa iya su g'e tsoje; waa iphe, o suru g'e meje, bu ophu mu egoshi unu ntanu-a.”

Oru-ngweja ke Chipfu

12 ¹“Owaa bu iphe, Chipfu toru okpa iya su g'e tsoje; waa iphe, o suru g'e emeje, bu iphe, unu e-leta enya; meje okpobe ememe l'ali ono, Chipfu, bu Chileke nna unu phe anu unu g'o buru k'unu jasu g'unu a-no-beru l'elipe-a. ²Unu tukokpoo aka ohamoha ono agwaje agwagwa mebyishicha; mbu oha ono, unu eje enworu ali phe ono. Unu mebyishicha agwa, ephe agwaje l'eli ubvu, ha shii; me l'eli ubvu, ha nwanshii; me le mkpula oshi, jaru ajaja. ³Unu toko oru-ngweja phe nwukposhia; unu atuko mkpuma, ephe doberu no tsukposhia; tsua itso Ashera phe oku. Unu tukokwapho nteke agwa phe gbujishia; g'epha iya chihuchaa; g'o to duhekpo adudu ophu l'eka ono.

⁴“O to bukwa g'ephe emeje k'agwa phe bu g'unu e-meje ke Chipfu, bu Chileke unu. ⁵Iphe, unu e-mechia bu g'unu choo aka Chipfu, bu Chileke unu a-hota l'okpa-ipfu unu g'o buru aka ee-dobe epha iya; lo buru iya eburu. O buru aka ono be unu e-jeje. ⁶Ngweja-akpo-oku; me ngweja mmanu ozo; me oke-lanu-l'uzo-iri; me iphe ozo, unu nuru iya; me iphe, unu riburu angu anunu; waa ngweja onye turu obu iya onyo; me nwa eswi yee aturu, bu okpara l'epho ne iya; bukota l'eka ono be unu a-tukoje iya wota bya anu. ⁷O buru l'atatiphu Chipfu, bu Chileke unu l'eka ono be unu le ndibe unu a-tukoje nodu ria nri. Ehu atsojekwapho unu l'iphemiphe, unu kuberu aka k'ememe; noo kele Chipfu, bu Chileke unu kebwaru unu l'oma.

⁸“G'o to bukwaru g'anyi eme l'eka-a ntanu-a bu g'unu e-meje l'eka ono. L'eka-a be onyenonu anoduje eme iphe, du iya ree l'enya nkiya. ⁹Noo kele nta-a be unu teke erwudu aka unu a-tuta unme, bu aka Chipfu, bu Chileke abya unu anunu g'o buru okiphe unu. ¹⁰Ole unu -daepho enyimu Jiódanu je eburu l'ali ono, Chipfu, bu Chileke unu abya unu anunu ono; mbu o -meepho; unu nweru onwunu l'eka iphe, bu ndu ohogu unu, bupheru unu mgburugburu; k'opfu unu bu le nchi-odoo; ¹¹o buru teke ono be unu e-wotaje iphemiphe-a, mu tushiru unu l'ekemu-a gude bya l'eka ono, Chipfu, bu Chileke unu a-hota g'e dobe epha iya; lo buru iya eburu. Iphemiphe ono bu iya bu ngweja-akpo-oku; waa ngweja mmanu ozo; me oke-lanu-l'uzo-iri; me iphe ozo, unu anu iya anunu; mekpoo iphe, kachaa ree l'iphe, unu nweru enweru, bu iphe, unu riburu angu l'unu a-nu Chipfu. ¹²O buru l'atatiphu Chipfu, bu Chileke unu ono be unu a-noduje; tee

eswa. Unubèdua l'onwunu; waa unwu unu unwoke; mē unwu unu unwanyi; waa ndu Lívayi, bu lē ndu-unu, bu ndu ophu adudu alì ẹka a nuru phe; ophu o dudu iphe, ẹphe ketarū g'ọ buru okiphe phe. ¹³Unu kwabekwa ẹnya g'ọ tọ buẹpho ẹka dū unu ree bẹ unu e-jeje anodu gwee ngweja-akpo-ọku. ¹⁴G'ẹka unu e-gweje ngweja-akpo-ọku ono buẹkwarupho l'ẹka Chipfu a-hota l'okpa-ipfu unu nanu. O buru ẹka ono bẹ unu a-tukoje iphemiphe-a, mu turu unu ekemu iya-a emekota.

¹⁵“Ole o bu; unu gbujukwaa anu, dū unu ree; taa lē mkpukpu lē mkpukpu unu g'ọ ha; mbu iphe, bukpo anu, guru unu ẹgu atata. Oo gẹ Chipfu, bu Chileke keberu nemadzū l'oma bu g'ọo-tabejeru. G'onye dubebe ree; ozoo onye aaso nsọ tajakwa iya ro. G'a taje iya g'ọ bu mgbada; ozoo umoro bẹ aata. ¹⁶O buẹpho g'unu ta tajakwa mee ya; unu wushijekwa iya l'alì g'onye wushiru mini. ¹⁷Ophu unu anodujekwa l'oma mkpukpu unu ria iphe, a turu oke-lanu-l'uzo-iri l'ereshi unu; ozoo mee unu; ozoo manū unu; ozoo nwa mbu, o nwuru mbu eswi unu; ozoo iphe-edobe unu ozo; ozoo iphe, onye kweru ukwe iya; ozoo iphe ngweja, nemadzū turu obu iya onyo anu; ozoo iphemiphe ozo, dū iche, a nuru anunu. ¹⁸Ochia g'unu noduje l'iphu Chipfu, bu Chileke unu rije iya; mbu l'ẹka ono, Chipfu, bu Chileke unu a-hota ono. Unubèdua l'onwunu e-rije iya; waa unwu unu unwoke; waa unwu unu unwanyi; waa ohu unu kẹ nwoke; waa ohu unu kẹ nwanyi; waa ndu Lívayi, bu lē mkpukpu unu. Unu noduje l'iphu Chipfu, bu Chileke unu tee eswa iphemiphe, unu kuberu ẹka k'ememe. ¹⁹Unu kwabekwa ẹnya g'unu ta akwasweru ndu Lívayi ẹnya jasukpoo g'unu anu-beru l'alì unu ono.

²⁰“Chipfu, bu Chileke unu -meepho g'oke alì unu ka shii, bu iya bu iphe, o kweru unu ukwe iya; onye ẹgu anu agu; o -nonyaa bya asu: 'Anu agukwa mu!' G'onye ono takwaa ya g'ogoo iya. ²¹O -buru l'ẹka Chipfu, bu Chileke unu a-hota g'ọ buru ẹka oo-dobe epha iya bẹ parū ẹnya; oo ya bu g'onye obu gbua eswi iya obu; ozoo iphe-edobe iya obu, bu ophu Chipfu nuru iya, bu iya bu gẹ mu turu iya unu lekemu ono; onye obu anodu l'oma mkpukpu unu taa ya g'ọ guru iya. ²²O buẹpho g'aatajẹ mgbada; ozoo umoro bu g'unu a-taje iya. Gẹ ndu aaso nsọ; waa ndu a ta sodu nsọ tujokewa taa ya. ²³O buẹpho g'unu kwabẹ ẹnya g'unu te erije mee ya; kele oo mee bu ndzū. Oo ya bu; unu te erijekwa ndzū iphe; taa anu iya. ²⁴Unu be rijekwa mee-iphe. Unu wushijekwa iya g'onye wushiru mini. ²⁵Unu be erijekwa iya; k'ophu oo-duru unu lē ree; duru unwu unu lē ree, bu ndu a-nodu etso unu lazū; kele unu eme iphe, pfuru oto l'iphu Chipfu. ²⁶Obenu l'iphe ono, unu doberu Chipfu nsọ ono; yẹ iphe ono, unu kweru ukwe iya ono bẹ unu e-gudeje je l'ẹka Chipfu a-hota. ²⁷Ẹka unu e-gweje ngweja-akpo-ọku; mbu anu obu mekpoo mee ya; l'a-buru l'eli oru-ngweja kẹ Chipfu, bu Chileke unu. L'a gbashì mee-iphe ono l'eli oru-ngweja

Chipfu, bu Chileke unu ono; unu eworu anu iya taa. ²⁸Unu kwabekwa enya; mekotaje iphe, bu opfu-a, mu epfu anu unu; aturu iya unu l'ekemu-a; k'ophu o-duru unu le ree; duru unwu unu, etso unu l'azu ree jasu l'ojejoje; kele unu eme iphe, pfuru oto l'iphu Chipfu, bu Chileke unu.

²⁹“Teke ono, Chipfu, bu Chileke unu e-me g'ephe chihu l'atatiphu unu; mbu ohamoha ono, unu eje enworu ali phe ono; unu bya anochia enya phe; bya ebuchia ali phe; ³⁰unu kwabekwaru onwunu enya me a lwuepho ndu ono l'iphu unu: g'a ta kwaru unu ye g'unu wata anwu eka phe; mbu g'unu wata akpa ishi agwa phe; jahaa su: ‘?Denu g'ohamoha-a egudeje abaru agwa phe eja; g'anyibedua awata eme g'ephe emeje.’ ³¹Unu ba abajekwaru Chipfu, bu Chileke unu eja g'ephe abajeru agwa phe; kele o bukwapho ahuma ahuma, Chipfu kporu ashi be ephe emejeru agwa phe; mbu l'unwu phe unwoke; yee unwu phe unwanyi be ephe akpojechaa oku; nu agwa phe.

³²“Su-a; iphemiphe-a, mu aturu unu ekemu iya-a; unu letakwa enya mee ya. Unu te eyekwa iya iphe; ophu unu ahobotakwa iya iphe!”

Abaru agwa ohozo eja

13 ¹“O -buru l'o nonyaaru; onye shi l'echilabo unu bya aburu onye mpfuchiru; ozoo o-rwo-nrwo; o bya emeaharu unu iphe-ohubama; ozoo iphe-ohumalenya; ²e mechaa; iphe-ohubama ono; waa iphe-ohumalenya ono vua g'o pfuru iya; o bya epfuahaaru unu su: ‘Unu g'anyi tsopyabe agwa ozo, unu amahaada je awata phe ejeru ozi’; ³unu ta angakwa nchi l'opfu egube onye mpfuchiru ono; ozoo opfu o-rwo-nrwo, du nno; kele o kwa Chipfu, bu Chileke unu ahu unu ama ge ya maru: ?unu gude-a obu unu g'o ha; me ndzu unu g'o ha yee Chipfu, bu Chileke unu obu? ⁴O kwa Chipfu, bu Chileke unu bu onye unu e-tsojeru; o buru iya kpoloko kpekpu bu onye unu a-tsuje ebvu. Unu dobeje ekemu iya; ngabejeru iya nchi; jeeru iya ozi; chijeru upfu kwee ya. ⁵G'e gbukwaa onye mpfuchiru ono; ozoo o-rwo-nrwo ono egbugbu; noo kele o ziru unu g'unu kwefu ike; haa etso Chipfu, bu Chileke unu, bu onye dufutaru unu l'ali Ijiputu; bya agbafuta unu l'ali eka unu shi buru ohu ono. Onye ono bu iphe, oome bu g'o kposhia unu g'unu te tsoshi uzo ono, Chipfu turu unu ekemu g'unu tsoo ono. O kwa egube ono be unu e-shije wofu ejo-iphe l'echilabo unu.

⁶“O -buru nwune ngu; mbu onye gu l'iya shi le ne lanu; ozoo nwa ngu nwoke; ozoo nwa ngu nwanyi; ozoo nyee ngu, du ngu l'obu; ozo eguru onya ngu, gu l'iya no le ndzu; byapfutaru ngu le mpya bya emeahaa g'o rata ngu g'unu je awata ejeru agwa ozogba ozi; mbu agwa, gubedua lonwongu amahaadaa; ophu nna ngu phe amahadaa ya; ⁷mbu agwa ndu bupheru unu mgburugburu; ndu ophu no unu ntse; me ndu ophu no unu enya; jasukpoo l'eka igwe beru; ali beru. ⁸Unu te kwetakwa iphe onye

ono pfuru; ophu unu angabekwaru iya nchi. Unu ta aphukwaru onye ono obu-imemini. Unu te edobekwa iya ndzu; ophu unu ewohakwa onye obu ewoha. ⁹Unu gbukwaa onye obu egbugbu. Ge gubedua vuru uto dabu iya aka onwu l'ehu; tumanu ndu ophu l'ophu awuppyabewa iya ro. ¹⁰Unu gude mkpuma tugbu ya; kele o meru g'o dufu unu l'aka Chipfu, bu Chileke unu, bu onye dufutaru unu l'ali Ijiputu, bu aka unu shi buru ohu. ¹¹Oo ya bu ge ndu Izurelu l'ophu anuma iya tsuhu ebvu; o to duedu onye byaru emebaa ejo-iphe, du g'ono l'echilabo unu.

¹²"O -buru l'unu shi le mkpukpu lanu l'ime mkpukpu le mkpukpu ono, Chipfu, bu Chileke unu a-nu unu g'unu buru ono numa; ¹³l'o duru ndu bu ogalemkpa, no iya nu; o buru l'echilabo unu be epe shi; bya erwutawaa ndu bu le mkpukpu ono; su phe: 'Unu g'anyi je awata ejeru agwa ozo ozi'; mbu agwa, unu amahaada; ¹⁴unu kpakwaa ishi; bu aka iya okpobe ebubu; jia aji mkponwu mkponwu. Teke e mechaaru o buru eviya; iphe obu mee ememe eviya; mbu lejo ahuma, du nno meru l'echilabo unu; ¹⁵unu egude ogu-echi gbushikota ndu bu le mkpukpu ono; mebyishikota iya go ha; mekpoo iphemiphe, no l'ime iya; mekpoo iphe-edobe no iya nu; unu gude ogu-echi gbushichaa ya. ¹⁶Unu abya atuko iphemiphe, no le mkpukpu lwua; bya akube l'oma edupfu mkpukpu ono. Unu eworu mkpukpu ono; yee iphemiphe, no iya nu kpoo oku; go buru ngweja-akpo-oku l'ophu, a nuru Chipfu, bu Chileke unu. Ge mkpukpu ono bukwaru ikpozu jasu lojejeje; ophu a kpu-phukwa iya azu ozo. ¹⁷G'o to dukwa iphe ono, e doberu k'emebyishi ono me nanu, aa-huma nemadzu l'aka; k'ophu Chipfu e-woru onwu-phuruphuru oke ehueghu iya ono sephu azu; imemini unu adu iya; l'o phuru unu obu-imemini; l'o mee unu aka igwerigwe, bu iphe, o rifuru nna unu oche phe anu iya; ¹⁸m'o -buru l'unu ngaberu Chipfu, bu Chileke unu nchi; dobekota ekemu iya-a, mu aturu unu ntanu-a go ha; bya emekwapho iphe, pfuru oto lenya Chipfu, bu Chileke unu."

Nri, aaso nso; yee nri,

a ta sodu nso

(Uke 11:1-47)

14 ¹"O kwa unu bu unwu Chipfu, bu Chileke unu. Unu te eyebataje-kwa onwunu onya l'ehu; ophu unu akpushijekwa onwunu egbushi onu-iphu me unu -nodu akwa nemadzu. ²Noo kele unu bu oha, duru Chipfu, bu Chileke unu nso; teme le Chipfu shiwaa l'echilabo oha, no l'eliphe mgburugburu hota unu dobe g'unu buru oha, bu yebedua kpoloko nwe unu.

³"Unu te erijekwa iphe, bu ebyi. ⁴Waa anu, unu a-taje bu owa-a: eswi; waa aturu; waa egbu; ⁵waa ele; waa anigo; waa egbu-oswa; waa atsu; waa aturu-oswa. ⁶Unu taje iphe, bu anu, nweru ujarabvu-okpa; bya anwafutaje nri taphu azu. ⁷Ole o bu; anu ophu anwafutaje nri taphu azu;

ozoo ophu nweru ujarabvu-okpa, unu ata tajedu bu: inya-kamelu; waa nggamachi; waa nchi-ogba. Ndu k'ono bu anu, unu a-nodu aso nso; noo kele onwafutaje nri taphu azu; obenu l'o to nwedu ujarabvu-okpa. ⁸Ezi bukwapho anu, unu a-nodu aso nso; a makwaru-a l'o nweru ujarabvu-okpa; obenu l'o to nwafutajedu nri taphu azu. Unu ta tajekwa anu iya; ophu unu edenyikwa odzu iya aka.

⁹“Iphe, bu le mini be ophu unu a-taje bu ophu nweru mkpo yee ekiri. ¹⁰Ndu ophu enwedu mkpo yee ekiri bukwa anu, unu a-nodu aso nso; unu ta atajekwa iya.

¹¹“Iphe, bukpoo enu, a ta sodu nso; unu taje iya. ¹²Ole ndu ophu unu ta atajedu bu: ugo; waa udele; waa udele-oji; ¹³waa egebe l'udu iya l'udu iya; waa ivu; ¹⁴mekpoo okpoko-oha l'udu iya l'udu iya; ¹⁵⁻¹⁷waa mgbashi-ujiku l'udu iya l'udu iya; waa enu golu; waa okpo-ngwere l'udu iya l'udu iya; waa ugo-mini; waa ogu-ikporo; ¹⁸waa eze oku-eswi-uda; waa apyari-nhoko l'udu iya l'udu iya; waa ovu; waa utsu-nwankuta.

¹⁹“Iphe, bukpoo ugu, furu eba bukotakwa anu, unu a-nodu aso nso; unu ta atajekwa iya. ²⁰Obenu l'iphe, bukpoo iphe, furu eba go ha, a ta sodu nso be unu a-takotaje.

²¹“Unu ta atajekwa iphe, nwuhuru anwuhu. Unu nuje iya ndu lwaru alwalwa, bu le ndu unu gephe taa. Ozoo unu eje eree ya ndu ohozo. Kele unubedua bu ndu duru Chipfu, bu Chileke unu nso.

“Unu te egudejekwa mini-era ne egu shia nwa iya.”

Oke-lanu-l'uzo-iri

²²“Unu nujekwa oke-lanu-l'uzo-iri l'iphemiphe, unu kpataru l'opfu unu aphagapha. ²³O kwa l'atatiphu Chipfu, bu Chileke unu leka ono, o-hota; dobe epha iya; buru iya eburu ono be unu a-noduje ria oke-lanu-l'uzo-iri ono, bu iya bu iphe, shi l'ereshi unu; waa le mee unu; waa le manu unu; waa l'iphe mbu, shi l'eswi unu; yee egu unu me aturu unu; k'opfu unu e-shi nno nwuta atsu Chipfu, bu Chileke unu ebvu tekenteke. ²⁴O -buru leka ono be paru unu enya; k'opfu bu le teke Chipfu, bu Chileke unu keberu unu l'oma shii; be unu ta adudu ike evukota iya eje aka ono, Chipfu a-hota go buru enya aka epha iya a-du ono; kele o paru unu enya; ²⁵unu eree ya erere; reta iya okpoga; gudepyabe leka gude je aka ono, Chipfu, bu Chileke unu a-hota ono.

²⁶“Unu -rwua; unu egude okpoga ono mee iphe, du unu ree; unu egude iya zuta eswi; ozoo gude iya zua aturu; ozoo gude iya gaa mee; ozoo gude iya gaa iphe-angungu ozo, atsu atsutsu; ozoo zukupoe ya pho iphe, du unu ree. Unu anodu l'iphu Chipfu, bu Chileke unu leka ono ria ya; tee eswa; unu le ndibe unu l'opfu. ²⁷A bya le ndu Liviya, bu le ndu-unu; unu ta akwaswekwaru phe enya; noo kele o to dudu ali aka a nuru phe; ophu o dudu iphe, ephe ketaru go buru okiphe phe. ²⁸Iphe, bukpoo apha eto

a-nwūta anwūta; mē apha k'ēto ono bvūje abvūbvū bē unu a-chītakotaje oke-lanū-l'ūzo-iri l'iphe, bū iphe, unu meberu l'alī l'apha ono; bya akūbe-gbaa l'ēka aa-kwakōbechaa ya lē ndu-unu; ²⁹k'ōphu ephe a-byajē bya eria rījia ēpho; mbū ndu Līvayi, bū ndu ōphu adūdu alī ēka a nūru phē; ōphu ō dūdu iphe, ēphe ketarū g'ō būru okiphe phē; waa ndu lwarū alwalwa; mē ndu enweēdu nna; waa ūnwanyi, jī phē anōedu, bugbaa lē ndu-unu. Ōo ya bū gē Chipfu, bū Chileke unu ekebe unu l'ōma l'iphemiphe, bū akanya, unu gude ēka unu ese.”

Apha, onyemonye e-nweru onwiya

(Uke 25:1-7)

15 ¹“Iphe, bukpo apha ēsaa; mē apha k'ēsaa ono bvūje abvūbvū bē unu a-hajē ūgwo, e jī ejiji g'ō laa nno. ²Waa g'ēe-gudeje mee k'aha ūgwo ono baa: G'onye jieru nwibe iya ūgwo hajēkwaaru iya ya. G'ō to jē-kwa anata onye Ízurelu ibe iya ono; ōzoo nwune iya ūgwo ono; kēle iphe, e kuru apha ono bū apha, Chipfu sūru gē k'ūgwo laa. ³Ō -būru ōphu onye ōhozo jī ngu; jērō je anata ono; obenu ōphu dagbaru gū lē nwune ngu; hakwaa ēka l'ono.

⁴“Ō tō dūkwa onye ūkpa, byaru l'adu l'echilabō unu; kēle Chipfu, bū Chileke unu a-kwatakwa kebe unu l'ōma l'alī ono, oome gē ya nū unu g'ō būru okiphe unu ono; ⁵m'ō -būru l'unu ngabēru Chipfu, bū Chileke unu nchī; leta ēnya; mekōta ekemu-a, mu atūru unu ntanū-a. ⁶Noo kēle Chipfu, bū Chileke unu e-kebekwa unu l'ōma, bū iya bū iphe, ō kweru ukwe iya. Unu e-jījeje ōhamoha, dū igwerigwe ūgwo; ōle unu ta abyadū ejita; tēme unu abūru ishi ikpoto ōha; ōle ō tō dūdu ndu byaru a-būru ishi unubēdua.

⁷“Ō -būru l'ō nweru nwune unu, bū onye ūkpa, unu l'iya tūko buru lē mkpūkpu; l'alī-a, Chipfu, bū Chileke unu abya unu anūnu-a; unu te edo-bekwaru iya ōkpoma mgbashī; ōphu unu ekekwaru nwune unu ono, bū onye ūkpa ono ēka mbvu. ⁸Ō chia ēka bē unu a-nōdu asajērū iya ōkpobe asaru. Unu ejījee iya ūgwo, a-sūru iya eme iphe, bū mkpa iya; gē mkpa ōbu ahahabē. ⁹Unu letakwa ēnya g'ējo ōriri ta abatajēkwa unu l'obu kē g'unu sū l'apha k'ēsaa, bū iya bū apha aa-ha g'ūgwo-a laa dūkwa ntse; woru iphu gbanwūberu nwune unu ono, mkpa byaru ono; ō tō dūdu iphe, unu anū iya. Onye ono a-kpōkwaru Chipfu yeru unu; l'ō būru unu iphe-ejī. ¹⁰Unu gudejekwa obu unu; nū iya iphe, ō sūru g'unu nū iya; ōphu unu anōdukwa agū aphū anū iya ya; kēle Chipfu, bū Chileke unu e-gudekwa k'iphe ono, unu nūru iya ono kebe unu l'ōma l'iphemiphe, unu tūru ama ememe; mekpoo l'iphemiphe, unu yeru ēka wata ememe. ¹¹Kēle ndu ūkpa ta abyadū abvū abvūbvū l'alī-a. Noo g'ō gude mu nōdu atūru iya unu l'ekemu epfu sū: Unu sajēkwaaru unwune unu ēka ōkpobe asasa; yēe ndu ūkpa; mē ndibe unu, nō lē mkpa l'alī unu ono.”

Aha ndu bu ohu
g'ephe nweru onwophe
(Awu 21:1-11)

¹²“O -buru l'o nweru onye Hiburu ibe ngu, i gbataru l'ohu; m'o -bu nwoke; ozo nwanji; o jewaru ngu ozi apha ishii; o -be l'apha k'esaa; ha-kwaa ya g'o laa; je enweru onwiya l'eka ngu. ¹³Teke ono, i haru iya g'o shi ngu l'eka lashia ono; ta agbabekwa iya aka oto. ¹⁴Sakwaa aka asasa; nu iya iphe, shi l'eku ngu; me ophu shi l'ulo bali ngu; me ophu shi l'eka iiku-je mee. Oo iphemiphe ono, Chipfu, bu Chileke ngu gude kebe ngu l'oma ono; bu iphe, ii-nu iya. ¹⁵Unu nyatakwa l'unu shi buru ohu l'ali Ijiputu; Chipfu, bu Chileke unu bya agbafuta unu. O buru iphe ono meru iphe, mu aturu unu ekemu-a ntanu-a.

¹⁶“Ole o bu; teke o bukwanu l'ohu ngu ono suru ngu le ya ta alufudu ngu l'eka; kele o yeru ngu obu; bya eyee ndibe ngu obu; teme gu l'iya du le ree; ¹⁷li wota oji; dobe iya nchi le mgbo; kpo-fua; onye ono abuwaruro ohu ngu jaswaruroya. O bukwarupho egube ono be ii-mekwapho ohu ngu ke nwanji. ¹⁸G'aha ohu ngu g'o nweru onwiya te ejekwa ngu atsu l'ehu; kele ozi, yebedua nwekiya jeru ngu apha ishii ono kakwa shii ugbo labo; eme l'ozi, onye e butaru ebuta gege jeru ngu. I -mee ya nno; Chipfu, bu Chileke ngu ekebe ngu l'oma l'iphemiphe, iime.”

Anu, vuru uzo waa ekpa-nwa ne iya

¹⁹“Iphe, bu eswi unu; waa aturu yee egbu unu; be nwa mbu, o vuru uzo nwua, bu okee ya be unu e-dobekotajeru Chipfu, bu Chileke unu iche. Unu te egudejekwa oke-eswi, bu iya vuru uzo waa ekpa-nwa ne iya eje ozi egu; ophu unu ebushijekwa aturu, bu iya vuru uzo waa ekpa-nwa ne iya eji. ²⁰Apha g'apha be unu le ndibe unu a-noduje l'atatiphu, Chipfu, bu Chileke unu taa ya; l'eka Chipfu a-hota. ²¹Ole o -bukwanuru l'anu ono nweru aka iphe mebyiru iya; mbu l'o bu eniyeni; ozo l'ootsu ishi; ozo l'o duru aka ozo, iphe mebyiru iya shii; unu te egudekwa iya gweeru Chipfu, bu Chileke unu ngweja. ²²Unu nodujekwa le ndu-unu taa ya. Unu taa ya g'aataje mgbada; ozo umoro-a. Onye aaso nso a-ta iya; onye duebe ree ataa ya. ²³O buepho g'unu ta taje mee ya. Unu wushije iya l'ali g'onye wu-shiru mini.”

Obo Ojehata
(Awu 12:1-20)

16 ¹“Unu boje obo Ojehata ke Chipfu, bu Chileke unu lonwa Abibu; noo kele oo lonwa Abibu ono be Chipfu, bu Chileke unu duru unu lenyashi dufuta l'ali Ijiputu. ²Unu gwejeru Chipfu, bu Chileke unu ngweja Ojehata ono. O buru aturu; ozo egbu; ozo eswi be unu

e-gudeje egwe ngweja ono l'eka Chipfu a-hota; dobe epha iya; buru iya eburu. ³Unu te egudejekwa buredi, e yeru iphe, ekoje buredi taa ya. Ujiku esaa be unu a-taje buredi, e yeduru iphe, ekoje buredi, bu iya bu buredi iphe-ehuka. Noo kele o o ephuru-oku be unu gude wufuta l'alì Ijiputu. Unu meje iya jasukpoo g'unu a-no-beru gudeje nyata teke unu shi le Ijiputu wufuta. ⁴G'o to dukwa onye aa-huma iphe, ekoje buredi l'ibe iya l'alì ono mgburugburu gbiriri jasù ujiku esaa ono abvu. Ophu e kwejekwa g'anù ono, e gburu l'uzenyashi mbu pho noo futa l'utsu.

⁵“Unu ta ndujekwa le mkpukpu le mkpukpu ono, Chipfu, bu Chileke unu abya unu anunu ono bo obo Ojegahata. ⁶Eka ee-gweje iya bu l'eka ono, Chipfu, bu Chileke unu a-hota; dobe epha iya; buru iya eburu ono. Noo eka aa-nduje gwee ngweja Ojegahata obu l'uzenyashi; me enyanwu ribaahaepho; legube teke ono, unu shi l'alì Ijiputu wufuta ono. ⁷O buru ahuhu be aa-huje anu iya taa l'eka ono, Chipfu, bu Chileke unu a-hota ono. O -be l'utsu; onyenonu adakobe lashia ibe iya. ⁸Ujiku ishii be aa-taje buredi, e yeduru iphe, ekoje buredi; o -be le mboku k'esaa; unu edzukoo l'iphu Chipfu, bu Chileke unu. G'o to dukwa onye e-je ozi mboku ono.”

Obo-Idzu

(Awu 34:22; Uke 23:15-21)

⁹“Idzu esaa be unu a-gutaje dobe. Teke aa-wataje agu idzu ono bu me wataepho egbuta ereshi. ¹⁰Noo teke unu a-bojeru Chipfu, bu Chileke unu Obo-Idzu. A -nodu abo iya; g'onyenonu wotajekpoeppo iphe, o toru obu iya onyo je anu Chipfu; g'onyenonu nujeekwapho ge Chipfu, bu Chileke unu kebeberu iya l'oma. ¹¹Unu adoru l'iphu Chipfu, bu Chileke unu; mee emereme; onyemonye yee unwegirima iya unwoke me unwanyi; me ohu iya unwoke me unwanyi; mekpoo ndu Lívayi, no le mkpukpu unu; me ndu lwaru alwalwa; me ndu enwedu nna; me unwanyi, ji phe nwuhuwaru, bu ndu unu l'ephe tukoru nodu. Eka aa-nodu mee ya bu l'eka ono, Chipfu, bu Chileke unu a-hota; dobe epha; buru iya eburu ono. ¹²Unu nyatajekwa l'unu shi buru ohu l'alì Ijiputu; k'ophu oo-me g'unu kwabe enya mekotaje iphe-a, mu toru okpa iya; su g'e meje-a.”

Obo-Mkpù

(Uke 23:33-43; Ógú 29:12-38)

¹³“Unu bo Obo-Mkpù ujiku esaa; me unu gbutachaepho balì unu; kutachaa mee unu. ¹⁴Unu -nodu abo iphe obu; unu eme emereme; unubedua lonwunu; mekpoo unwu unu unwoke me unwanyi; me ohu unu unwoke me unwanyi; me ndu Lívayi; me ndu lwaru alwalwa; me ndu enwedu nna; me unwanyi, ji phe nwuhuwaru, bu ndu unu l'ephe tukoru nodu. ¹⁵O buru l'eka Chipfu, bu Chileke unu a-hota be unu a-nodu booru iya obo-iphe ono ujiku esaa. Noo kele Chipfu, bu Chileke unu be e-kebe

unu l'oma l'iphe, unu kpataru l'egu; waa l'iphemiphe, unu byibekporu eka k'ememe; k'ophu ehu a-tso unu utso tsofu l'ishi.

¹⁶“Ugbo eto l'apha g'apha be unwoke unu g'ephe ha a-byakotaje latatiphu Chipfu, bu Chileke unu l'eka oo-hota. Epehe a-bya le Obo-Buredi, e yeduru iphe ekoje buredi; waa le Obo-Idzu; waa le Obo-Mkpui. Epehe -nodu abya ono; g'ephe ta agbajekwaru eka bya l'iphu Chipfu. ¹⁷G'onenyonu nujeeppo iphe, oo-du ike nu. G'o bujeerupho ge Chipfu, bu Chileke unu kebekpoerupho onyemonye l'oma beru bu g'oo-nu-beru.”

Ahota ndu-ikpe

¹⁸“Unu hotakwa ndu-ikpe; me ndu-ishi lokpa-ipfu, nonu le mkpukpu, nokota nu, Chipfu, bu Chileke unu abya unu anunu ono. O buru ndu ono, aa-hota ono a-noduje ekpe ndu Izurelu ikpe, pfuru oto. ¹⁹Unu ta nmajekwa ikpe inmaphu; ophu unu elejekwa enya l'iphu kpee ikpe. Unu te erijekwa uphalazu; noo kele uphalazu apyi-chijekwa onye maru iphe eka lenya; teme o nodu emeje g'opfu onye pfuberekoto du gheleghelehele. ²⁰O bukwapho ikpe, pfuru oto kpoloko kpeekpu be unu a-noduje ekpe; k'ophu unu a-nodu ndzu; ali ono, Chipfu, bu Chileke unu abya unu anunu ono aburu k'unu.”

Abaru agwa eja

²¹“Unu ta akpobejekwa itso Ashera le mgboru oru-ngweja, unu doberu Chipfu, bu Chileke unu. ²²Ophu o dukwa mkpuma, unu e-dobeje onu wata agwagwa; mbu iphe ono, Chipfu, bu Chileke unu kporu ashi ono.”

17 ¹“Unu te egudekwa oke-eswi; ozoo aturu, ntucha du l'ehu; ozoo ophu nweru eka iphe mebyiru iya; bya egweeru Chipfu, bu Chileke unu ngweja; kele ono bukwa akpamara l'iphu Chipfu, bu Chileke unu.

²“O -duru nwoke; ozoo nwanji, unu liya bu le mkpukpu lanu lime mkpukpu ono, Chipfu, bu Chileke unu abya unu anunu ono, a humaru l'eka oome iphe, du eji lenya Chileke; shi nno emebyi ogbandzu Chileke; ³mbu; o -buru l'onye ono wataru agwa agwa ozogbaa; mbu wata abaru phe eja; phozeaharu enyanwu; ozoo onwa; ozo kpokpode, bu iphe, mu suru g'e be emejeshi-a; ⁴e pfuaru iya unu; unu numa; unu kparwetakwa ishi iya rengurengu; o -buru eviya; l'iphe obu meru ememe; mbu legube ahuma ono be e meru l'ali Izurelu; ⁵g'a kpata onye obu, meru ejo iphe obu; m'o bu nwoke; ozoo nwanji kpufu lonu-abata mkpukpu unu ono; gude mkpuma tugba ya. ⁶Onye ee-kpe mpfugbu be aa-duada ebo; ozoo eto; gbaa ekebe teme le gbuje onye obu. G'o to dukwa onye e-gbu me o -buru onye lanu agba iya ekebe. ⁷G'o bukwaru ndu ekebe ono, e-vuru uto dabu iya eka onwu l'ehu; teme ndu ophu g'ephe ha awupyabewa iya ro. O kwa egube ono be unu e-shije wofu ejo-iphe l'echilabo unu.”

Ulo-ikpe

⁸“O -buru l'o duru opfu, daru nu, dunukaru unu ehuka ekpekepe; opfu ke l'e gburu ochi te egbu; ozoo l'e tsuru nemadzu iphe te tsu; o buru opfu

dahaa lẹ mkpukpu unu; unu gude opfu ono je l'ẹka ono, Chipfu, bụ Chileke unu a-hota ono; ⁹gude iya jepfu ndu-uke, bụ oshilokpa Lívayi; waa onye-ikpe, nọ l'okwa lẹ teke ono; pafuru phẹ ikpe obu g'ephe kpee; pfua g'ọ gbaru g'e mee ya. ¹⁰G'onye e kperu ikpe iya mekwaa iphe ono, ephe kperu ono; mbụ ikpe ono, ephe nọ l'anya ẹka ono, Chipfu a-hota ono kpee ono. Unu kwabekwa ọnya g'ọ buerupho iphe, ephe sọru g'e mee bẹ ee-me. ¹¹Unu tukokwa ekemu, ephe turu unu g'ọ ha; waa ikpe, ephe kperu unu g'ọ ha mekotaje. Unu ta ahakwa iphe, ephe pfuru unu; meahaa iphe ozo. ¹²Onye jikaru eme iphe onye-ikpe kperu; ozoo iphe, o kperu mbụ onye uke, nọ l'ẹka ono ejeru Chipfu, bụ Chileke unu ozi bẹ ee-gbu egbugbu. Ọ buru egube ono bẹ unu l'e-shi wofu ejo-iphe l'alị ndu Ízurelu. ¹³Onyemonye a-nụma iya; ndzụ aguhu iya. Ọ tọ duedu onye byaru emebaa iphe, dọ egube ono ozobaa.

Ahota Eze

¹⁴“Teke unu bahuerupho l'alị ono, Chipfu, bụ Chileke unu abya unu anunu ono; ọ -laepho unu l'ẹka; unu buru iya eburu; unu wata epfu sụ: ‘Unu g'anyi hota eze, a-buru onye-ishi anyi g'ohozo, nọ-phegbaaru anyi mgburugburu hotagbaaru nkephe-a.’ ¹⁵G'ọ dokwaa unu ọnya l'onye unu a-tụ ẹka bụ onye Chipfu, bụ Chileke unu hotaru. Mbụ-a; g'ọ bukwaru onye Ízurelu ibe unu bẹ unu a-hota. Unu ta ahotakwa onye ohozo g'ọ buru onye-ishi unu; mbụ onye abudu onye Ízurelu. ¹⁶G'onye obu ta abukwaru onye a-nodu achiko inya akuberu onwiya; ophu o mekwa gẹ ndu Ízurelu laphu azụ lẹ Ijiputu; ọ buru g'ee-shi gẹ ya nmakobaa inya doberu onwiya. Noo kele Chipfu pfuwaru iya unu sụ: ‘Unu ta alaphubaekwa azụ l'ẹka ono ozobaa.’ ¹⁷Ophu onye obu abukwa onye a-nodu aluko nwanyi akuberu onwiya; odumeka bẹ ọzo a-kpo-swehukwa iya. G'ọ tọ chitakwa mkpola-ododo; waa mkpola-ochaa kuberu onwiya. ¹⁸Onye ono -bahuepho l'okwa eze ono g'ọ wota ekwo, a phuru aphuphu detakotaru onwiya iphe, nokota l'ekwo ekemu-a, bụ ekwo, nọ l'ẹka ndu-uke, bụ oshilokpa Lívayi. ¹⁹G'ọ gudeje ekwo ono tekenteke; looguje iya mbokumboku jasụ gẹ ndzụ iya a-nọ-beru. Ọo ya bụ g'ọ shi nno nwuta g'oo-shije atsụ Chipfu, bụ Chileke iya ebvu; shi nno kwabe ọnya mekotaje iphe, bukpo ekemu Chipfu; yee iphe, ọ toru okpa iya sụ g'e tsoje. ²⁰G'onye ono ta arikwa lẹ ya ka unwunna iya ndu ophuu shii; shi nno parụ ekemu ono haa; meahaa iphe ozo. Mbụ l'ọ kwa g'onye obu anoriberu ndzụ l'aba-eze iya obu; yebedua yee unwegirima iya lechilabo ndu Ízurelu.”

Oke, rwuberu ndu-uke

18 ¹“Ndu uke, bụ iya bụ oshilokpa Lívayi; mbụ ndu okpa-ipfu Lívayi g'ephe ha bẹ a taa hedu oke alị; ophu ọ dudu okiphe ozo, e-rwube phẹ nọ l'alị Ízurelu. Iphe, ephe e-gude buru bụ iphe ngweja, a

kpọ-phodoru ọku l'iphu Chipfu; kele ono bu okiphe phe. ²Ephe te enwe-du okiphe g'unwunna phe; ọo Chipfu bu okiphe nkephe, bu iya bu iphe, o kweru phe ukwe iya.

³“Waa iphe, rwuberu ndu-uke baa me ndu Ízurelu gude oke-eswi; ọzoo aturu bya egweru Chipfu ngweja: iphe, aa-nu onye uke bu eka iya; waa agba iya; waa opfuru iya. ⁴Iphe ọzo, unu a-nujekwa phe pho bu ereshi, unu vuru ọzo gbuta; waa mee ọphúú; yee manu; waa éjí mbu, unu bushiru l'aturu unu; ⁵noo kele Chipfu, bu Chileke unu shiwaa l'okpa-ipfu unu l'ophu hota phe; ephe l'oshilokpa phe; g'ephe gude epha Chipfu pfujeru l'iphu iya; ejeru iya ozi tekenteke.

⁶“Ọ -buru l'onye shi l'okpa-ipfu Lívayi shi le mkpukpu eka o bu l'alí Ízurelu; gude obu iya l'ophu byatashia eka Chipfu, bu Chileke a-hota; ⁷g'a hakwaa ya g'o gude epha Chipfu, bu Chileke iya jejeru iya ozi ge ndu oshilokpa Lívayi ibe iya; bu ndu no l'ataphu Chipfu eka ono ejeru iya ozi. ⁸G'ephe kejekwaa iphe, gbaru phe nu enya nhamunha; g'a -gufukwaro ophu onye k'ono ketaru l'iphe, e retaru l'iphe ndu unuphu ibe phe.”

Etso eka ndu amadu Chileke

⁹“Teke unu baherupho l'alí ono, Chipfu, bu Chileke unu abya unu anunu ono; unu te ejekwa anwu eme ahuma ahuma ono, ndu ohamoha ono anoduje eme ono. ¹⁰G'o to dukwa g'unu ha onye a-kpo nwa iya nwoke; ọzoo ke nwanyi ọku. Ophu o dukwa onye a-nodu agba eja; ọzoo eme omamanshi; ophu o dukwa onye e-jeje l'eja. ¹¹Ophu o dukwa onye e-keje oswe; ophu o dukwapho onye e-jeje l'aji maa; ¹²kele iphe, bukpo onye eme iphemiphe ono bukwa ahuma be oome l'iphu Chipfu; o buru ahuma ahuma ono, ohamoha ono eme ono meru g'o gude Chipfu, bu Chileke unu je achifu phe l'iphu unu. ¹³Unu bukwaru ndu uta adudu l'ehu l'iphu Chipfu, bu Chileke unu.”

Onye mpfuchiru ono

¹⁴“Ohamoha ono, unu a-chifu ono anoduje angaru ndu eme omamanshi me ndu agba eja nchi. Ole unubedua be Chipfu, bu Chileke unu te ekwekwa g'unu mee nno. ¹⁵Chipfu, bu Chileke unu e-shi l'echilabo unu hofutaru unu onye mpfuchiru; onye ono a-buru onye shi l'unwunna unu gedegede; buru onye du ge mu du. Noo onye unu a-ngabejeru nchi bu ono.

¹⁶“Kele mboke ono, unu dzukoberu l'ubvu Horebu ono bukwa iphe ono be unu rworu Chipfu, bu Chileke unu su: 'Jiko g'anyi ta anuhenu olu Chipfu, bu Chileke anyi; ophu anyi ahumahe oku-a, paru eka-a; odumeka be anyi a-nwuhukwa.' ¹⁷Chipfu su mu: 'Iphemiphe ono, ephe pfuru ono be ephe pfukwaru ree. ¹⁸Mu e-shikwa l'echilabo unwunna phe wofutaru phe onye mpfuchiru, du ge gubedua. Mu eworu opfu mu ye onye obu

l'onu; l'ootuko iphe, mu pfuru iya kọkotajeru phe. ¹⁹Onye ta ngabeduru nchi l'opfu, onye ono a-nodu epfu epfuchiteru mu ono; bu mbedua be a-ji aji iya. ²⁰Ole onye mpfuchiru, nonyaaru wata eku onwiya bya epfuaaha iphe, mu epfuduru; ozoo onye ophu e-gude epha agwa ozo epfu; g'e gbu-kwaa onye mpfuchiru ono egbugbu.'

²¹"Unu a-jikwaro onwunu; su: '?Denu g'anyi e-shi maru ozi ophu abudu Chipfu ziru iya?'" ²²O -buru l'onye mpfuchiru gude epha Chipfu ezi ozi; teke o bu l'ozi, o ziru te egeduru egeru; ozoo l'o to meduru g'o pfuru iya; nokwa iphe, Chipfu epfuduru bu ono. O kwa onye mpfuchiru ono gude eku-onwonye pfua opfu obu. G'a ba tsujekwa egube onye ono ebvu."

Mkpukpu, onye gburu nemadzu

a-noduje ezeru ndzu

(Ogu 35:9-28; Dit 4:41-43; Jios 20:1-9)

19 ¹"Teke Chipfu, bu Chileke unu meerupho g'ohamoha ono chihu; mbu ndu ono, Chipfu, bu Chileke unu abya eworu ali phe nu unu; g'unu nochia enya phe; buchia mkpukpu le mkpukpu phe; yee unuphu l'unuphu phe ono; ²unu hofutakwa mkpukpu eto dobe iche l'echilabo ali ono, bu ali ophu Chipfu, bu Chileke a-nu unu g'o buru k'unu ono. ³Unu e-gude eka unu kpa oke; gude kee ali ono, Chipfu, bu Chileke unu abya unu anunu g'o buru nkunu ono uzo eto. Oke ali ono ephe n'eto e-nwekotaru mkpukpu, agbabe ezeru ndzu nanu nanu l'ime iya. La bya tua oji g'o rwua eka ono; k'ophu onye gburu nemadzu a-gbajeru laa eka ono.

⁴"Waa g'oo-dujeru onye gburu ochi gbalaa laa eka ono baa; k'ophu oo-nodu ndzu; mbu onye elekebeduru enya gbua nwibe iya; ophu o budu l'opfu duhawaru yee onye obu; ⁵du ge le nemadzu be yee nwibe iya swi je l'oswa je awata nku; o halia eka gbua ke swi ge ya gbutsua oshi ono; ishi ogbunku ono mifu je atua nwibe iya ono woru iya tugbua; g'onye ono gbalaa laa mkpukpu lanu l'ime mkpukpu eto ono je adzuru ndzu. ⁶Odumeka be onye eme g'o gwata ugwo ochi onye ono, e gburu ono e-gudekwa ehu-eghu chipfuru onye ono, gburu nwibe iya ono; gbapfu iya; kele uzo du enya; je eworu iya gbua; l'ebe abu l'onye obu gbaru g'o nwuhu; eshinu abudu le yee nwibe iya ono shi duhawaa l'opfu. ⁷Noo g'o gude mu nodu aturu iya unu lekemu su g'unu hota mkpukpu eto doberu onwunu.

⁸"Teke o bu le Chipfu, bu Chileke unu kparu oke ali unu; o kabaa osa, bu iphe, o riburu ndiche unu phe angu le ya e-me; e mecha; o nukota unu iphe, bukpo ali ono, o kweru ukwe le ya a-nu ndiche unu phe ono; ⁹o -buru l'unu doberu-a ekemu-a g'o ha eme iya ememe, bu ophu mu aturu unu ntanu-a; mbu g'unu yee Chipfu, bu Chileke unu obu; g'o buru uzo iya be unu a-nodujekpoephe etso; unu eyekwabaa mkpukpu eto ozo le mkpukpu eto ophu; ¹⁰k'ophu e tee gbujedu onye iswi du mma l'ali unu

ono, bu ophu Chipfu, bu Chileke unu nuru unu g'o buru okiphe unu ono; shi nno mee g'ikpe ochi tukoru unu l'ishi.

¹¹“Obenu; teke o bu le nemadzū be opfu duru ye nwife iya; o je akwaberu iya l'uzo; tsoo ya ogu; megbua ya; bya agbaru laa le mkpu-kpu-a nanu; ¹²ge ndu bu ogerenya mkpukpu ono zia g'e je akputa iya l'eka ono; kpee onye agwataje ugwo ochi onye e gburu; g'o gbua. ¹³G'a ta aphukwaru iya obu-imemini. Onye gburu onye adudu iphe, o meru; be ee-wofujekwa ndu iya l'ali Izurelu; g'oo-duru unu le ree.”

Iphe, e gude kpa a oke ali

¹⁴“G'o to dukwa onye e-wofuje mkpuma, e gude kpaaru ye nwife iya oke ali; mbu iphe, ndiche meru l'ali ono, bu okiphe, unu e-keta l'ali ono, Chipfu, bu Chileke unu abya unu anunu g'unu nworu ono.”

Agba ekebe

¹⁵“G'e te egudejekwa ekebe onye lanu gbaru; nma nemadzū ikpe ejo-iphe; ozo iphe-eji, a suru l'o meru. Nemadzū -mee iphe-eji; g'a du ebo; ozo eto gbaa ya ekebe; teme le kpebua ikpe onye obu. ¹⁶Teke o bu l'onye-ekembe eregede wataru agba nemadzū ekebe; gbaahaa ya ekebe, abudu eviya; ¹⁷g'uzi umadzu labo obu, opfu adaru obu bya apfuru l'iphu Chipfu: l'iphu ndu-uke me ndu-ikpe, bu ndu no l'okwa teke ono. ¹⁸Ge ndu-ikpe ono jia phe aji njinwuru-njinwuru. Teke o bu l'onye-ekembe ono be epfu iphe, abudu eviya; k'ophu bu l'o wataru epfu iphe, nwife iya emeduru; ¹⁹unu eworu iphe ono, o shi ari l'ee-me nwife iya ono woru mee ya. O kwa egube ono be unu e-shije wofu ejo-iphe lechilabo unu. ²⁰Oo ya bu; k'ophu ndu ozo a-numa iya; tsuhu ebvu; o to duhedu onye emebaa egube ejo-iphe ono ozo lechilabo unu. ²¹Unu ta aphujekwa obu-imemini. O kwa ge ndu laaru ndu; enya alaarū enya; eze alaarū eze; eka alaarū eka; okpa alaarū okpa.”

Ekemu, duru ogu ndu Izurelu

20 ¹“Unu -huma inya ndu ohogu unu; waa ugbo-inya phe; waa ndu ojogu phe; l'eka unu ejepfu phe ogu; ephe ka k'unu shii; ge ndu phe ta agujekwa unu. Noo kele Chipfu, bu Chileke unu, bu onye dufutaru unu l'ali Ijiputu be nokwa swiru unu eswiru. ²Unu -bya awata ogu ono; g'onye uke futakwa bya epfuru opfu yeru ndu ojogu unu. ³G'o su phe: 'Unube ndu Izurelu; unu ngabekwa nchi; ntanu-a be unu ejepfu ndu ohogu unu ogu. Ge meji ta atofukwa unu; ophu ndu agukwa unu. G'ehu te etekwa unu etete; ophu ephe eyekwa unu ebvu; ⁴kele oo Chipfu, bu Chileke unu be unu l'iya swi; g'o lwu-chiteru unu ogu l'iphu ndu ohogu unu; shi nno mee g'unu lwu-kpee phe.’

⁵“Ge ndu-ishi unu byakwapho bya epfuru nu ndu ono; su phe: 'O du-ru g'unu ha, onye kpuru ulo ophuu; ophu o toko yedu iya Chileke l'eka?

G'onye ono lakwa unuphu; a nɔnyakwa ɔ nwɔhu l'ogu; onye ozo je eworu ɔlo ɔbu ye Chileke l'eka. ⁶?O duru onye gbaru opfu-vayinu ɔphu o toko ridu iphe, shi iya nɔ? G'onye ono lakwa unuphu; a nɔnyaa; ɔ nwɔhu l'ogu; onye ozo ria ya. ⁷?O duru onye kweru nwanyi ukwe l'oo-lu iya; ɔphu o toko ludu iya? G'onye ono lakwa unuphu; a nɔnyakwa onye ono nwɔhu l'ogu; onye ozo je alua onye ɔbu.'

⁸"Ge ndu-ishi ono pfukwarupho yebaaru ndu ojogu ono; su phe: '?O -duru onye ndzu agu; ozoo onye meji atofu atofu? G'onye ono lakwa unuphu; a nɔnyakwa o mee; meji tofuaaha ndu ɔphuu g'otofu iya.' ⁹Teke ndu-ishi ono pfughechærupho iphemiphe ono nɔ ndu ojogu ono; ephe abya ahɔtagbaa ndu-ishi ojogu dobe, bu ndu a-nɔdu edu phe eje.

¹⁰"Teke unu wufuru ejepfu mkpukpu ugu; unu vukwaru ɔzo kua phe; g'unu l'ephe doshia; ge nchi du doo. ¹¹Oo ya bu; teke ɔ bu l'ephe zaru unu oku nchi-adu-doo ono; bya aguhaaru unu ɔzo phe; oo ya bu; iphe, bukpo ndu bu le mkpukpu ono abukotaru ndu unu a-nɔduje ezi ozi mkponwu-ehu. ¹²Teke ephe te ekwedu g'unu l'ephe nɔdu le nchi-odoo; ephe gbenu wata unu etso ugu; unu ekee ugu kephee mkpukpu ono mgburugburu. ¹³Teke Chipfu, bu Chileke unu woerupho mkpukpu ono ye unu l'eka; unu gude ugu-echi tuko unwoke, nokota iya nɔ gbushigba. ¹⁴Obenu l'unwanyi phe; me unwegirima; me iphe-edobe phe; mewaro iphemiphe ozo, nɔ l'ime mkpukpu ono; mekpoo iphe akwa l'okwata g'o hakota; be unu e-gwetakota g'o buru k'unu. Mbua; unu e-ripya iphe, unu gwetar l'eka ndu ohogu unu, bu ɔphu Chipfu, bu Chileke unu nuru unu. ¹⁵Noo g'unu e-mekotaje iphe, bu mkpukpu le mkpukpu ono l'ophu, bu ndu ɔphu nochaa unu uzanya, bu ndu ɔphu ayidu l'ohamoha owa-a, bugbaa l'eka-a.

¹⁶"Ole ɔ -buru mkpukpu ndu owa-a, nɔ l'ali, Chipfu, bu Chileke unu abya unu anunu g'o buru okiphe unu-a; g'o to dukwa iphe, atu unme me nanu, unu a-ha g'o nɔdu ndzu. ¹⁷Unu tukokwa phe g'ephe ha gbushikota; mbu ndu Hetu; me ndu Amoru; me ndu Kenu; me ndu Perazu; me ndu Hevu; me ndu Jibusu, bu iya bu ge Chipfu, bu Chileke unu turu ekemu; su g'unu mee; ¹⁸g'ephe te ezi unu ahuma ahuma, ephe anɔduje eme, bu ɔphu ephe anɔduje eme eyeru agwa phe; unu eshi nno meswee Chipfu, bu Chileke unu.

¹⁹"Teke unu keru ugu kephee mkpukpu mgburugburu noo odu; l'eka unu etso iya ugu g'unu lwua ya lwuta; unu te emebyishikwa oshi, pfugbaaru le mkpukpu ono; ke g'unu gude ogbunku wata iya egbutsushi. Unu hakwaa ya; wotaje mebyi iya ria eriri; unu te egbutsushikwa iya egbutsushi. ?Unu eke ugu ekephefa oshi, bvuru l'egu mgburugburu? Oshi; ?o bu nemadzu? ²⁰O buepho oshi ndu ɔphu unu maru l'o to budu oshi, eeri mebyi iya eriri; noo ndu ɔphu unu e-mebyishi. Unu gbutsushia ndu k'ono. Unu akpa ose-ogu kpu-pee mkpukpu ono, etso unu ugu ono mgburugburu jasu teke unu emekpe phe."

Onye e gburu; ophu a madu onye gburu iya nu

21 ¹Ọ -buru l'a humaru odzu onye e gburu egbugbu; ophu a madu onye gburu iya nu l'eka o dabyiru l'egu; l'ali ono, Chipfu, bu Chileke unu abya anu unu g'o buru okiphe unu ono; ²ge ndu bu ogerenya unu phe; me ndu-ikpe unu phe wufutakwa; bya agbe l'eka onye ono, e gburu ono ze; tua iphe atutu jasuchaa le mkpukpu le mkpukpu, no-pheru iya mgburugburu. ³Ge ndu bu ogerenya, shi le mkpukpu ophu ka ano-kube onye ono, e gburu ono ntse kputa ada eswi, e teke gudeswee jee ozi; ophu a tugbabejeduru iya le nwibe iya; ⁴gude bahu le nsuda, mini aso asoso; mbu nsuda, e teke ako-swe akoko; ophu e teke aku-swee ya iphe, aaku akuku. Ge ephe nodu le nsuda ono; swi-kwoo ada eswi ono olu. ⁵Ge ndu-uke, bu unwu Liviayi lufuta l'atathiphu bya apfuru. Noo kele Chipfu, bu Chileke unu hotaru phe g'ephe jejeru iya ozi; wafua g'ephe gudeje epha Chipfu gooru nemadzu onu-oma. Teke ofu adaru nemadzu yee nwibe iya; ozoo le nemadzu mekaru nwibe iya iphe; l'o buru ephe e-kpe iya. ⁶Ndu bu ogerenya, shi le mkpukpu ophu ka ano-kube ntse l'eka onye e gburu pho zee g'ephe hakota akwo eka l'eli ada eswi ono, a swi-kworu olu le nsuda ono. ⁷Ephe epfua su: "Eka anyi ta adukwa l'ochi onye-a; ophu anyi ahumakwaru teke eegbu iya. ⁸Jiko Chipfu; natanu ugwo-a, aafu k'iphe-eji, ndu nkengu, bu ndu Izurelu meru-a; mbu ndu ono, i gbafutaru. G'ochi onye adudu iphe o meru ta atukokwaru ndu nkengu, bu ndu Izurelu l'ishi. Oo ya bu; e shi egube ono pfua ugwo ochi onye ono, e gburu ono. ⁹O buru egube ono bu g'unu e-shi nwefu onwunu ochi onye adudu iphe, o meru ono l'echilabo unu; kele unu mewaru, iphe, pfuru oto l'iphu Chipfu.

K'alu nwanyi, a lwutaru l'ogu

¹⁰"O -buru l'unu jepfuru ndu ohogu unu ogu; Chipfu, bu Chileke unu woru phe ye unu l'eka; unu kpua phe le ndzu; ¹¹o -buru le ndu ono, unu kpuru le ndzu ono be o duru nwanyi, ama mma, nweru g'unu ha onye o du ree; teme o nodu agu onye ono egu g'onye ono duta iya g'o buru nyee ya; ¹²g'onye ono duta iya laa ibe iya je akpushia ya ishi; bee ya nvo ebebe. ¹³Lo yefu uwe, o shi ye teke a kputaru iya pho. Lo buru l'ibe onye obu; kwaa ekwa ne iya yee nna iya onwa ophu. E -mechaa; yee onye obu awatawaro akwakwa; onye obu aburu ji iya; l'o buru nyee ya. ¹⁴O -buru l'e mechaaru; ophu nwanyi obu aduedu onye obu ree; g'o pakwaru iya haa g'o je eka du iya ree. O buepho g'i ti re iya erere k'ereta okpoga; ophu i mekwa iya g'eemeje ohu; noo kele i mewaru iya iphe-iphere."

Iphe, rwuberu okpara

¹⁵"O -buru le nwoke alu unwanyi labo; o yee onye lanu obu; onye ophu du iya ash; ephe tuko nwutawaru iya unwegirima; me onye ophu e yeru obu yee

onye ophu a kpọru ashị; teke ọ bụ l'ọo onye ophu a kpọru ashị yeru ọkpara lẹ nwoke; ¹⁶mbọku, oo-ke ekpe gude keeru unwu iya ẹku iya; g'ọ to wotakwa nwa onye ophu o yeru obu phọ dobe l'onodu ọkpara; hachia nwa nke onye ono, ọ kpọru ashị pho, gbẹchia bụru iya bụ ọkpara. ¹⁷G'onye ono mekwaaru ọkpara iya ono, bụ nwa nwanyị ono, ọ kpọru ashị ono iphe, rwuberu iya nū. Mbụ-a; g'ọ hẹe ya oke labo; l'iphemiphe, o nweru enweru; kele ọo nwata ono bụ nwa mbu, goshiru l'ọ dūje ike yee ime. Iphe, rwuberu ọkpara bukwa iya nwe iya."

Nwa, kariru ndu nwuru iya nū ẹka

¹⁸"Ọ -būru lẹ nemadzu nwutaru nwa, kariru iya ẹka; k'ophu bụ l'ọ tọo ngadụ nchị l'opfu ndu nwuru iya nū; mbu l'ọ too mejedu iphe, nna iya pfuru; ophu o medu iphe, ne iya pfuru; temanu; teke ephe chiru iya iphe; o too yeduru phe onu; ¹⁹ge nna iya; yee ne iya kpatakwa iya kpujeru ndu bụ ogerenya l'onu-abata mkpukpu phe. ²⁰Ephe asu ndu bụ ogerenya mkpukpu ono: 'Nwatibe anyi-a kariru anyi ẹka; k'ophu bụ l'ọ tọo ngajedu nchị l'opfu anyi; ophu oomejedu iphe, anyi suru g'ọ mee. Ọ bụ oke-ekpiri; teme ọ ngunuka mee.' ²¹G'unwoke mkpukpu ono g'ephe ha wufuta; woru iya tugbua lẹ mkpuma. Ọ kwa egube ono be unu e-shije wofu ejo-iphe l'echilabo unu; k'ophu ndu Izurelu l'ophu a-numa iya; tsuhu ebvu."

Ekemu, du iche iche

²²"Ọ -būru lẹ nemadzu meru iphe, ọ gbaru g'ọ nwuhu; e woru iya gbua; unu kobe odzu onye ono l'eli oshi; ²³g'odzu iya te kokwaru l'eli oshi l'eka ono jasụ nchị abohu. Unu likwaa ya mboku ono gedegede; kele onye koru l'eli oshi be bụ onye Chileke turu onu. Unu te emerwushikwa ali ono, Chipfu, bụ Chileke unu abya unu anunu; g'ọ buri okiphe unu ono."

22 ¹"Ọ -būru l'ị hūmaru eswi; ozoo aturu nemadzu ibe ngu l'eka ookpaphuhu akpaphuhu; te emekwa enya g'ị ti hūmaduru iya; kukebekwa ẹhu kpata iya kpuphuru nwibe ngu ono azu. ²Teke ọ bụ l'onye ono te ebukubedu ngu ntse; ozoo l'ị ti madu onye obu; kpata iya laa ibe ngu je edobe jasụ teke onye ono a-choru iya bya; l'ị kpuru iya nū iya. ³Nokwapho g'ii-meje nkapfu-igara iya; ọ bukwarupho nno bụ g'ii-meje uwe iya; mekpoo iphemiphe, bụ ke nwibe ngu, tuphahuru etuphahu; mbu ophu tuphahuru nū; i hūma iya. Te emekwa enya g'ị ti hūmaduru iya.

⁴"Ọ -būru l'ị hūmaru nkapfu-igara nemadzu ibe ngu; ozoo eswi iya l'eka ọ daru l'aguga gbororo; te emekwa enya g'ị ti hūmaduru iya. Kukebekwa ẹhu je eyeru onye obu ẹka g'ọ palia ya.

⁵"Ge nwanyị ta akwajekwa ngwa nwoke; ophu nwoke akwajekwa ngwa nwanyị; kele onye eme iphe, du nno bukwa ebyi be oome l'iphu Chipfu, bụ Chileke unu.

⁶"I -nođu aghata lẹ gbororo; i hūma epfune enu, kparu l'eli oshi; ozoo l'ali; ọ buri unwu enu no iya; ozoo l'ọ bukwađu ẹkwa iya; ne iya kpuru

l'eli unwu iya ono; ọzoo l'eli ẹkwa iya ono; ba anwūpyabekwa ne ẹnu ono; yee unwu iya. 7Kukebekwa ẹhu kpatsu ne iya g'ọ p'hefu; l'ị nwūtawaro unwu iya; k'ọphu ọo-duru ngu lẹ ree; waa k'ọphu ịi-karịberu nka.

8“Ị -nọdu akpū ụlọ ọphúú; kpúsakwaa uko iya ọsa; swia ya ọnu mgburugburu; g'ọ tọ dū onye e-shi l'ẹka ono wefu bya adaa; g'ọchi ta akwa l'ụlọ ngu ono.

9“Ị -gbaa opfu-vayinu; ta akukwa iya iphe ẹghirigha. I -mee ya nno be aa-natakwa ngu mebyi iphe ono, ị kọru ono; natakwa ngu phọ akpuru, vayinu ngu mītaru je edobe l'ụlọ, dū nsọ.

10“Te eligbabejekwa eswi yee nkafu-igara gude atupya alị mgbo lanu.

11“Te eyejekwa uwe, a kwaru ẹghirigha; dū gẹ l'e wotaru ẹkwa baragidi je akwagbabe lẹ gerebe-gerebe ẹkwa mmanu.

12“Kpajekwaru ịyanguyangu ye lẹ mgbureku uwe mgbalanu ngu ishi ẹno.”

Emebyi k'alulu

13“Ọ -buru lẹ nwoke lutaru nwanyi; ephe lẹ nwanyi ọbu kwachaepho; ọ kpoo ya ashi; 14boaha ya ibo gude epfubyishi iya su: ‘Mu lutaru nwanyi-a; mu jepfu iya; ọphu ọ dudu iphe, egoshi l'o shi buru nwamgboko, yele nwoke teke akwaswee.’ 15Gẹ nna nwamgboko ono yee ne iya gude iphe, egoshi lẹ nwamgboko ono shi buru onye yele nwoke teke akwaswee je egoshi ndu bu ọgerenya l'onu-abata mkpukpu. 16Nna nwamgboko ono asu ndu bu ọgerenya ono: ‘Nwa mu nwanyi-a be mu keru nwoke-a; ọle nta-a be nwamgboko ono dūwaa iya ashi. 17Ole-a; unu lewaro lẹ nta-a be ọ wataru iya ebo ibo asuje lẹ nwatibe mu ọbu ta adukwa iphe, egoshi lẹ yele nwoke teke akwaswee! Ole ọ bu; wakwa iphe, egoshi lẹ nwatibe mu ọbu be yee nwoke teke akwaswee baa.’ Ephe abya eworu ẹkwa ono phushi l'iphu ndu bu ọgerenya mkpukpu ono. 18Ndu bu ọgerenya mkpukpu ono akputa nwoke ono chia ya echachi; 19reta iya nre ukporo mkpola-ochaa ise; woru nu nna nwamgboko ono; noo kele nwoke ono boru nwamgboko Ịzurelu ibo. Nwamgboko ono aburu nyee ya ẹka ọ bu iya; ọphu ọ byadu achifubaa nwanyi ono jasū g'ọo-no-beru.

20“Ole ọ -bukwanuru l'ibo ono, e boru iya ono bu eviya; k'ọphu bu l'ọ tọ dudu iphe, e gude goshi lẹ nwamgboko ono be yele nwoke teke akwaswee; 21oo ya bu; g'ephe kpufutakwa nwamgboko ono l'onu ẹswulo l'ibe nna iya; unwoke mkpukpu iya atua ya mkpuma; woru iya tugba; kele o meru ejo ememe l'alị Ịzurelu. O shi nọdu l'ibe nna iya agba ukpara. O kwa ẹgube ono be unu e-shije wofu ejo-iphe l'echilabo unu.

22“Ọ -buru l'e ge-chiru nwoke l'ẹka ephe lẹ nyee onye ọzo akwa; g'e gbukwaa nwoke ono, jepfuru nwanyi ọbu; yee nwanyi, o jepfuru egbu. O kwa ẹgube ono be unu e-shije wofu ejo-iphe l'alị Ịzurelu.

23“Ọ -buru lẹ nwamgboko, yele nwoke teke akwaswee; mbu nwamgboko, e jebuwaru k'alulu; be yele nwoke ọzo kwaru l'ime mkpukpu; 24unu

tùkòkwa èphenebo kpùta kpùfu l'ònu-abata mkpùkpu ono; tùkò èphenebo tù-gbukòta lẹ mkpuma. Nwamgbòko ono bẹ aa-tù-gbu; noo kẹle ọ nọ l'oma mkpùkpu ọphu o chiduru mkpu. Nwoke bẹ aa-tù-gbukwaphò; kẹle o merwuru nyee onye ọzo. Ọ kwa egube ono bẹ unu e-shije wofu ejo-iphe l'echilabọ unu.

²⁵“Obenu; ọ -bùru l'ọo l'azụ ẹgu bẹ nwoke guderu nwamgbòko, onye ọzo jebuwaru k'alùlu; ẹphe l'iya kwaa; bukwa nwoke kpoloko bẹ ee-gbu. ²⁶G'ọ tọ dukwa iphe, unu e-me nwamgbòko ono; ọ tọ dukwa iphe-ẹji, o metaru, ee-gude gbua ya. Noo kẹle ọwa-a dukwapho g'onye je afàru nemadzù ibiya l'uzo; gbua. ²⁷Mbù lẹ nwoke ono guderu nwamgbòko ono, onye ọzo jebuwaru k'alùlu ono l'azụ ẹgu; o chia mkpu; ọphu ọ dudu onye nafutaru iya nu.

²⁸“Ole ọ -bukwanuru lẹ nwoke zuguderu nwamgbòko, adudu onye eje iya nu; ẹphe l'iya kwaa; a hùma phẹ; ²⁹gẹ nwoke ono pfùkwaa nna nwamgbòko ono ọkporo shẹkelu mkpòla-ọchaa labọ lẹ shẹkelu mkpòla-ọchaa iri. G'onye ọbu lùkwaru nwamgbòko ono; noo kẹle o mebyishiwaru iya. Ọphu ọ byadu achifu nwamgbòko ono gbiriri jasù g'ọo-nọ-beru.

³⁰“Gẹ nwoke ba lùkwa nyee nna iya; shi nno mee nna iya iphe-iphere.”

Ebufu nemadzù lẹ ndzuko

23 ¹“G'onye e tsupyarù akpùru-anwù; ọzoo onye e bufuru útsù ta abatajẹkwa l'ẹka ndu kẹ Chipfu dzukọberu.

²“G'ọ tọ dukwa onye a gbatarù l'ùkpara; abatajẹ l'ẹka ndu kẹ Chipfu dzukọberu. Ọphu oshilọkpa iya; mbù je eyee l'ogbo k'iri abatajẹkwa l'ẹka ndu kẹ Chipfu dzukọberu.

³“G'ọ tọ dukwa onye Amọnu; ọzoo onye Mówabu, abatajẹ l'ẹka ndu kẹ Chipfu dzukọberu; ọphu oshilọkpa phẹ jeye l'ogbo k'iri abatajẹkwa; mbù g'ẹphe ta abatajẹkpo l'ẹka ndu kẹ Chipfu dzukọberu jeye l'ojejoje. ⁴Noo kẹle ẹphe te egudedu nri; yẹ mini gbaa unu ndzuta teke unu shi l'alì Ijiputu. Iphe, ẹphe meru bù l'ẹphe gbẹchia je ebuta Belamu nwa Beyọ, shi mkpùkpu Petọ l'alì Mesopotémiya g'ọ bya atọ unu ọnu. ⁵Obenu lẹ Chipfu, bù Chileke unu ta ngabẹduru Belamu nchi; ọ gbẹ-chia ghazia ọnu ono; ọ bùru ọnu-oma; kẹle Chipfu, bù Chileke unu yeru unu obu. ⁶Unu ta achọkwa ọzo, ee-shi g'ẹhu dù phẹ guu; ọzoo g'ọ dùru phẹ lẹ ree jasù g'unu a-nọ-beru.

⁷“Gẹ ndu Edomu ta adùkwa unu ashì; noo kẹle ẹphe bù unwune unu. Ọphu ndu Ijiputu adùkwa unu ashì; noo kẹle unu shi bùru ndu Iwarù alwalwa l'alì phẹ. ⁸G'a hajẹkwa oshilọkpa phẹ ogbo k'eto g'ẹphe bata l'ẹka ndu kẹ Chipfu dzukọberu.”

Eme ọdu-ọgu g'ọ tọ dù ideyideyi

⁹“Ọ -bùru l'unu jepfuru ndu ọhogu unu ọgu; unu dọkwaduru l'ọdu-ọgu unu; unu kwabẹkwa ẹnya g'unu te eye ẹka l'eme ejo-iphe. ¹⁰Ọ -bùru l'ọ

nweru onye lanụ l'echilabọ unu, byaru bya aburu onye aaso nso; kele o gboru unwuda kpua onwiya l'enyashi; g'onye ono lufukwa je anodu lazụ odu-ogu; g'o to nodukwa l'ime iya. ¹¹O -be l'uzenyashi l'o gude mini wua ehu. Enyanwu -nyihuchaepho; l'o batawaro l'odu-ogu ono.

¹²“Unu eje lazụ odu-ogu ono je emeta eka unu e-jeje ejelukpo. ¹³Unu yekobeje ikworo le ngwogu unu; oo ya bu g'o buru; onye eje anyi nshi; l'o gude ikworo ono tua nsu; nyiru iya yee; ghakobe woru iya kpochia. ¹⁴Noo kele Chipfu, bu Chileke unu etsojeru oma odu-ogu ejephe; adzo unu ndzu; waa g'o woru ndu ohogu unu ye unu l'eka. Noo g'o gude; odu-ogu unu je ladu nso; g'o to huma iphe, aaso nso l'eka unu no; dakobe paru unu haa.”

Unwu ekemu ozo

¹⁵“Ohu -shi l'eka nnajiuphu iya gbapfuta ngu; ta akputakwa iya kpu-puru nnajiuphu iya ono azu. ¹⁶Hakwaa ya g'unu l'iya buru; l'o buru l'eka du iya ree le mkpukpu, dukpoe ya pho ree. Ophu a kpakwa iya ehu.

¹⁷“G'o to dukwa unwada Izurelu onye a-nodu agbaru agwa ukpara; ophu o dukwa onye nwoke Izurelu a-nodu agbaru agwa ukpara. ¹⁸Mbu-a; g'e be wotajekwa ugwo, a pfuru nwanyi-ovuoba; ozoo ugwo, a pfuru nkuta-urwuali ono; gude bya l'ulo Chipfu, bu Chileke unu bya apfu ugwo iphe, unu riburu l'angu k'ememe; kele ephenebo bu ebyi lenya Chipfu, bu Chileke unu.

¹⁹“Be jiekwa onye Izurelu ibe ngu ugwo ntukwase; ntukwase l'okpoga; ozoo ntukwase le nri; ozoo l'iphemiphe, bukpoo iphe, eejieje ugwo ntukwase. ²⁰Onye ii-jie ugwo ntukwase bu onye ohozo; obenu l'onye bu nwune ngu be i tii jiedu ntukwase; oo ya bu ge Chipfu, bu Chileke ngu ekebe ngu l'oma l'iphemiphe, i biyibekporu eka ememe l'ali ono, iije alwu-ta ono.

²¹“O buru l'i riburu angu emeru Chipfu, bu Chileke ngu iphe; ta akpokwa upfu ememe iya; kele Chipfu, bu Chileke ngu a-wata ele ngu enya gi mee ya; teme li buru onye-ikpe nmaru l'i meru iphe-eji. ²²Ole o -bukwanuru l'i selaru onwongu azu l'eribu angu eme iphe; be ikpe ta nmakwaru ngu. ²³Iphe, shikpowa ngu l'ogbogboromonu futa; letakwa enya gi meebekota iya. Noo kele oo gubedua turu obu ngu onyo gudekpoo onu ngu gedegede ribuaru Chipfu, bu Chileke ngu angu.

²⁴“O buru li bahuru l'opfu-vayinu nemadzu ibe ngu; ritakpoeppo akpuru vayinu g'o dukpoe ngu pho ree; ole g'o to dukwa ophu ii-ye le nkata ngu. ²⁵Teke i -bahuru l'egu nemadzu ibe ngu; o -du ngu gi wota iphe, o kuru akuku ria; wotakwa iya; ole g'o to dukwa upfu iphe ono ophu ii-gude mma gbutsua.

24 ¹“O -buru le nwoke luchaaruru nwanyi; ophu nwanyi ono aduedu iya ree; kele o humaru iphe, adudu ree l'ehu nwanyi obu; o bya

ederu ẹkwo achifu nwanji nu iya; bya achifu iya; ²o -buru l'ọ lufuru g'o jero je aluru nwoke ozo; ³teke o bukwanu l'onye k'ono byakwarupho bya akpo ya ashi; bya edekwapho ẹkwo achifu ozokwa bya eyekwa iya pho l'eka; bya achifukwa iya pho l'ibe iya; ozoo l'onye k'ono bu anwuhu be o nwuhuru; mbu onye k'ono, shi duta iya alu alulu ono; ⁴ge ji iya ke mbu pho, chifuru iya nu pho ta laphukwa azu jeshia ya alulu g'e merwushichawaru iya ono; kele o bukwa ebyi l'iphu Chipfu. Unu te emetakwa ebyi kpube ali ono, Chipfu, bu Chileke unu abya unu anunu g'o buru okiphe unu ono.”

Ekemu, du iche iche

⁵“O -buru le nemadzu luru nwanji k'ophuu; g'e te zikwa iya g'o je ogu; ophu o dukwa ozi ozo, ee-zi iya. G'onye ono no-gbukwaa mgbarapha l'unuphu; mee nyee ya ono, o lutaru ono g'ehu tsoo ya utso.

⁶“Ge nemadzu ta patakwa mkpuma, egweje nri; ozoo nggu-mkpuma; g'o buru iphe, e yeru iya l'itumo; kele ono dukwaa g'onye woru ishi nemadzu ophu sibe l'itumo.

⁷“O -buru le nemadzu be e guderu l'eka o pataru onye Izurelu ibe iya l'oshi eme iya g'ohu; ozoo loore onye obu erere; g'e gbukwa onye opaleda ono egbugbu. O kwa egube ono be unu e-shije wofu ejo-iphe lechilabo unu.

⁸“O -buru onye ehu-ochaa byaru; unu letakwa enya mee iphemiphe, ndu-uke, bu oshilokpa Livayi suru g'unu mee. Unu tukokpoepho iphemiphe, mu turu phe ekemu su g'ephe meje mekota. ⁹Unu nyatakwa iphe, Chipfu, bu Chileke unu meru Miriyamu teke unu no l'uzo; g'unu wufuta-charu l'ali Ijiputu.

¹⁰“Teke i jieru nemadzu ibe ngu ugwo; m'obeta o buru ugwo, du idu-agma; ta abahukwa l'ulo iya je ewota iphe, o siberu ngu l'itumo. ¹¹No dukwa letezi g'onye obu, i jieru ugwo obu wofutaru ngu iphe, o siberu ngu l'itumo obu. ¹²O -buru l'onye obu akpa nri; te egudekwa iphe ono, o yeru ngu l'itumo ono lashia unuphu je akwaa ge nchi bohu. ¹³Nchi-jihushia; wophutakwaru iya ukpo ono, o yeru ngu l'itumo ono azu; k'ophu oo-ze iya; kua mgbenya; goru onu-oma nu ngu. Oo ya bu g'a guaru ngu iya l'apfubekoto l'iphu Chipfu, bu Chileke ngu.

¹⁴“Onye adudu g'o du iya; o nodu akpa nri -byaru ngu ozi; te emekwa iya omeliwe; m'obeta onye obu buru onye Izurelu ibe ngu; ozoo onye lwaru alwalwa, bu l'ali unu l'ime mkpukpu unu. ¹⁵Pfujekwa iya aswa ogburumita iya; teme enyanwu anyihu mbokumboku; kele onye obu akpa nri; o gbawaru aswa ozi iya ono ye le mkpa. Teke odumeka be oo-chikukwa ngu lejo mkpu l'iphu Chipfu; iphe obu aburu ngu iphe-eji, iimeta iya.

¹⁶“Ge ndu bu nna ta lajekwa l'iphe, nwa phe metaru; ophu unwu alajekwa l'iphe, nna phe metaru. G'onye metaru iphe onwu lajekwa l'iphe, o meru.

17“Unu ta anafujekwa nemadzū iswi-odumma iya opfu l'ọ bụ onye lwaru alwalwa; ọzoo onye enwedu nna; ọphu unu anatajekwa ekwa nwanyi, ji iya anọedu l'itumo. 18 Unu nyatajekwa l'unubedua shi buru ohu l'alị Ijiputu; Chipfu, bụ Chileke unu gbata unu l'eka ono; noo iphe, meru g'ọ gude mu nọdu aturu unu ekemu epfu g'unu meje iphemiphe ono.

19“Unu -nọdu akpata iphe, unu meberu l'opfu unu; unu zohaa tiyoti-yoo iya ọphu l'egu; unu ba laphuhakwa azu je iya achita. Unu hajekwa iya g'ọ duru ndu lwaru alwalwa; yee ndu nna phe anọedu; yee unwanyi, ji phe anọedu; k'ọphu Chipfu, bụ Chileke unu e-kebe unu l'oma l'iphemiphe, unu byiberu aka unu k'ememe. 20 Unu -nọdu aji-koshi akpuru, miru l'oshi olivu unu; unu ta ajijekwa iya nji labo. Unu hakwa ọphu phoduru nu g'ọ duru ndu lwaru alwalwa; yee ndu nna phe anọedu; yee unwanyi, ji phe anọedu. 21 Teke ọ bụ l'unu awo akpuru vayinu l'opfu-vayinu unu; unu te ejekwa mkpakwa iya m'e mechaa. Unu hajekwa ọphu phoduru nu g'ọ duru ndu lwaru alwalwa; yee ndu nna phe anọedu; me unwanyi, ji phe anọedu. 22 Unu nyatajekwa l'unubedua shi buru ohu l'alị Ijiputu; noo iphe, meru g'ọ gude mu nọdu aturu unu ekemu epfu g'unu meje iphemiphe ono.”

Ekemu k'echi nemadzū echachi

25 1“Ọ -buru l'umadzu labo be opfu adaru; g'ephe gude iya je l'ulo-ikpe ge ndu-ikpe kpeeru phe iya; haaru onye ọphu iswi du mma enge; nma onye ọphu achọ opfu ikpe. 2 Teke ọ bụ l'onye ọphu ikpe nmaru be ọ gbaru g'e chia iphe; g'onye-ikpe mekwaa ya g'ọ zee aze; g'e chia ya iphe obu l'iphu iya; chia ya onu echachi ole yele iphe o meru ha. 3 Iphe, ee-chi iya bụ onu echachi ukporo labo. G'e te chighatakwa iya egube ono. E -chighata iya egube ono be ọ buakwaa eme nwune ngu ono g'ọ to dudu iphe, ọ bụ l'iphu ngu.

4“Te ekechijekwa eswi onu me ọ -nọdu azoshiru ngu ereshi.”

Onye nwune iya nwuhuru; gbado nyee ya

5“Ọ -buru l'unwune labo bu; onye lanu nonyaa bya anwuhu; ebe ọ nwuta nwa; ge nyee ya ta lukwa ndu unuphu ozo. Ge nwune ji iya dutakwa iya luru; lajeru iya l'ulo. Nwune ji iya ono eshi nno medzukoata iphe, gbaru iya nu l'ehu nwanyi ono. 6 Nwa nwoke mbu, ọ nwutaru; mbu nwanyi ono be a-zaru epha la l'epha nwune iya ono, nwuhuru nu ono g'epha iya te echihu l'alị Izurelu. 7 Ọle ọ -buru l'ọ to dudu onye ono g'ọ luru nyee nwune iya ono; ge nwanyi ono jepfu ndu bụ ogerenya mkpukpu ono l'onu-abata mkpukpu ono je asu phe: 'Nwune ji mu jikawaru eme g'epha nwune iya te echihu le Izurelu. Ọ jikawaru le ya te emeduru mu iphe, nemadzū emejeru nyee nwune iya.' 8 Ọo ya bu; ndu bụ ogerenya mkpukpu ono ekua nwoke ono; pfuaru iya opfu. Ọ -buru l'iphe, oopfu be oopfu

epfushi iya ike; sù lẹ ya ta abyakpòdaa alùru nwanỳì onò m'obeta gùnù mee; ⁹gẹ nyee nwune iya onò gbẹshi l'atatiphu ndu bụ ọgerenya onò je eyeta akpòkpa nwoke onò nanù; gbùta ọnu-mini tụa ya l'iphu sù: 'Noo iphe, eemeje onye ta chọduru eme g'unuphu ibe nwune iya keru bụ onò.' ¹⁰Iphe, ee-ku ibe nwoke onò lẹ Ízùrelù bụ 'ibe onye e yetarù akpòkpa.'

¹¹"Ọ -bùru l'unwoke labọ alwù ọgu; nyee onye lanù byatashia ọdzori ji iya; bya azù nwoke ọphu l'ẹhu-nwoke; ¹²g'e gbubufukwa nwanỳì onò ẹka; g'a ta aphukwaru iya obu-imemini.

¹³"Unu te eyejekwa iphe, eegudeje atù ẹrwa iphe ụzọ labọ l'ẹda unu; ọphu bụ ọkpobe iya; mẹ ọphu abụdu ọkpobe iya. ¹⁴Ọphu unu enwekwaru iphe, eegudeje akpọ iphe ụzọ labọ l'ibe unu; ọphu bụ ọkpobe iya; mẹ ọphu abụdu ọkpobe iya. ¹⁵Unu gudeje ọkpobe iphe, ụgho adudu tụa ẹrwa iphe. Unu egudejekwaphọ ọkpobe iphe, ụgho adudu; kpọo iphe; k'ọphu unu a-nọriberu ndzù l'alì onò, Chipfu bụ Chileke unu abya unu anunu onò; ¹⁶kele iphe, bukpo onyemonye, eme ẹgube iphe onò; mbukpoo onyemonye, eme iphe l'ụgho emekotakwa ẹbyi l'iphu Chipfu, bụ Chileke unu."

A tųru ekemu g'e gbushia ndu Amalẹku

¹⁷"Unu nyatakwa iphe, ndu Amalẹku meru unu teke unu nọ l'uzọ; g'unu lufutacharu lẹ Ijiputu. ¹⁸Ọ bụ teke ike ije bvụwaru unu; ọphu ike aduziedu unu bẹ ẹphe shiru unu azù byapfuta unu ọgu l'uzọ; gbushia ndu ọphu kpe azù; ọphu ẹphe atsuduru Chileke ebvu. ¹⁹Ọo ya bụ; Chipfu, bụ Chileke unu -meephọ; unu nweru onwunu l'ẹka iphe, bụ ndu ọhogu unu, bupheru unu mgburugburu l'alì onò, ọobyia unu anunu onò; g'ọ bụru okiphe unu onò; unu mekwaa g'a ta nyatabahẹ ndu Amalẹku lẹ mkpula akpaminigwe. Unu ta azọhakwa iya ememe!"

Akpuru-iphe-mbụ; waa oke-lanù-l'uzọ-iri

26 ¹"Ì -bahuepho l'alì onò, Chipfu, bụ Chileke abya unu anunu g'ọ bụru okiphe unu onò; mbụ unu -nataẹ ya phọ buru; ²hatajekwa akpuru-iphe-mbụ l'iphe, i kotakpooru l'alì onò, Chipfu abya ngu anunu onò; chiru ye lẹ nkata; vuru je l'ẹka Chipfu, bụ Chileke ngu a-họta; dobe ẹpha iya; buru iya eburu. ³L'i vuru iya jepfu onye bụ onye uke teke onò je asù iya: 'Ntanù-a bẹ mu pfụwaru epfuru Chipfu, bụ Chileke ngu lẹ mu lwarwutaru l'alì onò, Chipfu riru nna anyi oche pẹ angù lẹ ya a-nù anyi onò.'

⁴"Onye uke onò anata ngu nkata onò; sùbe l'atatiphu ọru-ngweja Chipfu, bụ Chileke ngu. ⁵L'i nọdukwapho l'atatiphu Chipfu, bụ Chileke ngu pfua sù: 'Nnana mu shi bụru onye Arámu, aghaphe aghaphe. O gude ndu ha nwanshii laa Ijiputu je aburu onye lwarù alwalwa l'ẹka onò. Ọ bụru l'ẹka onò bẹ o je eburu; bụru oke mba, ọkpehu dù; teme ẹphe dù

igwerigwe. ⁶Obenu lẹ ndu Ijiputu nuru anyi aphụ; bya emee g'anyi jee iphe-ehuka; mee g'anyi jee ozi mkpõnwu-ehu. ⁷Tõbudu iya bụ; anyi chia mkpu raku Chipfu, bụ Chileke kẹ nna anyi oche pẹ. Chipfu numa olu anyi; bya ahuma iphe-ehuka, anyi eje; waa ozi mkpõnwu-ehu, anyi eje; mẹ g'e gude emebe anyi ewere. ⁸No iya; Chipfu bya egude ike mẹ agburẹ-hu iya; yee ebvu, ooye; yee iphe-ohubama; mękpoo iphe, dũ biribiri; gude dufuta anyi lẹ Ijiputu. ⁹Ọ bya edubatawa anyi l'eka-a; bya eworu alı-a nũ anyi; mbũ alı, bũ mini ẹra-eswi yee manũ-ẹnwu aso iya gborogboro-a. ¹⁰Nta-a bẹ mu wotawaru ngu akpuru-iphe-mbũ, shi l'iphe, mu meberu l'alı-a, gũbe Chipfu nuru mu-a.' Lı bya eworu iya dobe l'iphu Chipfu, bũ Chileke ngu; bya abaarũ Chipfu, bũ Chileke ngu ono ẹja. ¹¹Lı bya etee ẹswa iphemiphe ono, dũ ree ono, Chipfu, bũ Chileke ngu nuru gũ lẹ ndibe ngu ono. Ndu Lıvayi; mẹ ndu lwarũ alwalwa, unu l'ephe bu etekwapho ẹswa."

Ụzo-lanụ-l'uzo-iri k'apha k'eto

¹²"I -pfuchaa oke-lanụ-l'uzo-iri l'iphemiphe, i setarũ l'apha k'eto, bũ apha, aapfuje oke-lanụ-l'uzo-iri; mbũ; i -wochaaru iya nũ ndu Lıvayi; yee ndu lwarũ alwalwa; yee ndu nna pẹ anọedu; mẹ unwanyi, ji pẹ anọedu; k'ophu ẹphe a-nọdu lẹ ndunu eriji ẹpho; ¹³l'i nọdu l'iphu Chipfu, bũ Chileke ngu pfua sũ: 'Mu wofuakwaru iphe ono, dũ nsọ ono l'ulo mu; teme mu wowaru iya nũ ndu Lıvayi; waa ndu lwarũ alwalwa; mẹ ndu nna pẹ anọedu; mẹ unwanyi, ji pẹ anọedu, bũ ekemu, ı tũru nũ mu. Ọ tọ dukwa ekemu ono, ı tũru nũ mu ono, dũru ophu mu etsotaduru; ophu o dukwa ophu mu zoharu. ¹⁴Ọ tọ dukwa oke-lanụ-l'uzo-iri ono ophu mu riru teke mu nọ l'aphũ; ophu o dukwa ophu mu wofuru teke mu bũ onye aasọ nsọ; ophu o dudu ophu mu nũjeru ndu maa. Mu meerupho olu Chipfu, bũ Chileke mu; mbũ l'oo iphemiphe, ı sũru gẹ mu mee bẹ mu meru. ¹⁵Shinu l'ibe ngu ono, dũ nsọ ono lezeta ẹnya; mbũ-a; shinu l'imigwe lezeta ẹnya; goru onu-oma nũ ndibe ngu ono, bũ ndu ızurelu; lı goru onu-oma nũ alı ono, ı nũru anyi ono, bũ alı, mini ẹra-eswi yee manũ-ẹnwu aso gborogboro ono; eshinu ono bũ iphe, i riru nna anyi oche pẹ angũ iya.'

¹⁶"Ntanũ-a bẹ Chipfu, bũ Chileke ngu tũwaru ngu ekemu sũ g'i meje iphe-a, ya toru okpa iya sũ g'e tsoje-a; waa iphe-a, ya sũru g'e meje-a. Zikwaa obu l'alı; gude ndzũ ngu g'ọ ha yele obu ngu g'ọ ha meje iphemiphe ono. ¹⁷Ntanũ-a bẹ ı pfuwaru kẹ Chipfu hoo haa; sũ l'oo ya bũ Chileke ngu; l'oo uzo, o toru bẹ ıi-nọdu etso; eme iphe, o toru okpa iya sũ g'e meje; emekwapho iphe, o tũru l'ekemu; mękpoo iphe, o sũru g'e meje; teme l'i mekwapho olu iya. ¹⁸Teme Chipfu bya epfuakwaa ya hoo haa ntanũ-a; sũ l'unu bũwaa ndibe iya, ya nwe k'iche, bũ iphe, o kwehawaru unu ukwe iya; bya asũ g'unu mekotaje iphe, o sũru g'unu meje l'ophu. ¹⁹Ozo bũ lẹ ya e-me g'unu ha shii; kakota ohamoha ozo, ya meru ememe shii. Unu aka

phẹ enweru ẹpha; ọha m'ọha ono aka unu etu ẹpha; ka unu akwabẹ ùbù. Unu abùru ọha, dùru Chipfu, bụ Chileke unu nsọ, bụ iphe, o pfuhawaru.”

Oru-ngweja, nọ l'úbvú Ebalu

27 ¹Noo ya; Mósísu yẹ ndu bụ ọgerenya ndu Ízurelu bya atọaru ndu Ízurelu ono ekemu-a; sù phe: “Unu tọkọkwa ekemu-a, mu atọru unu ntanụ-a dobekọta. ²Teke unu gharu ẹnyimu Jíọdanu bahù l'ali ono, Chipfu, bụ Chileke unu abya unu anọnu ono; unu patachaa mkpuma, ha shii kpọkobe; unu emeta ọrwa gude rwa ya arwarwa. ³Unu woru ekemu-a g'ọ ha dekọta iya mẹ unu ghachaephọ ẹnyimu ono bahù l'ali ono, Chipfu, bụ Chileke unu abya unu anọnu ono; mbụ ali ono, ẹra-eswi yẹ manụ asọ gborogboro ono. Ono bụ iphe, Chipfu, bụ Chileke nna unu oche phẹ kweru unu ukwe iya. ⁴Ọo ya bụ; teke unu dachaerupho ẹnyimu Jíọdanu; unu akpọkobe mkpuma ono, mu atọru unu ekemu iya ntanụ ono. Ọ bụru l'eli úbvú Ebalu bẹ unu a-kpọkobe iya. Unu egude ọrwa rwa ya arwarwa. ⁵Ọ bụru l'ẹka ono bẹ unu a-kpuru Chipfu, bụ Chileke unu ọru-ngweja. Ọ bụru mkpuma bẹ ee-gude kpua ya; mbụ mkpuma, adudu iphe, e meru l'igwè, a kujeru iya. ⁶Ọ bụru mkpuma, furu ophu bẹ unu e-gude kpuru Chipfu, bụ Chileke unu ọru-ngweja ọbu. Teme ọ bụru l'eli iya bẹ unu egweje ngweja-akpọ-ọku; nù Chipfu, bụ Chileke unu. ⁷Unu gwejekwaphọ ngweja-ẹhu-guu l'ẹka ono. Unu atọko nọdu l'ẹka ono ria ya; tee ẹswa l'iphu Chipfu, bụ Chileke unu. ⁸Unu tọkọkwa ekemu-a g'ọ ha dekọta g'ọ shia ekiri lẹ mkpuma ono, unu kpọbegbaaru ono.”

Mburonu, a nọ l'úbvú Ebalu togbo

⁹Mósísu waa ndu-uke, bụ oshilọkpa Lívayi bya epfuru yeru ndu Ízurelu l'ophu; sù phe: “Unu gebekwa-o; unubẹ ndu Ízurelu; unu ngabekwa nchị. Ntanụ-a bẹ unu buakwaa ndibe Chipfu, bụ Chileke unu. ¹⁰Ọo ya bụ lẹ-a; unu mejekwa olu Chipfu, bụ Chileke unu. Unu dobekwa ekemu iya; meje iphe, ọ tọru ọkpa iya sù g'e tsoje, bụ iphe, mu atọru unu ekemu iya ntanụ-a.”

¹¹Ọ bukwarupho mbọku ono bẹ Mósísu tọru ndu Ízurelu ekemu sù: ¹²“Teke unu dachaerupho ẹnyimu Jíọdanu; waa ọkpa-ipfu, a-pfuru l'eli úbvú Gerizimu goru ọnu-ọma nù ndu Ízurelu baa: Ọkpa-ipfu Simiyonu; waa ipfu Lívayi; waa ipfu Jiuda; waa ipfu Isaka; waa ipfu Jíósefu; waa kẹ Benjiaminu. ¹³Ọkpa-ipfu ọwa-a a-buru ndu ophu a-pfuru l'eli úbvú Ebalu togbo mburonu: Ọkpa-ipfu Rúbenu; waa ipfu Gadu; waa ipfu Asha; waa ipfu Zebulun; waa ipfu Danu; waa kẹ Nafutali. ¹⁴Ndu Lívayi ewolia olu; raarụ iya unwoke ndu Ízurelu l'ophu arara sù:

¹⁵“Mburonu dùru onye edobe ntekpẹ, a pyiru apyipyi; ọzoo ophu a kpuru akpukpu. Iphe ono bukwa eme ẹbyi l'iphu Chipfu; mbụ iphe ono, bụ ndu eme ọna bẹ meru iya nù; bya eworu iya dobe; agwa lẹ mpya!”

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

16 “ ‘Mburõnu dũru onye nmarũ nna iya; õzoo ne iya phulaphula!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

17 “ ‘Mburõnu dũru onye wofuru mkpuma oke alĩ nemadzũ ibiya!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

18 “ ‘Mburõnu dũru onye dusweru onye atsũ ishi ỳzo!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

19 “ ‘Mburõnu dũru onye anafũje nemadzũ iswi-õduma; opfu l'ò bũ onye lwarũ alwalwa; õzoo onye nna iya anõedu; õzoo nwanyĩ, ji iya anõedu!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

20 “ ‘Mburõnu dũru onye jepfuru nyee nna iya; noo kẹle ọo nna iya bẹ o meru iphe-iphere.’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

21 “ ‘Mburõnu dũru onye jepfuru anũ; ỳdu anũ, ọ bũhabe!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

22 “ ‘Mburõnu dũru onye jepfuru nwune iya nwanyĩ; m'obeta ọ bũru ada nna iya; õzoo ada ne iya!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

23 “ ‘Mburõnu dũru onye jepfuru ne nyee ya!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

24 “ ‘Mburõnu dũru onye gburu nemadzũ ibiya lẹ mpya!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

25 “ ‘Mburõnu dũru onye natarũ ỳphalazu je egbua onye adũdu iphe, o meru!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’

26 “ ‘Mburõnu dũru onye atũkoduru iphemiphe, a tũru l'ekemu-a emekõta!’

“Ndu Ízurèlu atũko g'ẽphe ha sũ: ‘G'ò dũ ẽgube ono-o!’ ”

Obunggo, ee-bu onye emeje iphe,

a sũru g'ò mee

(Uke 26:1-13; Dit 7:12-24)

28 ¹“Teke ọ bukwanu l'unu ngabẹru nchĩ ọkpobe angabẹ l'olu Chipfu, bũ Chileke unu; kwabẹru ekemu iya g'ò ha ẹnya; eme iya ememe; mbũ ekemu ono, mu atũru unu ntanũ-a ono; bẹ Chipfu, bũ Chileke unu e-me g'unu kakõta ọhamoha, nõgbaa lẹ mgboko-a shii. ² Ọnu-õma-a g'ò ha a-sõru sọ-pfuta unu etso unu purupuru; m'ò bũru l'unu a-nõdu anũru Chipfu, bũ Chileke unu olu.

³“Ọnu-õma a-nõdu etso unu l'õma mkpũkpũ; etso unu l'õma egu.

⁴“Ọnu-õma a-nõdu etso ỳnwu, unu nwũtaru anwũta; etskwaphõ ỳnwu iphe, unu meberu l'alĩ; etskwaphõ ỳnwu iphe-edobe unu nwũshiru. Mbũ l'eswi unu; waa eghu yee atũru unu a-nõdu azũ azũzu; azũshi iya ike.

5“Ọnu-ọma a-nọdu etso nkata, unu evuje eje l'ẹgu; waa ikwe, unu atsụje nri.

6“Ọnu-ọma a-nọdu etso unu mę unu -nọdu abata abata; l'o tsokwapho unu mę unu -nọdu alufu alufu.

7“Chipfu e-me g'unu lwụ-kpee ndu ọhogu unu, wụ-lihuru etso unu ọgu. Ẹphe e-dzebe edzebe byapfuta unu ọgu; ọle ẹphe e-mechaa gbaa nanu nanu; gbakashihu.

8“Chipfu e-me g'ọnu-ọma iya tsoru ọba unu; mękpoo l'iphemiphe, unu byiberu ẹka k'ememe; mbu l'ọo-goru ọnu-ọma nu unu l'alị ono, Chipfu, bu Chileke unu abya unu anunu ono.

9“Chipfu e-me g'unu nguru anguru; mee unu g'unu buru ndu duru iya nsọ, bu iphe, o rifuhawaru unu angu iya; ọle ọ kwa mę ọ -buru l'unu e-dobe ekemu Chipfu, bu Chileke unu; bya etsokwapho uzo, ọ toru. 10 Ụnwu-eliphe l'ophu ahuma l'unu zaru ẹpha laaru Chipfu; ẹphe atsuahaa unu ebvu. 11 Ẹme Chipfu emee g'unu nweru iphe ọkpobe enweru; nwushia unu ọkpobe anwushi; unu iphe-edobe unu anwushi nwa ọkpobe anwushi; unu iphe, unu meberu l'alị emehu ọkpobe emehu l'alị ono, Chipfu riburu nna unu phe angu le ya a-nu unu ono. 12 Chipfu a-guharu unu ulo ẹka oodobeje ẹku iya l'imigwe; g'igwe dzeje mini gbaa l'alị unu; l'orwuberu iya; l'ọ goru ọnu-ọma nu iphe, bukpo ozi, unu gude ẹka unu jee. Unu ejieje ikpoto oha ugwo; unu ta adudu ndu unu eje ejita. 13 Chipfu e-meje unu g'unu buru ishi; unu ta anodu ndu ozo l'ẹka. L'o mee; unu akaepo shingushingu eje; unu ta abyadu alwa alị alị; ọle ọ kwa mę unu -nọdu angabe nchị l'ekemu Chipfu, bu Chileke unu, bu ophu mu aturu unu ntanu-a su g'unu leta ẹnya; meje iya ememe. 14 Unu ta agbakutakwaru ekemu-a, mu aturu unu ntanu-a azu mę nanu. Unu ta aha-kwa iya; meahaa iphe ozo; tsolahaa agwa ozo, unu a-nọdu abaru ẹja.

Aphu, aa-nu onye te emejedu iphe,

a suru g'o mee

(Uke 26:14-46)

15“Ole o -bukwanurua l'unu ta angadu nchị l'olu Chipfu, bu Chileke unu; ophu unu eletaduru ẹnya eme ekemu iya g'oha; ophu unu etsoduru iphe, ọ toru ọkpa iya su g'e tsoje, bugba iphe, mu aturu unu l'ekemu ntanu-a; be mburonu-a g'ọ ha a-byapfutakwa unu; etso unu purupuru.

16“Mburonu a-nọdu etso unu l'oma mkpukpu; etso unu l'egu.

17“Mburonu a-nọdu etso nkata, unu evuje eje l'ẹgu; waa ikwe, unu atsụje nri.

18“Mburonu a-nọdu etso unu nwutaru anwuta; etso unu iphe, unu meberu l'alị; etso unu, eswi unu nwushiru; mękpoo ikpoto eghe me aturu unu.

19“Mburonu a-nọdu etso unu mę unu -nọdu abata abata; l'o tsokwapho unu mę unu -nọdu alufu alufu.

20 “Chipfu a-tụ unu ọnu; tị unu ẹberebete; meru ghajoghajoghajo nụ unu l'iphemiphe, unu byiberu ẹka ememe. Oo-me iya unu ẹgube ono gbiriri jasụ unu aburu mkpurupyata; mbụ ọla-l'iswi atụ unu l'uzorehu; l'ejo-ememe, unu wataru ememe; gwọbe Chileke. 21 Chipfu e-gudeephe ejo iphe-ememe swiru unu gbiriri jasụ unu abvubebe l'alị ono, unu abahu eje alwuta g'ọ buru k'unu ono. 22 Chipfu a-tụ unu ẹhu, ami mini; yee ẹhoku; yee ẹhu-ekoko; yee oke okpomoku; l'o mee; anwu akpobe; iphe unu meberu l'alị achashia manụ; l'e gude ogu-echi gbushia unu. Iphemiphe ono emekpaa unu ẹhu jasụ unu aburu mkpurupyata. 23 Akpaminigwe-a, unu vu l'ishi-a a-buru onyirubvu; ali, unu zoberu okpa aburu mgboro-igwè. 24 Chipfu e-me ge mini, gege edze l'alị unu buru urwuku; yee udzu. Ọ buru igwe a-ndu edze urwuku yee udzu ono ekpu unu gbiriri jasụ unu abvubebe.

25 “Chipfu a-ha ge ndu ohogu unu lwu-kpee unu. Unu e-dzebe edzebe byapfuta ndu ohogu unu ogu; ole unu a-gba nanu nanu; gbakashihu. Unu aburu ndu ali-eze ndu mgboko l'ophu a-ndu aso oyi. 26 Odzu unu a-buru nri enu, ephe l'eli; yee anu, bu l'eliphe; ophu o dudu onye bya eye phe ebvu; chifu phe. 27 Chipfu a-tụ unu ejo-onwo ndu Ijiputu; waa oke-ejo-onwo; waa onwo, aba yoyoyo; waa ekpa-ebyi; ophu unu abyadu aka mma l'iphe-ememe obu. 28 Chipfu e-me g'obvu bya unu; unu atsuhaha ishi; egomunggo eswehu unu. 29 Echilabo eswe be unu a-wata ebyiphe ẹka ebyiphe g'eka onye atsụ ishi ebyiphe ẹka l'ochii. Ophu o dukpoda iphe, unu byiberu ẹka k'ememe, byaru ekeru ekeru. Aa-nduepho akpa unu ẹhu; ana unu nfu mbokumboku; ophu unu abyadu enweru onye a-gbaru unu mkpu.

30 “Ii-je le nwanji jebua; oo-buru onye ozo e-mechaa jepfuaha ya. Li kpua ulo kpu-ghe; ole i ti buduru iya. Li koo opfu-vayinu; i tii ghota-du mebyi iya. 31 Oke-eswi ngu be aa-ndu l'atatiphu ngu gbu; ole i tii tadu anu iya. Nkapfu-igara ngu be aa-nata ngu l'okpahu; ophu a byadu akpu-phutaru ngu iya azu. Aturu ngu be ee-rwuta chiru nu ndu ohogu ngu; ophu o dudu onye agbaru ngu mkpu. 32 Unwu unu unwoke; yee ke nwanji be aa-chiru nu ndu ohozo. Enya aduepho unu l'uzo mbokumboku gbiriri jasụ enya agbahu unu tsukiribaa. Eka unu be e-rishihu erine; ole o to dudu iphe unu adu ike ememe. 33 Ndu unu amadu be e-ri iphe, unu koru l'opfu; mbu iphe, unu setaru l'akanya. Iphe, a-nduepho etso unu kpoloko bu mkpamehu; yee mkpawere mbokumboku; 34 k'ophu bu l'iphe, unu e-gude enya unu huma a-gbaghaa unu iphu. 35 Chipfu a-tụ unu ejo-onwo, eme ejo ehuka l'ikpere; me l'okpa l'ophu; mbu ejo-onwo, ata byadu akpohu akpohu. Ejo-onwo ono e-shiepho unu l'obochi-okpa phokota jasụ l'ishi.

36 “Chipfu a-chita unu; yee onye unu hotaru g'ọ buru eze unu; laa oha, unu ta amadu; ophu nna unu oche phe amajeduru oha obu. Ọ buru l'eka

ono bẹ unu a-nọdu baaru agwa eja; mbu agwa, e gude oshi; yee mkpuma mee. ³⁷Unu a-buru ndu eka ono, Chipfu a-chiru unu laa ono iphe, anyi ishi edzu; iphe, e gude anma l'ejo etu; waa iphe, e gude agba mgbonu.

³⁸“Unu e-mebekwa iphe, ha shii l'ali; ole iphe, unu a-kpata iya ta abadu ishi; noo kele igube e-mebyishi iya. ³⁹Unu a-gba opfu-vayinu koo ya opfu; ole unu ta angudu mee, shi iya nu; ophu unu awotadu akpuru, shi iya nu; noo kele unwehu a-tafu iya. ⁴⁰Oshi olivu a-tuko ali unu sweta; ole unu ta abyadu ete onwunu manu, shi iya nu; noo kele akpuru iya e-rishihu; dashia. ⁴¹Unu a-nwushi unwoke; yee unwanyi; ole ephe ta abaduru unu urwu; kele aa-kpu phe le ndzu laa ohozo. ⁴²Iphe, bu oshi, pfuru l'ali unu; waa iphe, unu meberu emebe bẹ igube a-tapyashibebe.

⁴³“Ndu lwaru alwalwa, bu l'echilabo unu bẹ eka phe l'a-kangoje k'unu okpobe akango; unubedua akaepho alwa ali ali eje. ⁴⁴Ephe e-jieje unu ugwo; ole unu tee nwehu ophu unu e-jie phe. O buru ephebedua a-bujeru ishi; unubedua anodu phe l'eka.

⁴⁵“Mburonu ono g'o hakota l'a-dapfuta unu; chia unu kpabe kpabe; jasụ l'o gude unu; mee; unu aburu mkpurupyata. Noo kele unu ta ngabeduru Chipfu, bu Chileke unu nchi mee ekemu iya; me iphe, o toru okpa iya su g'e tsoje. ⁴⁶Mburonu ono a-du unu l'ehu; buru unu iphe-ohubama; yee iphe, du biribiri; dukwapho oshilokpa unu l'ehu jasụ l'ojejoje. ⁴⁷Eshinu unu te egudedu ehu-utso; tee eswa; jeeru Chipfu, bu Chileke unu ozi teke iphe shi ejehuru unu le ree; ⁴⁸bẹ unu a-swi egu nri; waa egu mini; gbaru oto; teme uko iphemiphe aduru unu; unu ejeeru ndu ohogu unu ozi; mbu ndu ono, Chipfu e-ye g'ephe bya etsoo unu ogu ono. L'o woru odogoro-igwe nyabe unu l'olu; jasụ unu aburu mkpurupyata. ⁴⁹Chipfu e-duta oha, shi uzanya; mbu l'eka igwe beru ali beru; g'ephe zia phaa g'ugo bya ezikota unu. Oha ono a-buru ndu unu ta anudu olu phe. ⁵⁰Oha ono bẹ iphu a-gba igirigiri; k'ophu bu l'ephe ta agubedu ndu bu ogeranya iphe; ophu ephe aphuduru unwegirima obu-imemini. ⁵¹Ephe e-ripya unwu iphe-edobe unu; waa unwu iphe, unu meberu l'ali; jasụ e mebyishibebe unu. O to dudu ereshi unu; me mee ophuu unu; me manu unu; ozoo eswi unu; me unwu aturu unu, ephe byaru ahara unu gbiriri jasụ unu alakota liyi. ⁵²Ephe a-no-phekota mkpukpu, nogbaa l'ali unu mgburugburu gbiriri jasụ igbulo, ha l'eli ono, a kpushiru ike ono, unu chiru upfu kwee ono aphofu daa. Ephe a-no-phekota mkpukpu unu l'ophu, nogbaa l'ali unu l'ophu mgburugburu; mbu ali ono, Chipfu, bu Chileke unu nuru unu ono.

⁵³“Shita l'iphe-ehuka, ndu ohogu unu e-me g'unu je teke ephe a-no-phe mkpukpu unu ono mgburugburu bẹ e-me; unu awata ata iphe, shi unu l'ehu; mbu wata ata unwu unu unwoke; me unwanyi, bu unwu, Chipfu, bu Chileke unu nuru unu. ⁵⁴Oo-du-tabẹ eji; k'ophu bu le nwoke, kachakpo enweru obu-imemini; bya aburu onye iphe kachaa erwu l'ehu bẹ imemini nwune iya nwoke; ozoo nyee ya, o yeru obu; ozoo unwu iya,

ghuduru nū ta adūedu. ⁵⁵ Ọphu ọ byadu ebuta anū nwa iya ono, ọota ono; bee onye lanū lẹ ndu ono. Iphe, a-kpata iya nū abūru l'ọ tọ dūedu iphe ọzo, phodubaaru iya l'ẹka; kele ndu ọhogu unu nọ-pheru unu mgburugburu; unu nọdu eje iphe-ẹhuka. ⁵⁶ Nwanyị, kachakpọo enweru obu-imemini; bya abūru onye iphe kachaa erwu l'ẹhu l'echilabọ unu; mbū onye anọduje arwọ alị gẹ ya zọbe ọkpa lẹ g'o nweberu obu-imemini; yee g'iphe erwube iya l'ẹhu; bẹ imemini ji iya, o yeru obu; mẹ nwa iya nwoke yee kẹ nwanyni ta adukwa. ⁵⁷ Unwu, ọo-nọdu anwushi; mękpoo eze, letsoje nwa bẹ oo-meje lẹ mpya gẹ ya atuko iya taa nkinyi iya. Ọ buru iphe, a-kpa iya nū bụ ọkpa-nri, a-dū nū; yee iphe-ẹhuka, ndu ọhogu unu e-me g'unu jee teke ono, ẹphe a-nọ-phe mkpukpu unu mgburugburu ono.

⁵⁸ “Ọ -buru l'unu te eletaduru ẹnya meje iphemiphe, e pfuru l'ekemu-a, e deru l'ekwo-a; k'ọphu unu a-nọdu akwabẹ ẹpha-a ùbvù; mbū ẹpha ono, dū akpabiri bya adū ebvu ono, bụ iya bụ Chipfu, bụ Chileke unu; ⁵⁹ bẹ Chipfu e-mekwa g'ejo iphe-ẹhuka, ẹtu iya adūjeduru dapfu unu l'awa unu; mbū ejo iphe-ẹhuka, a-pa ẹka; tẹme l'oonoo ọdu alala; wafua ejo iphe-ememe, a-dū iberezi; tẹme l'oomee ẹriri nggeringge. ⁶⁰ Lo wofutakwarupho unu iphe, bụ ejo iphe-ememe ono, l'emeje ndu Ijiputu ono, bụ ọphu unu shi atsujẹ ebvu ono g'ọ bya arakwaruro unu arakuru l'ẹhu. ⁶¹ Ọ bukwarupho iphe, bụ iphe-ememe; mẹ iphe, bụ iphe-ẹhuka, e deduru l'ekwo ekemu-a bẹ Chipfu e-vuru byabẹ unu l'ishi gbiriri jasū unu abūru mkpurupyata. ⁶² Unu abya abūru ndu a-phodu nwanshii nwanshii; l'unu-bẹ ndu shi dūtabe igwerigwe gẹ kpokpode, nọ l'igwe. Ọ buru iphe, a-kpa iya nū bụ l'unu te emeduru Opfu Chipfu, bụ Chileke unu. ⁶³ Ọ buru ẹgube ono, Chipfu gude ẹhu-utso mee g'iphe dūru unu lẹ ree; bya emee g'unu ka l'otu ono; nokwapho gẹ Chipfu e-gude ẹhu-utso; mee; unu abūru mkpurupyata; mekwaapho; ọ tọ dūhedu iphe, unu a-bū; l'e phefu unu l'alị ono, unu eje alwūta ono.

⁶⁴ “Chipfu a-chika unu; mee unu edzuru mgboko l'ophu; e -shi l'ishi mgboko ishi iya-a jasū l'ishi iya ọphuu. Ẹka ono bẹ unu a-nọdu baaru agwa eja; mbū agwa, e meru l'oshi; yee mkpuma. Iphe ono buru iphe, unu ta mahaada; tẹme ọphu nna unu oche phẹ amajeduru iya. ⁶⁵ Ole iphe ta abyadu adū unu lẹ nphe l'echilabọ ọha m'oha ono; ọphu ọkpa abyadu adū unu doo. Ọ chia iphe, Chipfu e-me bụ l'oo-me g'obu te unu etete l'ẹka ono; ẹnya agbahukota unu ọchii; aphū eji unu obu. ⁶⁶ Ndzū unu a-nọdu awa awawa; mbū l'eswe l'enyashi bẹ unu a-nọduje lẹ ndzū-agugu. O to nwedu onye a-maru; ?ya a-dzuru-a ndzū; tọo ya ta adzūdu. ⁶⁷ Teke o beru l'utso bẹ unu a-sū: ‘Ọme ọ bukponu l'uzenyashi!’ Teke ọ bụ l'uzenyashi; unu asū: ‘Ọme ọ bukponu l'utso!’ Iphe, a-kpata iya nū abūru oke ndzū-agugu, a-nọdu l'ime ọkpoma unu; yee ejo-iphe, unu e-gude ẹnya unu ahūmagbabe. ⁶⁸ Chipfu e-ye unu l'ugbo-mini; mee unu alaphu azū l'alị Ijiputu, bụ ẹka ono, ya sūru l'unu te ejebaedu ọzo ono. Ẹka ono bẹ unu a-kpobe

onwunu k'erere; gę ndu ọhogu unu z̄̀a unu g'unu buru ohu p̄̀e unwoke; mę k'unwanyi; ọle ọ tọ dudu onye e-kwe azu unu."

Ọgbandzu, Chileke yele ndu Ịzurelu gbaru le Mówabu

29 ¹Ọwaa bu iphe, e pfuru l'ogbandzu ono, Chipfu t̄̀uru Mósisu eke-mu s̄̀u g'o mee gę yele ndu Ịzurelu gbaa l'al̄i ndu Mówabu ono; a-gufukwa ogbandzu ophu yele ephe gbaru l'úbvú Horębu.

²Mósisu bya ekukobe ndu Ịzurelu g'ephe ha; s̄̀u p̄̀e: "Unu gudewaa ęnya unu h̄̀uma iphemiphe, Chipfu meru Fero; waa ndu-oz̄i iya l'ophu; waa al̄i iya l'ophu l'al̄i ndu Ijiputu. ³Ęnya unu ębo ębo bę unu gude h̄̀uma iphe-ohutama, par̄u ęka ono; yęe iphe-ohumalenya ono; mę iphe, d̄̀ugbaa oke biribiri, nwuru n̄u ono. ⁴Ọle Chipfu ta nduru unu uche, emeje g'iphe doo ęnya; waa ęnya, unu e-gude h̄̀uma ụzo; waa nch̄i, unu e-gude an̄u iphe jas̄u ntan̄u-a. ⁵Mu duru unu ụkporo apha labo l'echięgu; ophu uwe unu akahuduru unu l'ęhu; ophu akpo-okpa unu akahuduru unu l'okpa. ⁶Unu ta taduru buredi; ophu unu anguduru mę; ọzoo iphe ozo, ats̄u ats̄utsu; k'ophu unu a-maru l'oo mu bu Chipfu bya aburu Chileke unu. ⁷O be teke anyi rwuru al̄i ęka ono; Sihonu, bu eze ndu Hęshibonu; waa Ogu, bu eze ndu Beshanu lufuta bya adatso anyi ọgu; anyi lwu-kpee p̄̀e. ⁸Anyi lwuta al̄i p̄̀e bya eworu iya n̄u okpa-ipfu Rúbenu; waa Gadu; waa okpa-ipfu Manase, e keru ębo; woru iya n̄u p̄̀e g'ọ buru okiphe p̄̀e. ⁹Oo ya bu le-a; unu dobekwa opfu, e pfuru l'ogbandzu-a; unu emeje iya ememe; g'iphe, unu kuberu ęka ememe abujeru unu upete.

¹⁰"G'unu ha ntan̄u-a pfukotaru l'iphu Chipfu, bu Chileke unu; mbu ndu-ishi unu; okpa-ipfu unu; waa ndu bu ogerenya unu; waa ndu nweru ęnya, nogbaa l'echilabo unu; mękwapho ndu bu nwoke le ndu Ịzurelu l'ophu; ¹¹yęe unwegirima unu; mę unwanyi, unu al̄u al̄ulu; waa ndu lwaru alwalwa, bu l'ęka unu koberu ụlo-ękwa unu, bu ndu awaru unu nk̄u; ekuru unu mini; ¹²k'ophu unu le Chipfu, bu Chileke unu a-gba ndzu; unu ayiru l'angu ono, Chipfu, bu Chileke unu eriru unu ntan̄u onoya. ¹³G'ee-shi g'o mee unu ntan̄u-a g'unu buru ndibe iya; g'ọ buru Chileke unu, bu iya bu iphe, o pfuru; bya aburu iphe, o riburu nna unu oche p̄̀e, bu Ębirihamu; waa Ayizaku; waa Jiękopu l'angu. ¹⁴Ọgbandzu-a, mu no l'ęka-a eme g'unu gbaa ntan̄u-a; mę angu-a, mu eri eye iya-a ta abukwa unubedua bę yi ya n̄u kpoloko. ¹⁵Ọ yi ya; mbu onye anyi l'iya tuko pfuru l'atatiphu Chipfu, bu Chileke anyi l'ęka-a; ọ yiru iya; mbu onye anyi l'iya ta nodu l'ęka-a ntan̄u-a.

¹⁶"Unubedua l'onwunu bę o doru ęnya ree g'anyi shi buru l'al̄i ndu Ijiputu; waa g'anyi shi ghakota al̄i ndu ohozo; jee gbiriri; jas̄u anyi rwua ęka-a. ¹⁷Teme unu humawaa ahuma ahuma, ephe emeshi; mę agwa p̄̀e, bu iphe, ephe pyiru l'oshi; mę ophu ephe wataru le mkpuma; waa ophu a kpuru le mkpola-ochaa; waa mkpola-ododo. ¹⁸Unu letakwa ęnya g'ọ

tọ dọ nwoke; ọzoo nwanyi; ọzoo ipfu; ọzoo ọkpa-ipfu obu iya a-lufu l'ẹka Chipfu, bụ Chileke anyi nọ; tųgbua je abaaharu agwa ndu ọhozo ono eja. Unu te ekwekwa g'ejo-iphe, egbu egbugbu bya atso ilu egube ono kpofuta l'echilabo unu. ¹⁹G'ọ tọ dukwa onye a-numacha ejo onu, aatu-a l'owata agoru onu-oma anu onwiya su l'ehu a-du iya-a guu; m'obeta ya tsoru ọkpoma-mgbashi, shi iya l'obu. Kele egube iphe ono -du be ali, mini du yee k'okponku a-tuko buru mkpurupyata. ²⁰Chipfu ta abyakwa aguru onye obu nvu. Ehu-eghu Chileke; yee okophoo ya a-noduwaro swiru onye obu. Tememe mburonu ono, e deshuru l'ekwo-a a-dapfuta iya; tememe Chipfu ehufu epha onye ono le mkpula akpaminigwe-a. ²¹Chipfu a-hota onye ono l'okpa-ipfu Izurelu l'ophu dobe g'ejo-iphe nwuru iya; mbu ejo onu ono, e pfuru opfu iya l'ekwo ekemu-a, e deru ogbandzu-a.

²²“Unwu unu, bu ogbo ophu e-tsota k'unu; me ndu bu nlwamulwa, shi l'eka du enya a-huma ejo-iphe, a-nwu l'ali ono; waa iphe-ememe, Chipfu e-gude kpakaa ali ono. ²³Ali ono g'ọ ha be iphe, e-jiru iya nu bu oku nshi-egbe; waa unu; yee onwu-phuruphuru; k'ophu bu la taa kodu iphe l'ali ono; ophu o dudu iphe, emehu iya nu; ophu eswa efukpoda ya nu. Mbu lee-me iya iphe, e meru Sodomu; yee Gomora; mee ya iphe, e meru Adama; yee Zebowimu; bu ndu Chipfu gude oke ehueghu iya mebyishia ono. ²⁴Ohamoha l'ophu atuko jahaa su: ‘Bu gunu kparu iphe, Chipfu meru ali-a egube-a; mbu iphe, kparu iphe, o tu-koshiru ali-a ejo oke ehueghu iya egube-a?’

²⁵“Noo teke ndiphe e-yeru phe onu su: ‘Iphe, kparu iya nu bukwa le ndu ono gbakutaru azu l'ogbandzu Chipfu, bu Chileke nna phe oche, bu ophu epe l'iya gbaru teke ono, o dufutaru phe l'ali Ijiputu ono. ²⁶Epe gbafuru je abaaharu agwa eja; bya ephozeaharu iya; mbu agwa epe amadu; teme ophu o budu yebedua nuru phe iya. ²⁷Oo iphe ono kparu iphe, oke ehueghu Chipfu gbanwuhuru oku l'eka ali-a nọ; k'ophu o tuko-ru ejo onu, a turu dee l'ekwo ekemu-a kpukposhi phe l'ehu. ²⁸Tobudu iya bu; Chipfu phefu phe l'ali ono g'onye phefuru ogbarabvu-oshi; o buru oke ehueghu iya; yee enya, ata iya kpitikipiti be o gude nwuru phe ye l'ali ndu ozo g'ọ dunaa nta.’

²⁹“Iphe, e domiru edomi bu ke Chipfu, bu Chileke anyi; obenu l'iphe, e meru g'a maru bu k'anyibedua; waa unwu anyi jasụ lojejeje; k'ophu anyi e-meje iphemiphe, e pfuru dee l'ekwo ekemu-a.”

Iphe e-jehuru onye izimanu lwaru azu

30 ¹“Oo ya bu; teke iphemiphe-a mejeerupho unu; mbu ago onu-oma yee atu onu ono, mu togboru unu ono; unu nodu l'echilabo ohamoha ono, Chipfu, bu Chileke unu chikashiru unu; unu laa je anodu ono; nyata iya; k'ophu o rwuru unu l'uche; ²k'ophu unu lwaphutaru azu lwapfuta Chipfu, bu Chileke unu; bya emeahaa olu iya, bu iphemiphe

ono, mu aturu unu ekemu iya ntanụ ono; mbụ unubedua unu l'unwe-girima ibe unu; unu gude obu unu g'ọ ha; yee ndzụ unu l'ophu lwa ³be Chipfu, bụ Chileke unu e-dophu unu azụ l'onodu unu; mbụ l'oo-phuru unu obu-imemini; bya edufutakota unu l'ohamoha ono, bụ eka Chipfu, bụ Chileke unu chiru unu ye onoya. ⁴O -nwekpooro ndibe unu ono ophu a chiru jeye l'eka igwe beru alị beru; Chipfu, bụ Chileke unu ejele-a eka ono je eduphuta phe azụ; mbụ l'oo-jekpoeppo l'eka ono je ekua unu. ⁵Mbụ l' Chipfu, bụ Chileke unu e-duphuta unu azụ l'alị ono, bụ ke nna unu oche phe ono; l'ọ buru k'unu. L'ọ meeru g'iphe duru unu l'ee ree; mee g'unu barahụ jaa àjàjà ka nna unu oche phe shii. ⁶Chipfu, bụ Chileke unu e-bu unu úbvù l'ime obu; bukwapfo awa unu úbvù l'ime obu; k'ophu bụ l'unu e-ye Chipfu, bụ Chileke unu obu unu g'ọ ha; gude ndzụ unu l'ophu yee ya obu; k'ophu unu a-nodu ndzụ. ⁷Oo ya bụ; Chipfu, bụ Chileke unu atuko otu-onu-a byabẹ l'ishi ndu ohogu unu; waa l'ishi ndu kpuru unu ashị eme unu ewere. ⁸Noo teke unu a-lwapfuta azụ bya emeahaa opfu, o pfuru; mbụ Chipfu, bụ Chileke unu; bya awata emekota iphe, bukpo ekemu iya, bụ ophu mu aturu unu ntanụ-a. ⁹Chipfu, bụ Chileke unu e-me g'iphe, unu kuberu eka ememe jehuru unu; mekwapho g'unu nwushia unu; waa g'iphe-edobe zushiaru unu; teme iphe, unu meberu l'alị emehukwapfo; kele Chipfu e-mechaa gude ehu-utso ozobaa mee g'iphe jehuru unu; egube ono, o gude ehu-utso meeru iya nna unu oche phe ono; ¹⁰me o -buru l'unu ngaberu nchị l'opfu Chipfu, bụ Chileke unu; meje ekemu iya; waa iphe, o toru okpa iya sụ g'e tsoje, buchaa iphe, e deru l'ekwo ekemu-a; yefua m'ọ buru-a l'unu e-gude obu unu g'ọ ha; waa ndzụ unu l'ophu dakobe lwaphuta azụ lwaphuta Chipfu, bụ Chileke unu.”

Opfu mkpochi-ishi

¹¹“Noo kele ekemu-a, mu aturu unu ntanụ-a ta atsunukakwa unu l'ehu ememe; ophu o karikwaru unu eka. ¹²Opfu ono ta nodu l'imigwe k'ophu unu a-ji sụ: ‘?Bụ onye e-nyihu imigwe je ewota iya bya araaru anyi arara; k'ophu anyi a-ngabẹ iya nchị mee ya?’ ¹³Teme ophu o nodu l'azu eze-enyimu azụ iya ophu; k'ophu unu a-ji sụ: ‘?Bụ onye a-da eze-enyimu je ewota iya raaru anyi arara k'ophu anyi a-numa iya meahaa ya?’ ¹⁴Obenu l'opfu obu nokpoo unu ntse okpobe anono; mbụ l'unu kpụ iya akpukpu l'onu; teme o nodu unu l'obu; k'ophu unu e-mekwanu iya ememe.

¹⁵“Unu lenu; ntanụ-a be mu dobekwaru unu ndzụ; waa eka-atutu; bya edoberu unu anwuhu; yee ọla-l'iswi. ¹⁶O -buru l'unu yeru Chipfu, bụ Chileke unu obu; bya etsokota uzo iya; mbụ edobe iphe, o turu l'ekemu; waa iphe, o toru okpa iya sụ g'e tsoje; waa iphe, o suru g'e meje, bụ iya bụ iphe, mu ezi unu ntanụ-a; be unu a-nodukwa ndzụ; jaa ka l'otu; teme Chipfu, bụ Chileke unu ekebe unu l'oma l'alị ono, unu abahu eje alwuta nworu ono. ¹⁷Ole o -buru l'unu wofuru okpoma unu l'eka Chipfu no; ophu

unu ekwedu angabẹ nchi; unu haa; e deta unu; unu je ephozeaharu agwa; baaharu iya ẹja; ¹⁸bẹ mu arajakwaru iya unu araja ntanụ-a sụ l'unu alakwa l'iyi. Ophu unu ebukwa nọo ọdu l'alị ono, unu abya ada ẹnyimu Jiđdanu eje alwuta nworu ono. ¹⁹Ntanụ-a bẹ mu ekukwa igwe yee alị g'ọ bya agbaa unu ekebe lẹ mu dobeakwaru unu ndzụ; bya edoberu unu anwuhu; doberu unu ọnu-oma; yee mburonu. Oo ya bụ lẹ-a; unu hatalẹ-kwaa ndzụ; k'ophu unu lẹ ndu a-buru oshilokpa unu a-tuko nọdu ndzụ; ²⁰k'ophu unu e-ye Chipfu, bụ Chileke unu obu; waa k'ophu unu e-meje opfu iya; waa k'ophu unu l'iya arakuru; noo kele ọo yebedua bụ ndzụ unu. O buru iya bụ l'unu nọ ndzụ ogologo; k'ophu unu e-buru l'alị ono, Chipfu rifuru nna unu oche pẹ l'angu lẹ ya anụ pẹ ono; mbụ ndiche unu pẹ, bụ Ẹbirihamu; waa Áyizaku; yee Jiékoṗu.”

Jioshuwa anọ-chi ẹnya Mósisu

31 ¹Tobudu iya bụ; Mósisu nọdu epfukpọkwapho opfu-a anụ ndu Ízurelu g'ẹphe ha; ²sụ pẹ: “Nta-a bẹ mu kawaru nka nọwa ụkporo apha ishii; ophu mu aduedu ike edu unu eje ejeje alwa alwalwa. Teme Chipfu sụakwa mu pho gẹ mu ta adafukwa azụ ẹnyimu Jiđdanu azụ iya ophu. ³O buru Chipfu, bụ Chileke unu e-vuta ụzo; unu etso iya je adaa ẹnyimu ono. O buru iya a-tuko ohamoha-a mebyishiaru unu; mee; unu alwuta alị pẹ nworu. O buru Jioshuwa e-vutaru unu ụzo; unu etso iya je adaa ẹnyimu ono, bụ iya bụ gẹ Chipfu pfuru iya. ⁴Chipfu emee pẹ ẹgube ono, o meru ndu eze ndu Amoru, bụ Sihonu yee Ogu; bụ ndu o mebyishiru; yee alị pẹ. ⁵Mbụ lẹ Chipfu e-woru pẹ ye unu l'eka; ọle g'unu mekotakwa pẹ gẹ mu sụru g'unu mee pẹ. ⁶G'okpehu dukwa unu; unu eshihu obu ike. Gẹ ndzụ ba agukwa unu; ophu unu atsukwa pẹ ebvu. Noo kele ọo Chipfu, bụ Chileke unu l'onwiya bụ onye du unu eje. O to byadu aha unu; ophu o leswedu unu ẹnya.”

⁷Mósisu bya ekua Jioshuwa; bya anọdu l'atatiphu ndu Ízurelu g'ẹphe ha sụ iya: “G'okpehu dukwa ngu; li shihu obu ike; kele o kwa ngu e-toruru ndu-a bahụ l'alị ono, Chipfu riburu angụ l'ọo-nụ nna pẹ oche ono. O buru gubedua l'e-me g'ẹphe lwuta iya nworu. ⁸O buru Chipfu l'onwiya e-vutakwanuru ngu ụzo; teme l'ọ nọdukwapho swiru ngu eswiru. O to byadu aha ngu; ophu o leswedu ngu ẹnya. Gẹ ndzụ ba agukwa ngu; ophu obu etekwa ngu etete!”

Agụ ekemu ono

⁹Noo ya; Mósisu bya edee ekemu ono edede woru nụ ndu-uke, bụ pẹ bụ oshilokpa Líyayi, bya aburu pẹ apajẹ okpoko ogbandzu Chipfu; nukwa iya pho ndu bụ ogerenya lẹ Ízurelu g'ẹphe ha. ¹⁰Mósisu bya atukwaru pẹ pho ekemu sụ pẹ: “A -nojechaepho apha ẹsaa; ọ bvujeeepho, bụ iya bụ l'apha akagbu ụgwo; mbụ teke ono, aaboje Obo-Mkpù ono;

11 teke ndu Ízurelu wufutakotaerupho l'iphu Chipfu, bu Chileke phe l'eka o-ḥota dobe g'unu dzukoje; teke epe dzukoerupho; unu agwa ekemu-a ge Ízurelu l'opu numakota g'ephe ha. 12 Unu dzukoḅe phe l'eka lanu; unwoke me unwany; ye unwegirima; me ndu lwaru alwalwa, bu le mkpukpu le mkpukpu unu; k'opu epe a-tuko ngabe nchi; nwuta atsu Chipfu, bu Chileke unu ebvu; teme epe eleta enya emekota iphe, e pfuru lekemu ono g'o ha. 13 Unwu phe ndu ophu teke amadu ekemu-a be aa-numakwa iya pho nwuta atsu Chipfu, bu Chileke unu ebvu jasu g'unu e-buberu l'alì ono, unu ada enyimu Jiḍdanu je enworu ono."

Aanma okwa le ndu Ízurelu e-mechaa kwefuru Chileke ike

14 Toḅudu iya bu; Chipfu bya epfuru yeru Mosisu su iya: "Mboku, i-nwuhu erwuakwa ntse. Kua Jioshuwa; g'unu l'iya tuko swiru bya apfuru l'ulo-ekwa-ndzuko ge mu karu iya iphe, oo-me." Mosisu ye Jioshuwa bya ejerwua je apfuru l'ulo-ekwa-ndzuko obu. 15 Chipfu gude urwukpu, kpuru oronmono bya l'ulo-ekwa-ndzuko ono. Urwukpu ono kpu oronmono lonu-abata ulo-ekwa-ndzuko ono.

16 Chipfu su Mosisu: "Nta be iibyakwa alapfu nna ngu oche phe. O le ndu-a ta adukwa g'ephe a-no-beru; epe awata apharwushi onwophe g'unwany ukpara l'abarū agwa ndu alì ono, epe abahu ono eja. Epe agwoḅe mu; mebyia oḅbandzu ono, anyi l'ephe gbaru ono. 17 O buru teke ono be ehu-eghu mu e-nwuaaha phuruphuru. Mu agwoḅe phe; woru iphu wohaaru phe. Le woru phe mebyishia. Ikpoto ejo-iphe; me iphe-ehuka a-dapfu phe; k'opu epe a-wata epfu l'eswe mboku ono su: 'Iphe, meru g'o gude ejo-iphe-a byapfuta anyi bukwa l'oo le Chileke anyi ta anedu l'echilabo anyi.' 18 Mboku ono be mu wohafutajeru phe ataphu mu. O buru iphe, a-kpa iya nu bu iphe, bukota ejo-iphe, epe e-mekota; merwua k'opu bu l'ephe a-gharu agwa ozo iphu.

19 "Nta-a bu g'i woru ebvu-a dee l'ekwo dobe; gujeru onwongu; l'i zikwaa ya pho ndu Ízurelu g'ephe maru iya agugu; g'o buru iphe, mu e-gude agba phe ekebe. 20 Mu -durwutae phe pho l'alì ono, manunwu ye mini era-eswi aso gborogboro ono; mbu l'alì, mu kweru nna phe oche phe ukwe iya; bya eriru angu yeru phe iya ono; epe -rijiaha epho bya adu okporokpo; be epe a-gharu agwa ozo iphu; jeahaaru phe ozi; nmaaha mu phulaphula; bya emebyia oḅbandzu mu. 21 Ikpoto ejo-iphe; me iphe-ehuka -dapfu phe pho; ebvu ono agbaa phe ejo ekebe; kele oshilokpa phe ta abyadu agu-buhu iya agu-buhu. Noo kele mu mahawaru idzu iphe, epe achì k'ememe; temanu mu durwutaje phe alì, mu riburu angu anunu-a."

22 Oo ya bu; Mosisu dee ebvu ono mboku ono; bya eworu iya zia ndu Ízurelu.

23 Chipfu pfuaru Jioshuwa nwa Nunu iphe, oo-me; su iya: "G'okpehu dukwa ngu; l'i shihu obu ike; kele o gubedua e-du ndu Ízurelu laa

l'alì ono, mu riburu angù lẹ mu a-nù phẹ ono. Mbẹdua e-swiẹru ngu pho eswiru.”

²⁴Mósisu dekotachaepho ekemu-a l'ẹkwo; e -shi l'ishi jeye l'ẹka ọ bvuru; ²⁵o pfiaru oshilokpa Lívayi, bụ ndu apajẹ okpoko ọgbandzu Chipfu; sù phẹ: ²⁶“Unu nata ẹkwo ekemu-a dobe lẹ mgbureku okpoko ọgbandzu Chipfu, bụ Chileke unu ono; g'ọ nọdu l'ẹka ono agba unu ẹjo ekebe. ²⁷Kele mu maru g'unu bụ-be ndu ekwefuje ike; waa g'unu bụ-be ndu ẹjo-ọkpoma. Ọ -buru l'unu shiwaa nta-a, mu nọkwadu swiru unu-a bụru ndu kwefuru Chipfu ike; lewaro g'oo-du mẹ mu nwuhuepho! ²⁸Unu kukoberu mu ndu bụ ọgerenya l'okpa-ipfu l'okpa-ipfu nonu g'ẹphe ha; yẹ ndu-ishi unu; gẹ mu pfua opfu-a ye phẹ lẹ nchị; mu ekua igwe yẹ alì g'ọ bya agbaa phẹ ekebe. ²⁹Kele o dokporu mu ẹnya rengurengu lẹ mu -nwuhuchaa bẹ unu a-wata eme ẹjo umere, rehuru erehu; mbụ unu ahaa ụzo-a, mu tūru unu l'ekemu sù g'unu tsoje-a. L'iphu bẹ ẹjo-iphe a-dapfukwa unu; noo kele unu a-nọdu eme iphe, dū ẹji l'iphu Chipfu; shi nno gude iphe, unu gude ẹka unu meta kpatu iya ẹhu-eghu.”

Ebvụ, Mósisu gụru

³⁰Tọbudu iya bụ; Mósisu shiẹpho l'ishi gushiaru phẹ iphe, e deru l'ebvu ono gbiriri jasù ọ bvụ. Ndu Ízurelu, dzukoberu nù g'ẹphe ha nùmakota iya.

32 ¹Gùbe igwe; ngabẹru mu nchị
gẹ mu pfua opfu!

Gùbe alì; nùmakwa opfu,
shi mu l'ọnu!

²G'iphe, mu ezi dzekwaa
gẹ mini.

G'opfu, shi mu l'ọnu
kwakwaa g'iji.

G'o dzekwaa gẹ mini,
alwa yẹgẹyẹge l'irwu ẹswa;
mbụ g'o dzekwaa g'oke mini,
alwa wọwoowoo l'eli
irwu oshi.

³Mu a-rakwa ẹpha Chipfu arara.
Unu janaa ẹpha Chileke anyi ono ajaja;
kele ọ parụ ẹka!

⁴Ọ bụ iya bụ oke mkpuma ono!
Iphemiphe, oome nọdu adubebeje ree;
tẹme ụzo iya pfukotaru nhamunha.
Ọ bụ Chileke, apfushije ike l'iphe,
o pfuru;

- ọphu ọ dudu iphe,
 apfuduru-oto, oomeje.
 Ọ pfuberekoto; teme obu gya
 ya iphoro.
- 5 Epe watawaru eme ejo umere,
 rehuru erehu l'eka o no.
 Mbụ le ntucha, du phe l'ehu
 meakwaru; ọphu epe
 abuedu unwu iya.
 Epe buru obo,
 menukaru ejo-iphe;
 mbu obo, uzo phe gberu nggo.
- 6 ?Bu egube iphe-a be unu gude
 apfu Chipfu ugwo;
 unube ndu-a, bu ndu eswe;
 bya aburu ndu amadu iphe-a?
 ?Tobudu iya bu nna unu;
 bya aburu onye meru unu?
 Mbụ-a; ?to budu iya meru unu
 g'unu a-du; bya emee;
 unu nguru anguru?
- 7 Unu nyatakwa teke k'ichee!
 Unu aria oriri nyata obo,
 ghatawaru nu!
 Unu jia nna unu g'ephe
 koru iya unu!
 Unu ajikwaa ya pho ndu bu
 ogerenya unu;
 g'ephe kokwaaru iya pho unu!
- 8 Teke Okalibe-kakota-shii
 heru ohamoha okiphe phe;
 mbu teke o kekashiru unwu-eliphe;
 be o tu-bugbaaru unwu-eliphe oke
 eka epe e-jeberu l'ehu l'ehu;
 g'unwu Izurelu habe lotu;
- 9 kele okiphe Chipfu bu ndibe iya;
 mbu l'oo ndu Jiekopu bu okiphe
 ọphu ọ hotaru.
- 10 Ọo l'echiegu be o choru phe
 chota; mbu l'oo l'ali,
 dabyiru mgbegere eka
 aanugbaa njo ora;

- bẹ ọ nọ-pheru pẹ mgburugburu;
eleta pẹ ẹnya.
- Ọ nwuberu pẹ ẹnya
g'aanwubejeru akpuru
ẹnya ojii-a.
- 11 Ọo ẹgube ono, ugo anọduje
ephephe ẹpfune iya;
erwuphe l'eli unwu iya-a;
mbu ẹgube ono,
oosashije nkù iya pakoo unwu iya;
mbu paru pẹ l'igburonu nkù iya;
- 12 bu gẹ Chipfu nwẹkinyi iya
duru pẹ;
ofhu ọ dudu agwa ndu ohozo,
yeru iya ẹka.
- 13 Ọ doberu pẹ l'ẹka ha l'eli
lẹ mgboko;
g'ẹphe buru ishi.
- Ọ buru akpuru-ipe,
miru l'egu bẹ ẹphe riru.
- Ọ mekwaapho; ẹphe ria manu-ẹnwu,
shi lẹ mkpuma;
yẹ manu, shi l'alì,
du epfu epfu.
- 14 Manu ẹra-eswi;
yẹ mini-ẹra aturu;
waa nwaturu, tsuru ẹba; yẹ ebili;
waa iphe-edobe,
shi l'alì Beshanu; yẹ egbu;
waa okpobe witi
bẹ o gudekwapho zu-jia pẹ epho.
- Tẹme ẹphe ngukwaapho
mẹe uswe-uswe,
shi l'akpuru vayinu.
- 15 Ọle Jieshurunu^a datachaerupho okporokpo; o kwefu ike.
Ọ daru okporokpo;
bya aduwa bogili-bogili.
- Ọ tsuwaru onwiya ẹba;
tẹme ọ gbẹ teke ono

^a 32:15 Ipe Jieshurunu bu bẹ bu 'onye p̄b̄b̄erekoto' bu iya bu l'ọo ndu Ízurẹlu bẹ eepfu ama ẹka.

- bya ajika Chileke,
meru iya nū.
- Q b̄uru oke m̄kpuma ono,
dz̄otaru iya nū ono
b̄e o gude weaha
gb̄egele-gb̄egele.
- 16 Ẹp̄he shi nno kpata;
o koaharū ph̄e okophoo
k'agwa ndu ọhozo
ẹp̄he jetaru dobegba.
- Q b̄uru ah̄uma ah̄uma ono,
ẹp̄he eme ono b̄e ẹp̄he gude mee;
ẹhu ghuahaa ya eḡhu.
- 17 Ẹp̄he watarū egwe ngweja
nū ọbv̄u, ab̄udu Chileke;
mb̄u agwa, ẹp̄he amaj̄eduru;
agwa ọph̄úú, b̄u mgboru nta-a
b̄e ọ f̄utaru; agwa, nna unu oche
ph̄e ats̄uj̄eduru eb̄vu.
- 18 Q kwa oke m̄kpuma ono,
z̄ufutaru unu ono b̄e unu
gbak̄utaru azu;
mb̄u l'ọo Chileke ono,
b̄u onye nw̄uru unu ono b̄e
unu z̄oharu.
- 19 T̄obudu iya b̄u;
Chipfu bya ah̄uma ip̄he ono,
ẹp̄he eme ono;
bya as̄oaha ph̄e oyi;
noo k̄ele ụnwu iya nwoke;
m̄e k̄e nwanȳi b̄e kpatsuru iya
ẹhu-eḡhu.
- 20 Q s̄u: “Mu e-wofu ph̄e ẹn̄ya;
ḡe mu h̄umaeshikwa ip̄he,
ẹp̄he e-mechaa b̄uru.
Noo k̄ele ẹp̄he b̄u ọḡbo,
uzo ph̄e gberu ngḡo;
mb̄u ụnwegirima,
ta ap̄f̄ushij̄edu ike l'ip̄he,
ẹp̄he pfuru.
- 21 Ẹp̄he gude ip̄he, ab̄udu Chileke
eme ḡe mu wata eko okophoo;

- gude ụnwu agwa,
 buchara iphe-mmanụ akpatsu
 mu ẹhu-eghu.
- Mu e-gudekwanụ ọha,
 abudu okpobe ọha
 meru okophoo ye phe l'ẹhu;
 gude ọha, eme eswe kpatsu
 phe ẹhu-eghu;
- 22 kele oke ẹhu-eghu mu be gbanwuhwaru oku;
 oku obu jee eke gbiriri jasụ
 lo kerwua ime ime ali-maa.
 Oo-kekota mgboko; yee iphe,
 a kpataru dobe iya;
 lo woru oku ta l'eka ubvu futaru.
- 23 Mu a-tupyabe phe iphe-ehuka.
 O buru phe be mu a-nodu
 awu apfu mu l'ẹhu.
- 24 Mu e-me g'ejo okpa-nri
 byapfuta phe;
 lo mee g'ephe korofu enya.
 Mu emee; okpomoku
 erebushi phe anu;
 ejo iphe-ememe,
 atuko phe gbushia.
 Mu e-me g'ejo anu-egbudu
 gude epyii-eze bya atajashia phe;
 ejo agwo, awu l'ali,
 atagbushia phe l'eru.
- 25 Ogu-echi be ee-gude egbu phe pyaapya l'etezi.
 Ndzụ-agugu anma phe ẹhu
 godagoda l'ime ulo.
 Unwokerobyia;
 me unwumgboko;
 me unwegirima nshii;
 me ndu ewo befuru l'ishi
 atuko buru mkpurupyata.
- 26 Mu shi su le mu achikashi phe;
 ephe edzuru ekameka;
 bya emee g'a ta nyatabahe
 phe l'eliphe.
- 27 Obenu l'oo ejo opfu ndu ohogu
 phe be mu ezeru;

- mbụ; a -nonyakwa;
 ndu ọhogu pẹ pfua iphe,
 abudu ire-lanu.
- G'ephe ta anonya wata epfu sụ:
 'Lọ kwa ephebedua gude
 ẹka pẹ lwu-kpe pẹ;
 l'ọ tọ buẹbekwa Chipfu
 meeberu iphemiphe ono!' ”
- 28 Sụ-a; ndu Ízuru bukwa ọha, egomunggo swehuru.
 Ọ tọ dukpoda iphe,
 edoje pẹ ẹnya mẹ nanu.
- 29 Ọme l'ọ duru mmamiphe,
 du pẹ l'ẹhu;
 mẹ iphe-a edokwa pẹ ẹnya.
 Mbụ m'ephe amakwaru-a
 g'o mechaa nwuaru pẹ
 teke ikpazu.
- 30 ?Denu g'onye lanu e-shi
 chia unu umadzu labo
 l'umadzu ukporo iri oso?
 Mbụ-a; ?denu g'umadzu labo
 e-shi chia unu umadzu ise oso
 g'ephe gbala; gbahaa l'onye ono,
 bu Agbara-mkpuma pẹ ono
 be gbahawaru pẹ ẹka;
 mbụ lẹ Chipfu miwaru pẹ ẹnya?
- 31 Kele mkpuma nkepẹ ta adudu ge Agbara-mkpuma k'anyi.
 Ndu ọhogu anyi makwaru-a l'ọ
 g'ọ du bu ono.
- 32 Vayinu nkepẹ shi lẹ vayinu
 ke ndu Sodomu.
 Ọ buru l'egu ndu Gomóra
 be akpuru vayinu pẹ shi.
 Akpuru vayinu pẹ nodu
 egbu egbu.
- Itoto iya nodu atsokota ilu.
- 33 Mee pẹ bukwa obire ejo agwo;
 teme o buru ejo onu-mini,
 shi óghù l'onu.
- 34 “Mu woru iphemiphe ono
 kwakobe ree;
 mbụ lẹ mu kwachiwaru iya l'ẹka

- mu doberu ẹku,
mu nweru enweru.
- 35 Ọ kwa mbẹdua nwe emelata.
Ọo mbẹdua a-pfụ
phẹ ụgwo phẹ.
O -beepho teke ono bẹ ọkpa
e-chifu phẹ.
Mbụ lẹ mbọku, ẹphe a-buru
mkpurupyata nọakwa ntse.
Ọla-l'iswi gudeakwa ọso achi
phẹ kpabẹ kpabẹ.”
- 36 Ọ kwa Chipfu a-harụ
ndibe iya enge.
Ọ buru iya a-phuru
ndu-ozì iya obu-imemini;
mẹ ọ -humaepho l'ike
ta aduedu phẹ mẹ nanu;
mbụ l'ọ tọ duedu onye
ghuduru nu: ohu mẹ amadu.
- 37 Ọo-sụ phẹ:
“?Denu agwa phẹ ọbu;
mbụ mkpuma phẹ ono,
ẹphe agbabajẹ je
anodu eze ndzu?
- 38 Mbụ agwa,
atajẹ ẹbà anụ ngweja phẹ;
bya angua mẹe ngweja phẹ ono.
G'ọ gbeshinu bya eyeru
unu ẹka!
G'ọ gbobutanu unu!
- 39 Unu humakwa;
ọ kwa mbẹdua kpoloko
bụ Chileke!
Ọ tọ dọkwa Chileke ọzo, dọ nu;
gbahaa mbẹdua.
Ọ kwa mbẹdua emeje g'a nwuhu;
tẹme mu nọdu emeje
g'a nọdu ndzu.
Ọo mbẹdua emekajẹ iphe;
ọ buru mu emeje g'e wekorohu;
ophu ọ dudu onye adu ike
anafu mu onye mu guderu.

- 40 Mu paliru ẹka mu mabe
l'imigwe ria angu su:
Oo ge mu bu onye a-no ndzu
jasu l'ojejeje-a bu ge mu
epfu su:
- 41 Mu -baepho ogu-echi mu ono,
egbu nwiinwii ono ababa;
bya aparu iya l'eka;
gude kpeahaa ikpe;
be mu e-melata ndu ohogu mu;
mbu pfua ndu kporu mu ashi ugwo.
- 42 Mu e-me ge mee nemadzu
nguguchaa apfu mu angugu;
mbu mee ndu e gburu egbugbu;
waa ndu a kpuru le ndzu.
Teme ogu-echi mu asua
nemadzu pyaapya;
gbushia ishi ndu bu
ndu-ishi ndu ohogu mu ono.”
- 43 Unu tee eswa;
unube ohamoha!
G'unu le ndibe Chileke tee eswa!
Noo kele o-gwata ugwo
ishi ochi unwu iya.
Ndu ohogu iya be oo-melata
ugwo iphe, ephe eme iya.
Lo pfua ugwo iphe-aji,
ndu nkiya meru l'ali iya.
- 44 Mosisu ephe le Jioshuwa nwa Nunu swiru bata; bya agukota ebvu
ono; ndu Izurelu l'ophu numakota.
- 45 Tobudu iya bu; Mosisu pfuchaerupho ndu Izurelu iphemiphe ono;
46 bya asukwa phe pho: “Unu vukwaru opfu-a, mu rarun unu arara ntanun-
l'obu. Oo ya bu; g'unu ezia unwu unu g'ephe kwabe enya mekotaje iphe-
miphe, e deru lekemu-a. 47 G'opfu-a ta abukwaru unu opfu, enwedu ishi;
kele o kwa aka ono be ndzu unu no. O buru iphemiphe ono e-me g'unu
kariberu nka l'ali ono, unu adagha enyimu Jiordanu eje alwuta nworu
ono.”

Eepfu le Mosisu a-nwuhu
Ieli ubvu Nebo

- 48 Noo ya bu; Chipfu bya epfuru yeru Mosisu l'eswe mboku ono gede-
gede su: 49 “Nyihu ubvu-a, bu ubvu ubvu Abarimu-a; mbu ubvu Nebo, no

l'alì Mówabu; bya anòdukwapho l'okotazu mkpukpu Jieriko; je ahuma ali Kénanu, bu ali, mu abya anu ndu Ízurelu g'èphe nworu. ⁵⁰Oo l'eli úbvú ono, ii-nyihu ono be ìi-nòdu nwuhu lapfu ndiche ngu phe; egube ono, nwune ngu, bu Eronu nwuhuru l'úbvú Hòru; lapfu ndiche iya phe ono. ⁵¹Iphe, a-kpa iya nu buru l'unu no l'echilabo ndu Ízurelu le mini Meriba ke Kadeshi, no l'echiegu Zinu kwefuru mu ike; mbu l'oo l'unu te emeduru g'a maru ge mu du-be no l'echilabo ndu Ízurelu. ⁵²Oo ya meru iphe, bu uzanya be ìi-gbe huma ali ono; ole i ti bahudu l'alì obu, mu a-nu ndibe mu, bu ndu Izurelu ono."

Mósisu ago onu-oma anu okpa-ipfu Izurelu

33 ¹Owaa bu onu-oma, onye ke Chileke, bu Mósisu goru nu unwu Izurelu teme o nwuhu. ²O suru:

"Chipfu shi l'úbvú úbvú Sayinayi bya.

Mbu-a; o gbè l'uzo ali Siye nwaru phe ke phoo ge nchi-abohu.

O gbè l'úbvú Paranu echiru phe ke swachaswacha;

chiru unubuku ndu du no abya;

bya aparu oku, enwu enwunwu l'ekutara.

³Su-a; ndiphe be o yeru obu;

mbu l'iphe, bu ndu du no nokota iya l'eka.

Ephe nodu adaje kpurumu le mgboru okpa iya; phozeta baaru iya eja.

O buru iphe, o pfuru be ephe emeje.

⁴Mósisu turu ekemu doberu anyi;

o buru okiphe k'oshilokpa Jiekopu l'ophu.

⁵Chipfu buru eze ndu Jieshurunu

teke ono, ndu-ishi le Izurelu;

ephe l'okpa-ipfu ndu Izurelu l'ehu l'ehu dzukoru ono.

⁶Ge ndzu bukwaru k'okpa-ipfu Rubenu!

G'o to chihukwa; ophu awa iya epehukwa!"

⁷Owaa bu iphe, o pfuru l'ehu okpa-ipfu Jiuda:

"Jiko Chipfu; numajekwa olu ndu Jiuda!

Dutakwa phe dupfuta ndu nkephe;

li mee g'eka shihuje phe ike l'ogu!

Jiko yejenuru phe eka g'ephe lwu-kpee ndu ohogu phe!"

⁸Okpa-ipfu Livayi be o pfuru nkephe; su:

"Gube Chipfu; menaa g'okpa-ipfu Livayi tujeru ngu ido,

bu iya bu tumimu yee urimu ngu; gudeje maru iphe, bu obu ngu;

mbu ndu i huru ama le Masa;

teme gu l'ephe see opfu l'aguga mini Meriba.

⁹Oo phe pfuru ke nna phe; yee ke ne phe;

su l'ephe ta akpadu phe ishi.

- Ẹphe mĩa ụnwu, ẹphe nwuru anwunwu ẹnya;
 mịkwaapho unwune pẹ ẹnya.
 Obenu l'ẹphe letaru ẹnya mee opfu ngu;
 bya eletakwapho oḡbandzu ngu ẹnya.
- 10 Ọ bụ pẹ e-zije ndibe Jíékọpu iphe, ị sụru g'e meje.
 Ẹphe ezia ndu Ízurelu iphe, ị tũru l'ekemu.
 Ọ buru pẹ e-dobejeru ngu ụnwù-isensu;
 buru pẹ e-dobeje ngweja-akpo-ọku l'oru-ngweja ngu.
- 11 Jiko Chipfu; ọru ọnu-oma ye l'akanya, oose!
 Jiko g'ozì, o gude ẹka iya jee dọjekwa ngu ree!
 Ndu ono, wu-lihuru etso iya opfu ono;
 mẹ ndu ono, kporu iya ashì ono; nyakashinaa pẹ ọkpun-aka;
 k'ọphu ẹphe ta adubaedu ike egbeli ishi ọzo!"
- 12 Ọkpa-ọpfi Benjiaminu bẹ o pfuru nkiya; sụ:
 "Onye Chipfu yeru obu l'a-nodu nọ-kube iya; tũsaru ẹhu.
 Ọ buru Chipfu anọduje egbobuta iya eswe l'enyashi.
 Ọ buru l'echi ọkpoma Chipfu bẹ ọo-nmakojeru."
- 13 Ọkpa-ọpfi Jíósefu bẹ o pfuru nkiya; sụ:
 "G'alì iya bukwaru alì, Chipfu ọru ọnu-oma nù.
 G'ọ kwajeru pẹ ẹguru ịjì, shì l'imigwe;
 l'ọ nwuru pẹ mini ime alì shokoshoko.
- 14 G'ẹnyanwu mekwaa g'ẹguru akpuru-ọpfi, ọ kọberu l'alì mehuru iya!
 G'iphe, e meberu l'alì byaru iya gbukugbuku l'ona l'ona!
- 15 G'a nukwa iya iphe, kachakpo ree, shì l'úbvú úbvú ndiche ono;
 yẹ ẹguru iphe, shigbaa lẹ nwa-obvù ojejoje onoya!
- 16 G'e gudekwa iphe, kachaa ree, jiru eliphe kebe iya l'oma!
 Gẹ Jíósefu túbakwa onye ono l'ẹnya;
 mbù onye ono, nọ l'irwu nwoshi ono, enwu ọku ono!
 G'iphemiphe-a bukotakwaru kẹ Jíósefu;
 onye bụ onye-ishi l'echilabọ unwune iya.
- 17 Ọ dọ akpabiri g'oke-eswi, vu ọzo l'ẹpho ne iya.
 Mpu iya dọ gẹ k'atsù.
 Ọ buru mpu iya ono bẹ oo-gude adu-tsushi ohamoha l'ophu;
 mbù je akpaa lẹ ndu bu l'ẹka igwe beru alì beru.
 Nokwapho g'unubuku oshilokpa Ifuremu dọ;
 bya abukwarupho nno bụ g'aguta aguta oshilokpa Manase dọ."
- 18 Ọkpa-ọpfi Zebulun bẹ o pfuru nkiya; sụ:
 "G'ẹhu tsoje ngu utso; Zebulun; teke ilufu alufu.
 G'ẹhu tsokwa ngu pho; Isaka; mẹ ị nodu l'ibe ngu.
- 19 Ẹphe e-ku ndiphe g'ẹphe dzukọ l'úbvú.
 Ẹphe anodu l'úbvú ono gwee ngweja l'uzo, pfuru oto.
 Ọ buru iphe-oma, kuru l'eze-enyimu;

- waa ẹku, domigbaaru onwiya l'ali-evevee
be ẹphe e-gude buru.”
- 20 Ọkpa-ipfu Gadu be o pfuru nkiya; su:
“G'ajaja buru k'onye meru g'ali Gadu jaa àjàjà.
Ipfu Gadu ọkpoepho nwehu ze; kupyabe ishi g'oduma.
Iphemiphe, o humaru be oozijashije ẹka; zijashia ya ishi.
- 21 Ọ hotaru ali, kakota ree doberu onwiya;
kele o bu ẹka oke ali ke ndu-ishi ndu ojogu no
be ndu-ishi ndu Ízurelu edzukobeje;
mee iphe, pfuru oto l'anya Chipfu;
bya edobe iphe, o suru g'e meje.”
- 22 Ọkpa-ipfu Danu be o pfuru nkiya; su:
“Danu bukwa nwa oduma, shi le Beshanu apfu shoshoo eje
abya.”
- 23 Ọkpa-ipfu Nafutali be o pfuru nkiya; su:
“Nafutali be tubaakwaru Chipfu l'anya.
Teme onu-oma Chipfu bukwarupho nkiya.
Oke ali iya be shi l'uzo eze-enyimu Galili; je akpaa l'uzo ndohali.”
- 24 Ọkpa-ipfu Asha be o pfuru nkiya; su:
“G'onu-oma unwu ke Asha kakota k'unwegirima ozo shii.
G'o tubakwa unwune iya l'anya.
G'okpa iya dekwaru ederu le manu.
- 25 G'iphe, ii-gudeje gu-chia oguzo ngu bukwaru igwe; yee onyirubvu.
Ike ngu; yee ujiku ole, ii-no a-harupho enya nhamunha.
- 26 Ọ to dukwa onye du ge Chileke ke Jieshurunu;
onye aghajaje akpaminigwe ebo bya eyeru unu ẹka;
teme o nodu aduje akpabiri l'eka ogha l'urwukpu.
- 27 Ọ kwa Chiojejoje bu onye ii-noduje l'ime iya eze ndzu.
Ọ buru oshi-eka ojejoje iya ono be odeje ngu le mkpula; kuta; heru
eheru.
Ọ nodu achifuje ndu ohogu ngu l'ataphu ngu; su ngu:
'Ngwa; tuko phe gbushia!'
- 28 Ọo ya bu le ndu Ízurelu e-buru; tusaru ẹhu;
o to dudu iphe, byaru eme phe nu.
Mbụ l'eri Jiékọpu e-buru mbvulehu phe l'ali, ereshi yee mee du.
Teme igwe akwaaru phe iya iji.
- 29 Ẹhutso be a goru nu unube ndu Ízurelu.
?Bu onye du g'unu; unube ndu Chipfu dzotaru?
Ọo yebdua bu onye egbobutaje unu; bya aburu onye eyejeru unu ẹka.
Ọ bukwarupho yebdua bu ogu-echi, unu gude eku onwunu.
Ndu ohogu unu e-gude ndzu-agugu byapfuta unu;
unu azopyashia ẹka ẹphe agwaje iphe azopyashi.”

Anwūhu Mósisu

34 ¹Noo ya; Mósisu gbẹ lẹ nsuda Mówabu nyihu úbvú Nebo, bu iya bu úbvú, kachaa l'eli l'ime úbvú úbvú Pisiga, nọ ghaaru mkpukpu Jieriko iphu. Chipfu bya egoshikọta iya alì ono g'ọ ha; a -gbẹ l'alì Giladu jasụ l'alì ndu Danu; ²goshigbua ya alì ndu Nafutali l'ophu; yee alì ndu Ifuremu; waa alì ndu Manáse; mekpoo alì ndu Jiuda l'ophu je akpaa leze-enyimu ọzo enyanwu-ariba; ³goshigbua ya echiegu ndohali; mekpoo uswe iya ono l'ophu; eshikpoo lẹ nsuda ke mkpukpu Jieriko, bu iya bu ndu Oha-mpfu; je akpaa lẹ mkpukpu Zowa.

⁴Tobudu iya bu; Chipfu su iya: "Owaa bu alì ono, mu riburu Ebirihamu; waa Áyizaku; waa Jiékpọ angu lẹ mu a-nu oshilokpa phe ono. Mu hawaru ngu g'i gude enya ngu huma iya; ọle i tii bahudu iya abahu." ⁵Oo ya bu; onye-ozì Chipfu ono, bu Mósisu nwuhu l'eka ono l'alì ndu Mówabu; egube Chipfu pfuru iya. ⁶O woru iya lia lẹ nsuda l'alì ndu Mówabu l'eka nọ ghaaru mkpukpu Betu-Peyo iphu; ọle o to dudu onye maru nhamunha eka e liru iya jasụ ntanu-a. ⁷Mósisu noru ukporo apha ishii; teme o nwuhu; ọle o to phujeduru ragaraga; ophu okpehu iya alwajeduru alì. ⁸Ndu Ízurelu nodu lẹ nsuda Mówabu ono kwaa ekwa Mósisu ukporo abali l'abalì iri. Epe nochaa nno; eswe mboku, eegude akwa Mósisu bvụ.

⁹Unme mmamiphe bya eji Jioshuwa nwa Nunu ehụ; noo kele Mósisu byiberu iya eka l'ishi. Ndu Ízurelu nodu emeje iphe, o pfuru; epe shi nno mekotaephe iphe ono, Chipfu turu Mósisu ekemu iya ono. ¹⁰Eshi teke ono ta adukwa onye mpfuchiru, futajeru l'alì Ízurelu, du ge Mósisu; mbu onye Chipfu maru iphu l'iphu. ¹¹O to dudu onye du g'oo ya l'eme iphe-ohumalenya; yee iphe, du biribiri, bu ophu Chipfu ziru iya; o je emeshia l'alì Ijiputu; mbu meeru Fero; yee ndu-ozì iya; me ndu alì iya l'ophu. ¹²Ophu o dudu onye du ge Mósisu lenweru oke agburehu; yee eme iphe, paru eka bya adu ebvu lenya, bu ophu o no l'iphu ndu Ízurelu l'ophu meshia.